

MGA PANGUTANA UG

MGA TUBAG SA MGA SELYO



[Usa ka igsoong lalaki ang nagasulti og laing mga dila. Usa na usab ka igsoong lalaki ang nagahubad. Ang kongregasyon nagaampo sa makusog—Ed.]

Langitnon namong Amahan, mapasalamaton gayud kami alang niining higayona nga kami makapag-fellowship na usab sa Pulong sa Dios, diha sa Presensiya sa Dios. Mapasalamaton kaayo kami nga nagauban Ka kanamo, niining buntaga, aron tabangan kami ug aron panalanginan kami. Nagapangayo kami og pasaylo sa among mga sala, aron ang among mga lamparahan mapuno og Lana, ug malimpyohan ug magasiga na, aron magamit Mo kami karon aron pasidunggan ang Imong halangdon nga Ngalan. Kay amo kining ginapangamuyo sa Ngalan sa pinalangga nga Anak sa Dios, si Jesus Cristo. Amen.

Makapanglingkod na kamo.

² Pasulod pa lang ko sa dihang nadungog ko kanang mensahe nga ginapahayag. Busa ako...Tinuod kana nga kinahanglan natong ipapabilin nga puno ang atong mga lamparahan, ipapabilin ang atong...Kabalo mo, pag ang... Samtang nagasiga kamo, dili kamo makapadayon sa kung unsay nabuhat ninyo, karon. Kita n'yo? Tungod kay, ang kalayo, nga nagasiga gumikan sa lana, nagahimo kana og agiw. Busa mao kana'y hinungdan nga limpyohan ang...kinahanglan malimpyohan ang inyong mga lamparahan, tungod sa agiw nga anaa ibabaw sa—sa pabilo. Daghan kaninyo nga mga kaedad ko, sa diha nga nagagamit pa kita kaniadto og—og lampara, kita n'yo, sila...Kana—kana—nagkaaduna kana og agiw sa tumoy, kon diin kana nagasiga, ug mao nga makapahinay kana sa siga. Busa kinahanglan n'yong tangtangan ang tanang agiw, ug aron nga “makapadayon kita, ngadto sa dauganan sa langitnong pagtawag diha kang Cristo.”

³ Karon, usa kini—usa kini ka halangdon, og maanindot nga buntag, sa sulod ug sa gawas, ingon nga nagakahaduol na kining panahon sa Pasko sa Pagkabanhaw.

⁴ Ug—ug magahisgot na kita sa kaulahiing Selyo, unyang gabii, kon itugot sa Ginoo. Ug usa gayud Kini ka mysteryoso nga Selyo, hilabihan, gayud, tungod kay wala gani Kini—wala gani Kini mahisgoti diha sa mga Kasulatan sa bisan asa, walay mga simbolo, og unsa man nga mahimong basihan. Kinahanglan nga magagikan Kini mismo sa Langit.

⁵ Ug kini—usa—usa kini ka medyo malisod nga oras para kanako. Ingon na niana kini, sa tibuok semana. Karon mao kini ang akong . . . ang mamahimong ikawalo ko nga adlaw sulod sa usa ka lawak. Ug namatikdan ko dinhi, nga daghan, sa niining mga hangyo, nga medyo kinahanglan ko pang pilion. Daghan man gud niini ang gusto og mga pagpakighinabi. Ug ako—gusto ko kana. Gusto ko man kana nga—nga ihatag karon, kita n’yo, apan ako—dili ko lang gyud mahimo kana sa karon. Tungod, nasabtan man ninyo, nga ang—ang kinatibuk-an sa ginapaningkamotan natong buhaton karon mao’y hibaloon ang kapadayagan sa—sa kabubut-on sa Ginoo, nakita n’yo. Tungod pagmagpahigayon man gud ’ta og pagpakighinabi, nan magapatipas kana kanimo, ngadto sa usa na usab ka bahin mahatungod sa lahi nga butang, kita n’yo.

⁶ Ug, dayon, ug sama sa pag-ampo para sa mga may sakit, lahi na usab kana. Ikaw . . . Kana’y mga panan-awon ug mga ingon-niana; lahi ang pagtuon, ug imong—lahi pud ang pagdihog kanimo. Sama ra kana sa giingon sa Biblia dinha, “Usa—usa ka kahoy nga natanum sa daplin sa—sa kasapaan sa tubig.” “Kasapaan sa tubig,” kita n’yo, mao ra nga tubig, apan adunay usa ka lutsanan nga paingon *niini*, paingon *niini*, ug paingon *niini*. Nagadepende ra kung unsa nga lutsanan. Apan mao ra kana nga Espiritu.

⁷ Si Pablo, sa Unang Mga Taga-Corinto 12, mao usab ang gihimo, nga naghisgot mahitungod sa, “Adunay daghang mga hiyas, apan mao ra kini nga Espiritu.”

⁸ Busa, nakita n’yo, kung nagabuhat ka, pananglitan, og usa ka butang, dayon natipas ka aron buhaton kining lahi nga butang *dinhi*. Kabalo na mo sa buut kong ipasabot. Imong—tunan mo kana nga linya sa hisgotanan, nahimo mo na ang mga tawo . . . Ug karon nakasentro na ang ilang mga kasingkasing, “Unsa man kining Mga Selyo?” Ang ilang pagtagad anaa na sa, “Unsa man Kini?” Matag gabii, pagmoanhi na ako dinhi, aduna gayu’y tensyon, hangtud nga kinahanglan ko ’usa maghisgot og mahitungod sa ubang butang; aron lang nga medyo makapag-relaks—makapag-relaks, nakita n’yo, ug, dayon, hangtud nga ablihan na sa Balaang Espiritu ang maong Selyo. Ug dayon—dayon kinahanglan kong buhaton, matag gabii ang ingon niana. Dayon pag-usabon mo kana ngadto sa pagpang-ayo o ingon-ana, kita n’yo, kamo . . . Ang mga tawo nakasentro na gayud sa usa ka butang. Maglisud ka gyud nga usabon kana ngadto sa lahi, dihadiha dayon.

⁹ Ug—ug dayon, usab, ingon nga nahibalo ko nga sa inyong taliwala mismo nagakahitabo ang mga butang, kita n’yo, nga ako—ako lamang . . . ako—kahibalo ko. Kahibalo ko nga kamo—wala ninyo makita kana, kita n’yo. Sigurado ako nga wala ninyo makita kana, kita n’yo. Ug moingon mo, “Igsoong

Branham, malisud kana nga butang para kanimo nga isulti kana.” Kahibalo ko nga malisud gyud kini.

¹⁰ Apan, tan-awa, tugoti lang ko nga isulti kini karon. Siguro kini nga mga teyp para lang man kanato, ug uban pa. Apan tugoti ko nga isulti kini, kita n’yo. Nga, kamo—dili ninyo. . . Dili ninyo masabtan kana, kita n’yo, ug dili man pud ninyo kinahanglan nga sabton kana. Busa ayaw ninyo sulaying hubaron ang unsa mang butang, kita n’yo. Ayaw n’yo paninguhaang ibutang ang inyong interpretasyon niini; igo lang kamo—mapahilayo lang gyud kamo. Sunda lang ang akong tambag, kung nagatoo kamo kanako karon, kung gikahimut-an man—man ako sa Dios sa inyong panan-aw.

¹¹ Ug kabalo na mo, niana, nga kini mga kapadayagan ug ingon-anang mga butang. Ako—nakauban na man ko ninyo dinhi sa dugay nga panahon, kita n’yo, ug kanunay kining husto. Ug karon aron mas pamatud-an kini nga, husto, nagakatakdo kini mismo sa Pulong. Kita n’yo? Busa, kabalo na mo nga Kini’y MAO KINI ANG GINAINGON SA GINOO. Eksakto kana. Kita n’yo, napamatud-an na Kini kaninyo.

¹² Karon sunda ninyo ang akong tambag, ingon nga inyong igsoon. Ayaw mo paghatag og kinaugalingon ninyong interpretasyon sa bisan unsang butang. Padayon lamang kamo nga magkinabuhi og usa ka maayo nga kinabuhing Cristohanon. Tungod, igapahilayo n’yo lang ang inyong kaugalingon gikan sa tinuod nga butang pagbuhaton ninyo kana. Kita n’yo? Kamo, ipasimang n’yo lang ang inyong dalan gikan sa maong butang.

¹³ Ug nasayod man ang tanan kaninyo ug nahibalo nga aduna gayu’y misteryosong butang nga nagakahitabo. Ug nagakahitabo kini. Ug nasayod ko kung unsa kini. Karon, dili ko lang ginasulti kini; nga grasya sa Dios ang nagtugot kanakong mahibaloan kung unsa kini. Butang kini nga mas kahibulongan pa. Ug nahitabo kini mismo karon, ug walay ni usa man ka paagi sa kalibutan para kaninyo nga mahibaloan kini. Ug kini’y. . .ako. . .Apan, ginapanumpa ko gayud, nga pinaagi niining Biblia sa akong kamot, nasayran ko kung unsa kini. Gikasulti na kini kaninyo, kaniadto. Busa ayaw gayud—gayud ninyo sulaying maghatag og unsa mang kinaugalingong interpretasyon, apan tohi lang ako, ingon nga inyong igsoon. Kita n’yo? Nagakinabuhi kita karon sa usa ka makuyaw nga takna. Nagakinabuhi kita sa usa ka panahon kon diin ang. . . Bueno, kita’y. . .

¹⁴ Karon, magmapainubsanon lang gyud kamo, magmahimong Cristohanon, ug maninguhang magkinabuhi alang sa Dios. Ug magkinabuhi nga matinuuron sa inyong isigkatawo, ug higugmaa kadtong mga wala nahigugma kaninyo. Ayaw paninguhaa nga maghimo og unsa mang. . .Nakita n’yo, tungod ginahimo ninyo, ginahimo n’yo lang kana nga usa ka

misteryosong butang, ug ginaguba ang tinuod nga programa sa Dios. Kita n'yo?

¹⁵ Kagahapon sa hapon, adunay nahitabo sulod sa akong kuwarta, nga dili ko—ko gayud mahimo nga—nga mahikalimtan kadto, nakita n'yo. Ug busa kamo...Ug mga duha na ka semana ang milabay, aduna usab og nahitabo, nga dili gayud mahimong...Samtang buhi pa ako niining kalibutana, ako—dili ko gayud kini malimtan, kita n'yo. Ug, busa, apan...

¹⁶ Ug ang—ang iglesia, ingon nga dili man ninyo kinahanglang sabton kining mga butanga, busa ayaw mo paghatag og unsa mang kinaugalingong interpretasyon sa bisan unsang butang. Kita n'yo? Padayon lamang kamo ug hinumdumi lang kung unsay gikasulti kaninyo. Magkinabuhi og usa ka kinabuhing Cristohanon. Tambong lang mo sa inyong iglesia. Magmahimong usa ka tinuod nga kahayag bisan asa man kamo, ug magsiga lamang para kang Cristo, ug isulti sa mga tawo kon daw sa unsa n'yo Siya gihigugma. Ug tugoti ang inyong testimonyo nga may gugma, sa tanang panahon, diha sa mga tawo. Kita n'yo? Tungod kay, kung pugson gyud ninyong interpretahon, nan ginatuis n'yo ang inyong kaugalingon ngadto sa kung unsang butang, ug dayon kamo'y—kamo'y misimang na sa matul-id nga dalan. Kita n'yo, sa matag higayon nga ginasulayan n'yong buhaton kana, ingon niana ang nagakahitabo kaninyo. Kita n'yo? Busa ayaw, ayaw, ayaw gayud ninyo sulayi nga maghimo og unsa mang interpretasyon.

¹⁷ Ug ilabina, unyang gabii, sa diha nga ipahayag na kana nga Selyo sa atubangan ninyo, kita n'yo, ayaw gayud paninguhaang interpretahon Kini. Padayon lamang kamo ug magmapainubsanon, ug magpadayon uban ang mao gihapong yano nga Mensahe.

¹⁸ Karon moingon mo, “Igsoong Branham, kana ba...Kita, ingon nga Iglesia sa buhi nga Dios, dili ba kita...”

Bueno, sama sa gipaningkamotan ko nang...Tan-awa dinhi, gusto kong isulti...

Moingon, “Bueno, nganong dili ko man mahimo? Kinahanglan aduna unta ko'y...”

Dili. Karon, ayaw gayud.

¹⁹ Hinumdumi, ginasulti ko kini para sa inyong kaayohan. Kita n'yo, ginasulti ko kini aron nga inyong masabtan. Kung nagatoo kamo kanako, karon, nan paminaw kamo sa kung unsay ginasulti ko kaninyo. Kita n'yo? Kita n'yo?

²⁰ Karon, dinhi, karon ania ang usa ka dapit, ug kana'y, tawgon nato kana nga usa ka dapit paminawan, kita n'yo. Ug sa sulod niini, adunay radyo, kita n'yo, ug aduna pud og mga pasidaan ug mga butang nga mamahimo. Sama sa usa ka espada sa imong kamot, kita n'yo, mahimo kining mopunit gikan sa dautan o

kaha mopunit gikan lamang sa . . . sa pagkuha niini og mensahe, kita n'yo.

²¹ Karon, apan karon, pananglitan, para sa ordinaryo nga tawo, daghan na kaayong mga kulto ug mga sekta nga nanagpanungha, tungod sa diyutay'ng mga pagbubo sa Espiritu, hangtud nga ang mga tawo nadala lang sa ilang pagbati sa kung unsang butang, manghawa ug magsugod na pud og gamay'ng kalihokan, ug, kabalo na mo, ug—ug ingon-anang butang. Kita n'yo? Ayaw gyud ninyo buhata kana ha. Kita n'yo? Karon, hinumdumi lang, pagpabilin lamang sa kung unsa kamo.

²² Ug moingon mo, “Bueno, nagpakita man ang Ginoo og . . .” Dili. Karon magbantay gyud, kita n'yo.

²³ Tan-awa dinhi. Ipakita ko kaninyo ang usa ka butang, kita n'yo. Kabalo ba mo nga adunay napulo ka libo ka mga tingog sulod niining lawak mismo karon? [Nagaingon ang kongregasyon, “Amen.”—Ed.] Sa literal, mga tingog sa mga tawo nga nagalabay pinaagi sa electronic waves sa radyo! Nganong dili man ninyo kini madungog? Mga tingog man unta kini. Husto ba kana? [“Amen.”] Nasibya sila dinhi mismo karon. Bueno, adunay porma sa mga tawo ug mga lawas nga nagalihok mismo sa niini nga lawak karon. Husto ba kana? [“Amen.”] Bueno, nganong dili man ninyo sila makita? Kita n'yo? Ania sila dinhi, mga tinuod nga tingog sama sa akong tingog. Bueno, nganong dili man ninyo madungog kini? Kita n'yo? Kinahanglan man niini nga moigo una sa usa ka butang, aron mapadayag kini. Kita n'yo? Karon nasabtan n'yo ba? [“Amen.”]

²⁴ Karon dili lang maghubad og unsa man. Kung gusto sa Dios nga ipahibalo kaninyo ang unsa mang butang, ipadala man Niya kini kaninyo. Kita n'yo? Busa magmatinud-anon gayud, tinuod nga lig-on karon. Magpabilin lang nga hilom, adunay butang nga nahitabo. Ug karon magmatinud-anon lamang . . . Nasabtan man ninyo ang buut kong ipasabot, dili ba? [Nagaingon ang kongregasyon, “Amen.”—Ed.] Ug magmahimo lamang . . . Ayaw paninguhaa nga himoon ang inyong kaugalingon nga lahi gyud, aron lang nga mamahimong Cristohanon, tungod kay inyong—ginapahilayo n'yo lang ang inyong kaugalingon gikan sa Dios. Ug kamo—kamo—kamo . . .

²⁵ Kung masabtan ninyo kini, kini mao kanang Ikatulong Pagbira. Kita n'yo? Inyong—nakita unta ninyo kana, niadtong miaging adlaw. Kita n'yo? Busa kung ingon-ana, timan-i lang, dili na gyud magkaaduna pa og unsa mang pagsundog-sundog sama nga nagkaaduna kadtong unang duha. Kita n'yo? Busa, mao kana'y angay ninyong—ninyong masayran karon. Basta—basta timan-i gyud kana . . .

²⁶ Nakita n'yo, karon, adunay butang nga nagakahitabo sulod niini nga lawak, ug aduna gayu'y Usa ka butang dinhi. Adunay—aduna, sa tinuod lang, sulod niini nga lawak, og mga Manulonda,

ug Tingog sa Dios. Kita n'yo? Apan unsaon man ninyo. . . Dili n'yo mahimo. . . Kung dili man ninyo madungog ang natural nga tingog, nga walay usa ka mopagawas niini, nan unsaon n'yo man pagkadungog sa espirituwal nga Tingog?

²⁷ Karon mahimo ninyong magpakaaron-ingnon nga adunay tawo nga nagakanta *niining* usa ka kanta. Mahimong wala gani kini dinha, kita n'yo. Apan sa dihang maigo na niini mismo ang kristal nga angay'ng igoon niini, nan magahatag kini og usa ka tinuod nga interpretasyon, ug ginapakita, ginapanghimatud-an kini pinaagi sa pagpakita sa maong hulagway. Nasabtan n'yo ba ang buut kong ipasabot? [Nagaingon ang kongregasyon, "Amen."—Ed.]

²⁸ Karon, ang Espiritu sa Dios, sa dihang nagapanulti Kini pinaagi sa tinuod nga Pulong, ginapanghimatud-an Niini ang Kaugalingon Niini, aron ipakita Niini Mismo, nga husto Kini. Nasabtan na ba ninyo karon? [Nagaingon ang kongregasyon, "Amen."—Ed.] Okey.

Karon mag-ampo kita, pag-usab.

²⁹ Langitnong Amahan, amo nang pagaab- . . . ablihan ang mga tabon niini nga Basahon, ug sa—sa pagpaninguha diha sa pisikal nga bahin nga ihatag og balik kung unsay Imong gibuksan para kanamo diha sa mga butang espirituhanon. Ug karon ginaampo ko, Dios, nga tabangan Mo ako aron maihatag ang husto nga interpretasyon sa niini nga mga pangutana. Nga kini mahimong pagaingnon nga—nga sila'y. . . Sila'y makatabang sa mga tawo. Sila'y makahatag para kanila og pagsabot. Ug ginaampo ko nga ihatag Mo kanako usab ang pagsabot, aron nga mapaabot ko Kini ngadto sa Imong mga katawhan, aron nga magkaaduna sila og pagsabot, nga magkauban kami nga magakinabuhhi para sa himaya ug kadungganan sa Dios, pinaagi sa Ngalan ni Jesus Cristo. Amen.

³⁰ Karon, gusto ko lang isulti kini.

³¹ Ug abi ko og kini nga butang *dinhi* ang nagakontrolar sa mga teyp, pero dili man diay, kita n'yo. Ug usa—usa kini ka suga sa lamesa. Ug abi ko og ang tigkontrolar sa teyp ania dinhi sama kaniadto. Apan giingnan na ako nga mosinyas lang kono ko ngadto sa mga kaigsoonan diha sa—diha sa lawak, sa lawak nga ginarekordan, ug aron masayran nila kung kanus-a palongon ang mga teyp, ug kung kanus-a dili.

³² Kita n'yo, ang mga teyp aduna man gud og pangtibuok-kalibutan nga ministerio, kita n'yo, bisan asa na. Ginahubad kini sa tanang matang sa mga pinulongan ug tanan na. Busa aduna gyu'y mga butang nga mahimo natong isulti dinhi mismo, nga dili nato mahimong isulti sa kung asa pa man, nakita n'yo, ug mao kana'y hinungdan nga ginapalng nato kana.

³³ Karon, ang pagtubag sa mga pangutana mao'y . . . usa ka medyo malisud nga butang. Busa, ako—ako karon. . . Sa—sa. . .

sa pagtubag niini, ang kadaghanan niini, ang kadaghanan sa mga pangutana, gawas sa . . . Karon, ang matag usa . . . Ang pipila niini wala gani may kahilambigitan sa Mensahe, man lang, pero akong paningkamotan, o, sa Mga Selyo man, pero paningkamotan ko gayud nga tubagon ang mga niini. Ug gihatag kini kanako, sumala sa pagkasulti niini. Giingnan na ko bahin sa kadaghanan niini. O, ang kadaghanan niini mao'y mahitungod kono sa mga hangyo para sa pag-ampo, ug sa mga may sakit ug mga nagaantus. Ug—ug nagkalainlaing mga butang nga sama niana, og uban pa, ug busa wala kini'y kahilambigitan sa unsa mang pangutana nga kinahanglang tubagon. Ug dayon sila . . . Gihatagan pud ko og usa ka hugpong nga—nga mahitungod sa nagkalainlaing mga butang, sa Kasulatan ug mga ingon-niana; apan siguro, kung aduna pa kita'y panahon, atong paningkamotan nga tubagon kana kutob sa atong mahimo. Karon, ug kung masayup man ko, aba, timan-i, dili ko kini gituyo nga masayup.

³⁴ Busa nagabati ba og maayo ang tanan? [Nagaingon ang kongregasyon, "Amen."—Ed.] Amen. Dili ba kini ingon ka . . . Kung hisgotan ang Langitnong mga dapit diha kang Cristo Jesus, pagkamaanindot kini nga dapit, pagkamaanindot nga panahon!

³⁵ Sa tanang higayon nga anaa ako luyo sa pulpito niining tabernakulo, wala pa gayud ko, sukad, sa unsa mang higayon sa akong ministerio, nga nakapamuhat diha sa mga dapit nga iya sa Dios ug sa espirituhanong mga dapit nga sama niining panahona; labaw pa sa unsa mang butang nga akong nabuhat sa unsa mang higayon sa akong ministerio, sa unsa man nga panagtigum sa bisan asa, nga sama niini. Kasagaran, nagapahinungod gayud sa pagpang-ayo. Kini mao ang pagpadayag sa mga Kamatuoran, pinaagi sa mao ra nga Espiritu, mao ra nga Espiritu.

³⁶ Ug ako—nag-inusara ako, ako ra gyud, ug nagpuyo sa usa ka dapit, o nagaadto og nagakaon sa usa ka dapit. Ug nag-inusara lang ako, busa usa mismo kini ka mahimayaong higayon.

³⁷ Ug karon, dayon, kon karon man nga buntag, o pagkasunod nga buntag, ako . . . Tingali, kung mahuman dayon kita, magaampo ako para sa mga may sakit niining buntaga, kung dili ra kaayo madugay kini nga mga pangutana.

³⁸ Mao nga ako—kinahanglan kong mag-inusara 'usa sa makadiyut, kita n'yo. Tungod ang hunahuna sa tawo makalahutay lang man og ingon-ana ka dugay. Kita n'yo? Ug pagmoabot ka sa usa ka punto kon diin nagalingkod ka og usa ka oras, nga naminhod na tungod sa Presensiya sa Dios, ug ang Haligi nga Kalayo nagapaibabaw dinha sa imong atubangan, ikaw—dili ka gyud makapabilin og ingon-ana ka dugay, nakita n'yo. Ang tawo dili makahimo, dili gyud makaagwanta niana.

39 Ug busa, karon, maanindot kaayo kini nga mga pangutana. Ginapasalamatan ko, ang kaalam ug ang maong mga butang nga gigamit sa mga tawo. Karon, para sa pinaka una. Ug paningkamotan kong tubagon kana. Ug dayon kung ako—dili ko man masabtan kana sa insakto, bueno, kamo—pasayloa ko ninyo kung ingon-ana.

40 Ug kung aduna man kamo'y lahi nga interpretasyon, ug nagatoo nga ang inyong ideya mahitungod niana mao'y husto, bueno, padayon lang. Dili man kana makapadaut, tungod kay wala ma'y usa o duha niini ang aduna og unsa man nga kahilambigitan sa kaluwasan. Kini mao lamang. . .

41 Kadaghanan sa mga pangutana, nga gipangutana, mao'y mahitungod niingod bahin sa kas-. . .o mahitungod sa Pagsakgaw sa Iglesia. Busa, kita n'yo, kini nga mga pangutana dinhi, nagapahinungod sa mga umalabot ug magakahitabo pa lang, didto pa sa pikas nga panahon. Tungod, lagpas na man ta karon sa kapanahonan sa iglesia, diha sa atong mga pagpanundlo diha niining—niining Basahon. Lagpas na kita, dinha sa panahon sa pagtawag sa usa ka gatus kap-atan ug upat ka libo. Karon ang pinaka una dinhi:

173. Ang lima ba ka maalam nga mga dalagang ulay, sa Mateo 25, mao ba ang mga tig-atiman sa—sa Pangasaw-onon, o sila ba ang Pangasaw-onon? Kita n'yo? Kung kining maalam nga mga dalagang ulay mao ang mga tig-atiman sa Pangasaw-onon, nan asa man ang Pangasaw-onon?

42 Kita n'yo, karon, kutob sa pinakamaayo kong nasabtan, kining lima ka dalagang ulay. . .Aduna ma'y napulo kanila, kabalo na mo, nga nangadto, kita n'yo. Ug kini dinhi usa lamang ka simbolo, o usa ka samingay, kita n'yo, nga—nga akong isulti kaninyo. Kita n'yo, adunay napulo kanila. Siyempre, adunay sobra pa sa napulo. Gihimo lang kana nga numero. Apan, nianang tungora, ang—ang lima ka maalam nga mga dalagang ulay aduna na'y Lana sa ilang mga lampara. Ang mga dili-maalam wala pa'y Lana diha sa ilang mga lampara.

43 “Busa kung kanang napulo dinha, sa Mateo, kung. . .” Mao kini ang—ang pangutana sa maong tawo. “Kung kanang napulo, dinha, nagapasabot ba nga mao kana ang mamahimong. . .o kining lima, diay, kana'y lima lang ba, kita n'yo, lima lang ba ka mga tawo?” Dili, dili ingon-niana ang ginapasabot niini.

44 Kini'y usa lamang ka simbolo, mahitungod sa mga dalagang ulay, nakita n'yo, mahitungod sa dalagang ulay nga migawas nga adunay Lana sa ilang lampara. Sila mao'y usa ka bahin niana nga Pangasaw-onon. Ug sa akong pagsabot. . .

45 Ug dayon namatikdan ninyo, karon, nga sila mao ang mga dalagang ulay sa kaulahiing pagtukaw. Sa tanang mga pagtukaw, adunay pito ka pagtukaw. Ug sa ikapitong pagtukaw, ang takna sa tungang-gabii, nga atong pagahisgotan karon, kita

n'yo. Karon, sa niining tungang-gabii nga pagtukaw, nahigmata kini nga mga dalagang ulay ug gihikay ang ilang mga lampara, ug misulod; samtang ang nagakatulog nga dalagang ulay . . .

46 “Karon kini nga bahin dinhi, kining lima,” kung mao kana’y kahulogan sa maong pangutana, ang kahulogan, “aduna lang ba og lima?” Ug aduna pud kita’y daghang mga pangutana dinhi, mahitungod sa—sa pito ka libo, ug uban pa. Karon, kana, usa lamang kana ka simbolo, nga bahin kanila. Ug ang tanang nahigmata sa niining kaulahiing kapanahonan dinhi, sa ikapitong pagtukaw, nga . . . “Kung aduna lamang ba og—og lima nga nahigmata nianang panahona, nga gilalin, nakasulod uban sa Pangasaw-onon, og uban pa, sa Pamanhonon? Karon kung sila mismo . . .”

47 Dili kana nagapasabot nga aduna lamang og lima. Tungod kay, nagakatulog man sila, sa tanang mga kapanahonan kini; sumala sa atong nahisgotan niining semanaha, kita n'yo.

48 Sa mga adlaw ni—ni Pablo, ang manulonda sa iglesia kaniadto sa Efeso; si Pablo, ingon nga mao’y nagtukod niini nga iglesia, mao ang mensahero niini. Hinumdumi, si Pablo, nga nagtukod sa iglesia sa Efeso, ang nahimong mensahero niana nga iglesia. Ug ang Espiritu, nga anaa sa yuta niadtong panahona, mao ang Espiritu sa leon. Ug ang leon mao ang Leon sa banay ni Juda, nga mao si Cristo, ug si Cristo mao ang Pulong. Si Pablo, nga dala ang Pulong alang niana nga kapanahonan! Linibo ang mga nahikatulog niana nga kapanahonan. Husto ba kana? [Nagaingon ang kongregasyon, “Amen.”—Ed.]

49 Dayon miabot ang sunod nga kapanahonan, ug sa panahon nga midugay ang iglesia diha sa—sa mangiub nga kapanahonan, mitungha ang Espiritu sa laking-baka; paghago, pagsakripisyo, ug paghalad, ug gitugyan ang ilang mga kinabuhi. Linibo ka pilo ang nahikatulog, tungod sa pagpang-martir ug tanan na. Nanaghulat sila karon, kita n'yo.

50 Dayon, ug ang sunod nga kapanahonan nga miabot, ang Lutheran, ang kapanahonan sa repormasyon. Dinha mitungha ang pinakautokan, diha sa pagkamaalamon sa tawo. Kung namatikdan ninyo, mitungha ang tawo uban niana, ug sa pagtungha niya, gidugang niya ang iya mismong pagkamaalamon. Mao usab kana’y nagpaminyo kaniya ngadto sa pikas bahin, kita n'yo. Kita n'yo? Kung nagpabilin lang unta siya sa kaalam sa Dios, nga nagapang-reporma lamang ug ginabira pagawas . . . Apan unsa ma’y gibuhay niya? Human nianang tawo nga nagdala sa maong mensahe, si Luther; human sa pagkamatay ni Luther; aduna na sila og usa ka Lutheran nga organisasyon.

51 Human sa pagkamatay ni Wesley, nagkaaduna pud sila og Methodist nga organisasyon. Kita n'yo? Mao kana, padayon kamong nagapaingon niana nga direksyon. Kana—kana

gayu'y. . . Ingon niana ang nagakahitabo. Karon gusto ko nga—nga—nga himatikdan ninyo kini, kita n'yo. Karon tingali'g adunay mangutana mahitungod sa mga Pentecostal, nga mao ang—ang ikatulong kapanahonan.

⁵² Nakita n'yo, ang matag usa niadto nga mga kapanahonan igo lamang naituslob sa Balaang Espiritu. Ang pagpamatarung usa ka buhat sa Balaang Espiritu; ang pagpabalaan usa usab ka buhat sa Balaang Espiritu; apan ang bautismo *mao* ang Balaang Espiritu mismo. Mao kana'y hinungdan nga nagkinahanglan og usa ka ma-propesiya nga Propeta nga mokanaug. Walay mensahero sa maong kapanahonan, tungod ang Espiritu Santo Mismo ang miabot, diha sa Iyang kahupnganan, pinaagi sa bautismo.

⁵³ Apan sa katapusan sa kapanahonan, ingon nga kanunay kining nagakatapos sama sa uban pa, atong hingsayran dinha, pagkahuman, nga gipadala na ang mensahero. Ug ang tanan niini nga mga kalibog ug mga ingon-ana mahan-ay na sa insakto, dayon moabot na ang Pagsakgaw para sa Iglesia.

⁵⁴ Apan ingon nga daghan ang naghunahuna niining nagkalainlaing mga butang, “Mongitngit kono ang adlaw, ang bulan. . .” Gihunahuna nila nga mahitabo kana dinhi sa Cristohanong kapanahonan. Nasipyat sila nga makita kadtung tulo ka pangutana nga gipangutana ngadto sa atong Ginoo kaniadto, kita n'yo, sa dihang gitubag Niya kini.

⁵⁵ Bueno, kagabii, sa hunahuna ko nga wala na gayu'y pangutana. Gitubag nato ang matag usa niadto nga mga pangutana ug gihan-ay kadto mismo ilalum sa Mga Selyo. Ug ang Mga Selyo mao man ang kinatibuk—ang Basahon, Mismo.

Nagatoo ka ba niana, doktor? [Nagaingon ang igsoong lalaki, “Oo.”—Ed.]

⁵⁶ Kita n'yo, ang tibuok butang konektado tanan. Ug gihisgotan nato kung unsay gisulti ni Jesus dinhi. Nangutana sila og tulo ka pangutana, kita n'yo, “Kanus-a man kining mga butanga mahitabo? Unsa ma'y mamahimong ilhanan sa Imong Pag-abot? Ug unsa ma'y katapusan sa kalibutan?” Ug gipangtubag Niya kini mismo. . . Ug gihisgotan nato kana, ang matag usa, basi niana, gawas ra sa usa. Unsa man kana? Ang Ikapitong Selyo. Ngano man? Kita n'yo, wala pa man kana napahayag. Mao kana. Ang matag usa niana nahayag mismo. Gikumpara ko sila, eksakto gayud, ang matag usa niini.

⁵⁷ Ug, ako, sa dihang nagsulat ako kagabii, ug pagkadangat ko dinha ug kinahanglan kong. . . Akong gibalikan sa pagtan-aw ang karaan ko nang sinulat nga akong gisulat—gisulat kaniadto. Bueno, nakita ko nga ako diay gipahimutang ang usa ngadto sa puwesto sa usa, nga sama niana. Gipangbaylo ko, sila balik. Mao kana'y akong gibuhat. Siguro nasabtan na ninyo kini. Kamo, nasabtan n'yo ba kini? Kita n'yo?

58 Akong gisulat man gud dinhi kung unsay akong isulat unta sa *niining* bahin, ug naisulat ko kini *dinhing* dapita. Gisulat—pareho kong gisulat kining, 9, 11, o 9, 6, o ingon-ana . . . o ang 6 ug 11, ug—ug—ug ang 9 ug 11, nga dili unta ingon niana. Nabaliktad kana, ang sunod nga bersekulo ilalum niana. Kita n'yo? Ug mao kana, ang—ang tubag, tali sa kamatay ug sa gubat, nakita n'yo. Dinha unta kini.

59 Busa nalipay gyud kaayo ko! Nagmalipayon gayud ako nga sama sa usa—usa ka . . . Nalipay ako tungod sa kadasig gumikan sa maong kapadayagan. Busa, ako—gisulat ko kini, dinhi dapit. Nagalingkod didto nga may lapis, o usa ka pangsulat, ug gisulat ko ang 11 sa parehong bahin, kon diin dili unta kini angay'ng maanaa dinha. Sa hunahuna ko nga 9 unta kadto imbis nga 11 para sa pikas nga bahin.

60 Apan karon nakita n'yo ba kung unsa sila ka eksaktong nagkatakdo? Karon, ayaw n'yo kalimti kana. Nagakatakdo kana hangtud sa Ikaunom, ug mihunong na, kita nyo. Ug matikdi ang—matikdi ang pag-abli sa maong Mga Selyo; nagapadayon kana hangtud sa Ikaunom, ug mihunong na. Aduna lamang og, “Kahilum sa Langit,” mao lang kana ang gisulti, “sulod sa tunga sa oras.”

61 Karon—karon, sa mga niini, kita n'yo, ako . . . kinahanglan kong magdali ug tubagon na ang mga niini. Tungod, kita n'yo, ang matag usa niini usa man ka wali, nga upat ka semana ang gidugayon, nakita n'yo, ang mahitungod—mahitungod sa matag usa niini, ug mao nga makahisgot gyud ka og uban pang butang. Apan ako—dili ko ginatuyo nga buhaton kana, tungod kay gusto ko gayud nga tubagon ang pangutana sa tanan, kutob sa akong mahimo.

62 Kini nga mga dalagang ulay, kita n'yo, naglangkob sila sa . . . Kana mao'y kabahin lamang nila, sa niana nga kapanahonan, kita n'yo. Ang matag kapanahonan aduna ma'y mga dalagang ulay. Kita n'yo? Usa—usa ka Selyo . . .

Nagaabot ang manulonda ngadto sa iglesia. “Ngadto sa manulonda sa iglesia sa Efeso isulat mo.” Kita n'yo?

63 Dayon pagkadangat dinhi, human sa pagsulat ngadto sa iglesia sa Efeso, itandi kana dinhi, usa ka Selyo ang naablihan. Sa ingon nianang paagi nato ginahisgotan kini, og gapaningkamotan nga mapahayag kining tanan para kaninyo, (nasabtan n'yo ba ang buut kong ipasabot?), kon itugot sa Ginoo.

64 Unsa ba'y unang anaa kanila? Mga kapanahonan sa iglesia. Husto ba kana? Sunod nga butang, ang mensahe para sa mga kapanahonan sa iglesia. Klaro ba kana nga nasabtan sa tanan karon? Kita n'yo?

65 Una, gitun-an nato ang mga kapanahonan sa iglesia, ug nasabtan ang kasaysayan, gihisgotan usab ang mga konseho sa Nicaea ug ang mga konseho sa wala pa ang Nicaea, ug

tanan-tanan nga puede natong mahibaloan sa kasaysayan, ug hingsayran nato nga ang hustong interpretasyon sa Pulong eksakto gayud nga nagakatakdo sa kasaysayan. Ug gihisgotan kini hangtud niini nga panahon, sa niining Laodicea. Ug kamo—dili na ninyo kinahanglan ang kasaysayan niana; tungod nagahimo na kini og kasaysayan karon, kita n'yo. Mao kana. Ug, dayon, gipakita nato kung unsay mamahitabo niini nga kapanahonan.

⁶⁶ Karon gibalikan nato ang Mga Selyo, ug giablihan kana nga Selyo. Giablihan sa Dios kana nga Selyo para kanato. Unsa man kana? Una, adunay usa ka mensahero, kapanahonan sa iglesia; sunod mao ang Pito ka Mga Selyo.

⁶⁷ Karon, hingsayran nato ang kadautan nga miabot sa ikapitong kapanahonan sa iglesia. Apan ang Ikapitong Selyo walay unsa man nga gipahayag, kung unsay mahitabo niini. Kita n'yo? Tungod kay, sa katapusan niana nga kapanahonan sa iglesia moabot man ang usa ka ma-propesiya nga gasa aron ipadayag kining mga butanga. Kita n'yo? Ginasundan ba ninyo kini? [Nagaingon ang kongregasyon, "Amen."—Ed.] Okey. Karon matikdi kung unsa nga ang matag usa nianang Mga Selyo. . .

⁶⁸ Dayon midangat ako dinhi, sa nianang tulo ka pangutana nga gipangutana kang Jesus Cristo, "Unsa, kanus-a man kining mga butanga mahitabo nga, 'Wala na'y mahibilin nga usa ka bato ibabaw sa usa pa'? Kanus-a man kini pagatumpagon, kining sentro sa relihiyon sa kalibutan, ug ang usa pa nga pagatukoron? Kita n'yo, kanus-a man kini mamahitabo?" Ang pagpangabayayo mismo sa anticristo! Kita n'yo? Ug unsa man ang mitungha aron moatubang niini? Ang Pulong, ang Pulong batok sa pulong.

⁶⁹ Dayon milambo kini sa pulitika ug tanan nang uban pa, ug dinha mitungha ang laking-baka sa pagpangabudlay. Kita n'yo? Eksaktong mao kana ang ikaduha dinhi. Ug mao kana'y giingon ni Jesus, sa Mateo 24, kita n'yo. Dayon migikan kita niana, paingon ngadto sa pagkamaalamon sa mga reformador, og mitungha ang Mananap sa pormang-tawo aron tagboon kini. Mao kana'y nahitabo. Dayon miadto kita, sa sunod, ngadto sa Ikaupat nga Selyo, sa diha nga ang anticristo nahimo nang usa ka pundok sa nagkalain-laing matang, ug nagkaadunay ngalan nga, "Kamatayon."

⁷⁰ Karon matikdi kung unsay gisulti ni Jesus, "Ug igatambog niya siya ngadto sa kalayo, ug pagapatyon bisan ang iyang mga anak." Mao kana ang kamatayon, nga nagapangabayayo. Pareho kanang Protestante ug Katoliko, nga may marka sa kamatayon diha sa matag usa kanila. Kita n'yo, "Siya ug ang iyang mga anak pagalaglagon." Busa kung nagasalig kamo sa inyong denominasyon, mas maayo pang manghawa na kamo gikan niana karon mismo.

71 Ug dayon pag-abot na sa Ikapitong Selyo, mihunong si Jesus dinha mismo. Giablihan Niya ang Ikaunom nga Selyo, sa pagsulti, “Ang bulan mamahimong dugo, ug kangitngit ug tanan na.” Mamahitabo kining mga butanga. Miabot kita dinhi mismo ug giablihan ang Ikaunom nga Selyo. Human nga naablihan ang Ikaunom nga Selyo, dayon mibalik kita ug gipakita ang mao rang butang.

72 Mao kana, nga ang tulo ka nagkalainlaing bahin diha sa Kasulatan, gisumpay-sumpay sila nga nagakatakdo pinaagi sa kapadayagan. Kita n’yo? Matikdi. Ang bahin nga gisulti ni Jesus ang ingon-niana; ang bahin nga sa dihang giablihan Niya ang Basahon, natago na kana gikan pa sa pagkatukod sa kalibutan; ug dayon tungod sa kapadayagan sa niini nga adlaw dinhi, gipahimutang kini mismo dinha, og gisumpay-sumpay nga nagakatakdo ang maong tulo. Ug ang numerong tulo usa ka pagpamatuod. Busa, tinuod kana. Kana’y tinuod gayud.

73 Karon, kining mga dalagang ulay nga ania dinhi, sila mao ang mga nahikatulog, ug dayon kini nga pundok mao’y naglangkob sa tibuok lawas. Kana mao’y magalangkob sa . . . kita n’yo, nga magalangkob sa—sa maalam nga mga dalagang ulay. Ug ang dili-maalam nga mga dalagang ulay nanagpamalik didto sa mao rang higayon nga ang maalam nga mga dalagang ulay nangadto na, anticristo, ug sila usab mao ang mga nanagsulay nga mopalit og Lana.

74 Karon tan-awa lang dinhi ug tan-awa kung unsa gayud ka hingpit, bisan asa man kamo motan-aw. Kung padayon lang akong motindog dinhi ug isulti kaninyo ang mga butang nga napadayag sulod niana nga lawak, sultihan ko kamo, makurat gayud kamo niini. Apan unsaon mo man pagbuhat niini, nga dinhi pa lang puno ka na?

75 Ug dayon, sa unsa mang paagi, pag nahilayo ka na gikan sa mga tawo, nan dinha sugod nga nagaabli ang mga tinago. Dayon makita mo ang mga butang nga dili mo basta-basta lang nga isulti sa mga tawo, usab. Tungod, nakita n’yo, kung isulti mo man gud, mahimong magpasugod kini kanila nga maghimo og gagmay’ng mga ismo.

76 Ug tan-awa n’yo na lang kung unsay nabuhat niining diyutay’ng gasa sa pagpang-ayo, kung unsa nga gipalibog niini ang iglesia. Ang tanan aduna na’y sensasyon, ang tanan aduna na’y *ingon-niini*; ug sa kinasuloran sa akong kasingkasing, (nasayod ang Dios nga tinuod gyud kini), kahibalo ko nga dili kana husto, tungod mao man kana’y gisulti Niya kanako. Kita n’yo? Apan usa ra kana ka mini nga pagsundog-sundog, aron lang ipasimang ang mga tawo. Karon, husto kana. Karon, apan, nakita n’yo, dili mo gyud basta-basta na lang nga isulti kana nga mga butang. Mas maayo nga dili mo na lang isulti kana.

⁷⁷ Ug nahinumduman n'yo ba ang Ikatulong Pagbira? Miingon Siya, "Ayaw pagsulti kang bisan kinsa." Unsa ba'y gisulti ko bahin niana? Pila ba ang nakahinumdom niana? Oo. Mahinumduman ko, sa dihang atua ko didto, nga ginalistonan ang gamay'ng bangag niadtong akong sapatos, diha sa pananawon? Ingon Siya, "Dili mo matudloan ang Pentecostal nga mga bata og supernatural nga mga butang."

⁷⁸ Ingon ko, "Mao na Kini ang Ikatulong Pagbira, ug dili na Kini mahimong ipahayag, busa tabangan unta ako, pinaagi sa grasya sa Dios."

Karon—karon, kita'y—ania na kita mismo sa katapusang panahon karon. Dili na magdugay pa nga ang Lingkoranan sa Kalooy mamahimo nang Lingkoranan sa Paghukom. Samtang makita pa ninyo kining mga butanga nga nagakahitabo, ug kining mga tawo nga nagasulod, mas maayo pang manulod na kamo, usab, kung wala pa man kamo nakasulod. Kita n'yo?

⁷⁹ Karon, "Nagkatigum sa Langitnong mga dapit," kita n'yo, nagakahulogan usab kini og labaw pa kay sa pagkalipay mismo. "Sa Langitnong mga dapit," kung nagkatigum gayud kamo diha kang Cristo, usa kana ka makahahadlok nga butang.

⁸⁰ Ang pagtindog tupad sa . . . nianang Manulonda sa Gino, sa hunahuna n'yo ba kamo'y magasinggit ug magahugyaw lamang. Kana, dili kana ingon-niana. Mamatay gyud kamo sa kahadlok, halos. Kita n'yo? Busa, nakita n'yo, aduna—aduna gayu'y kalahian sa pagkalipay ug pagsayaw-sayaw lamang, nga okey lang man, ug ang pagkaadto mismo ngadto sa tinuod nga butang. Kita n'yo? Kita n'yo? Dinha ang kahadlok. Usa kana ka makahahadlok nga butang. Dili ingon nga nahadlok ka kay malaglag ka; kondili tungod kay anaa ka mismo atubangan sa langitnong Linalang, ug sa Espiritu Santo Mismo nga katapad nimo.

⁸¹ Karon, mamahimo kanang kabahin sa Pangasaw-onon. Mao kana ang magalangkob niana, kita n'yo, ang tanan niadtong mga nangatulog. Ug dili pa nato bug-os nga makita . . .

[Nahunong ang pagrekord og teyp. Blangko nga bahin sa teyp—Ed.] . . . ginaampo karon nga ihatag Mo ang kaayohan sa mga tawo, pinaagi niining mga panyo, nga ginapandongan. Sa Ngalan ni Jesus. Amen.

Karon, okey na ba? [Nagaingon ang mga kaigsoonan, "Amen."—Ed.] Salamat. Aduna ba'y nakatamak sa kung unsa? [Nagaingon ang usa ka igsoong lalaki, "Daghan man gud kaayo og mga rekorder ang nakasaksak nianang linya."] Ang daghan kaayo nga mga rekorder ang naghinungdan og grabe nga presyur niana. Kita n'yo? Sige, ibaylo na lang. Pagkuha na lang og usa ka teyp ug bayloi ang maong teyp, ug dinha na lang pagsugod og teyp. Karon, matikdi karon ang sunod nga pangutana.

174. Kinahanglan bang magpadayon ang mga ebanghelista diha sa natad sa pagpang-misyon?

⁸² “Sa niini nga panahon,” siyempre, mao kana’y katuyoan nila. Oo, sigurado gayud. Ayaw gyud pag-usab ni usa ka butang. Kung moabot man si Jesus karong buntaga, nan pagwali ingon nga daw sa napulo pa ka tuig gikan karon, apan pagkinabuhi nga daw sa mao na kini ang takna.

⁸³ Ayaw—ayaw na kamo pagduhaduha karon. Mao kana’y ginapaningkamotan kong ipasidaan kaninyo, kita n’yo. Ayaw gayud kamo magpakasalikwaut, og magpakalahi. Ayaw pag-usab og bisan unsa. Apan kung nagabuhat man kamo og sayup o nagabuhat og dautan, nan paghinulsol, kita n’yo, og pagbalik sa Dios. Padayona ninyo ang inyong pang-ebanghelyo nga buluhaton maingon nga dugay na ninyong ginabuhat.

⁸⁴ Kung nagatukod kamo og balay, padayon lang sa pagpatukod niana. Kung moabot man si Jesus ugma, siguradoha nga makaplagaan kang maunongon sa imong katungdanan. Kung nagatukod ka usab og simbahan, padayon lang, sa pagpatukod niana. Mas gustohon ko pang gustohon ang akong kuwarta sa usa ka butang nga sama niana, kay sa makaplagaan kini nga anaa ra sa akong bulsa. Kita n’yo?

⁸⁵ Busa magpadayon lang—gayud, magpadayon lang kung unsa kamo. Nakasabot ba ang tanan karon? [Nagaingon ang kongregasyon, “Amen.”—Ed.] Magpadayon lang, ug magpadayon mismo sa kung unsa kamo. Karon, basta—ayaw gyud pag-undang. Ayaw pagbuhat og unsa man... Padayon lamang sa kung unsa kamo. Padayon lang sa pag-alagad sa Ginoo.

⁸⁶ Karon, pananglitan, kung ikaw—kung nagatrabaho ka para sa usa ka tawo, ug nasayod ka nga may kinse minutos pa sa dili pa ang oras sa pag-undang. “Bueno,” moingon ka, “uh, aduna na lang og kinse minutos, busa tingali puede na kong moadto didto ug molingkod na.” Puede baya ibanan ang imong suweldo tungod nianang kinse minutos.

⁸⁷ Kung nagatanum ka man og trigo; itanum ra ang imong trigo. Kon nagakalot ka man og patatas; padayon lang, sa pagkalot niana. Moingon, “Bueno, wala na ma’y mokaon niana?” Wala kana’y diperensiya. Pagkalot lang, gihapon. Kita n’yo? Oo. Padayon lang sa kung unsa’y imong ginabuhat.

⁸⁸ Nakadawat ako og sulat gikan sa usa ka tawo niadtong miaging adlaw. Aduna kono’y nagsulti kanila, miingon, “Bueno, haduol na man ang panahon. Ibaligya na ang umahan. Dili na man ninyo kinahanglanon ang pagkaon nga gipanginabuhian ninyo gikan sa, sa maong umahan,” miingon, “tungod magasugod na kining Milenyum, ug dili na ninyo kinahanglanon kana. Busa ibaligya n’yo na... Ug sa diha nga nagakahitabo na ang panahon sa Kasakitan, ang inyong mga anak dili man

luwas, busa inyo na lang sila . . . Ibilin—ibilin n'yo lang sa inyong mga anak ang maong umahan, kon diin mapanginabuhian nila kana, apan kung ako lang inyo nang ibaligya ang tanan n'yong umahan," ug—ug, o mora'g ingon niana. Ug, oh, ila kadtong. . .

⁸⁹ Ingon ko, "Oh, grabe!" Kung hingsayran ko nga moabot na Siya ugma, ug usa ako ka mag-uuma, mananum gihapon ako karon. Oo. Kung gihimo man Niya akong usa ka mag-uuma, nan magpabilin ko mismo sa akong katungdanan. Husto kana. Kung gihimo pud Niya akong usa ka mekaniko, may miingon man. . .

⁹⁰ Adunay miingon, niadtong miaging adlaw, ingon siya, "Usa ka tawo ang miabot ug miingon, 'Oy, igsoon, kabalo ba ka kung unsa?' Ingon siya, 'Thatag ko kanimo ang ikaduhang pares sa mga yawi. Nagpalit man gud ko og bag-ong sakyanan.' Ingon siya, 'Thatag ko na kanimo ang ikaduhang pares sa maong mga yawi,' giingnan niya ang iyang pastor. Miingon, 'Thatag ko na kanimo ang ikaduhang pares sa mga yawi, kay tingali'g moabot na ang Pagsakgaw, kabalo na ka, ug,' miingon, 'Dili ko na kinahanglanon pa kana.'" Basin dili man gud kono maapil ang pastor, nakita n'yo. Oh! Ingon niana ang pagpangandam, dili ba? Oo. Apan bisan pa nga ingon niana—nga ingon niana kana, kita n'yo, dili gyud kita angay'ng mamahimong ingon niana.

⁹¹ Kinahanglan mamahimo kitang usa—usa ka may maayong pangisip, og lig-on nga Cristohanon, kita n'yo, tungod gipahimutang ako dinhi aron mamuhat mismo hangtud sa pinakaulahing minuto. Aduna ako'y tahas nga pagabuhaton, ug kinahanglan makaplagaan akong maunongon nga ginabuhat ang mao mismong pangatungdanan. Kung moabot man Siya niining buntaga, gusto kong nagabarug mismo dinhi sa pulpito.

⁹² Moingon mo, "Igsoong Branham, kung moabot man ugaling Siya niining buntaga, dili ba dapat atua man ikaw *didto*?" Dili, sir!

⁹³ Mao kini ang akong katungdanan. Magapabilin akong nagatindog dinhi, nga nagawali, sa diha nga moabot Siya, nga ginasulti ang mao rang mga butang nga akong ginasulti. Dayon, pagmoabot na Siya, mouban na ako mismo Kaniya, kita n'yo.

⁹⁴ Kung nagakalat man ako og mga patatas, padayon akong magakalat, kutob sa akong mahimo. Pagmoabot na Siya, buy-an ko na ang guna ug mokayab na.

Mahinumduman ba ninyo diha sa tuig sa jubileo? Kung nagapang—nagapangsarol man sila, padayon lang sila nga mangsarol. Hingsayran nila nga ang tuig sa jubileo tingali'g dies minutos pa, ug motingog na ang trumpeta sa tuig sa jubileo. Nagapadayon lang sila sa pagkahig og mga dagami, og kung unsa man ang ginabuhat nila. Apan sa dihang motingog na ang trumpeta, nan ibutang na nila ang pangkahig, ug mobiya na. Kita n'yo? Ingon niana, padayon lang sa pagkahig og mga dagami hangtud nga motingog na ang trumpeta. Oo.

[Adunay kabanha nga nadungog gikan sa kung unsa nga anaa sa duol—Ed.] Pangutana, “Sumala sa pag-abli. . .” Kana ba. . .? Aduna ba’y nahitabo? Huh? Kana—naghinungdan kana og kabanha dinhi. Usa ka pangutana:

175. Sumala sa pag-abli sa Ikalimang—Ikalimang Selyo, si Moises ug si Elias kinahanglan—kinahanglan nga mamatay. Unsa man usab si Enoch?

⁹⁵ Wala ako mahibalo. Kita n’yo? Ako—ako. . . Kung wala ako kahibalo, sultihan ko kamo mismo nga wala ako kahibalo. Kita n’yo? Ako—wala ako—wala man ako kahibalo sa tanang mga tubag, mga higala. Ako—wala ako mahibalo. Ug kung wala man ko kahibalo, nan sultihan ko kamo nga wala ako kahibalo. Kung hingbaloan ko man. . . Dili ko usab isulti kaninyo hangtud nga mahibaloan ko gayud, kita n’yo. Apan ako—wala gyud ko kahibalo.

⁹⁶ Kanunay ko usab nga gihunahuna ang mahitungod niana, ako mismo. Atua si Enoch. . . Nakita ko si Moises nga miabot, ug si Elias nga mibalik, ug gipamatay sila, kita n’yo, apan si Enoch kaniadto gilalin man sa wala pa ang iyang panahon. Kanunay kong naghunahuna, ug nahibulong, ako mismo, “Bueno, unsa, unsa kaha kana?”

⁹⁷ Apan, bisan pa man, ania ang bugtong kahupayan nga akong maikasulti, mao kini. Karon matikdi, si Moises nag-alagad sa Dios sulod lamang sa kuwarenta ka tuig. Kita n’yo? Siya’y—siya’y usa ka gatus ug baynte anyos kaniadto. Apan baynte ka tuig. . . Sa unang kuwarenta ka tuig, ang buut kong ipasabot, nag-angkon siya og iyang edukasyon. Husto ba kana? Sa ikaduhang kuwarenta ka tuig, giwangtang kadto sa Dios gikan kaniya. Ug sa ikatulong kuwarenta ka tuig, gialagaran na niya ang Dios. Kita n’yo? Oo. Apan si Enoch nagkinabuhi sa atubangan sa Dios sulod sa lima ka gatus ka tuig, ug walay-ikasaway kaniya. Kita n’yo? Kita n’yo? Busa, mibalik si Moises aron mag-alagad og dugang pa nga panahon; siya ug si Elias.

⁹⁸ Karon, kana, wala ko ginaingon nga husto kana, kita n’yo. Ginahatag ko lang kana kaninyo ingon nga usa ka hunahuna, kita n’yo. Apan ang isulti ko kung unsa gyud pag bahin na niana, wala ako mahibalo. Dili ko mismo masulti kaninyo kung unsay—kung unsay nahitabo kaniadto, o kung unsa ma’y buhaton sa Dios.

176. Unsa man nga—nga ngalan ang. . . nga maanaa sa mga tawo sa Pinadayag 3:12?

⁹⁹ Ako—wala ako kahibalo. Oo. Miingon Siya, “Hatagan sila og usa ka bag-ong ngalan.” Ako—ako—wala ako kahibalo kung unsa man kana, kita n’yo. Tingali’g maipahayag ra kana pagmoabot na kita dinha, apan ako—wala ako mahibalo kung unsa man kana sa karon, kita n’yo. Kita n’yo, igapahayag Niya

kana. Kita n'yo? Hatagan Niya sila og usa ka bag-ong ngalan nga—nga sila lamang ang nakahibalo, mismo. Kita n'yo?

177. Karon, Igsoong Branham, aduna ba'y unsa man nga Kasulatan nga nagapahanugot og pagminyo human sa diborsiyo? Importante kaayo kini.

¹⁰⁰ Ginaingon niini, “Importante.” Bueno, mao kana'y hinungdan. . . Wala kini nagapahinugod bahin niini. Kutob sa akong nahibaloan, igsoon kong lalaki, o igsoong babaye, kung kinsa man tingali kini, wala gyu'y, gawas lang kon ang imong kauban patay na. Tungod kay, miingon ang Biblia, “Nabugkos kita ngadto kanila samtang nga nagapabilin sila nga buhi.” Kita n'yo?

¹⁰¹ Busa, kung—kung hisgotan ang “unsa man nga Kasulatan?” Mao man kana'y gipangutana dinhi, “Aduna ba'y Kasulatan?” Kita n'yo? “Aduna ba'y unsa man nga Kasulatan?” Wala ako'y makita, kita n'yo, wala ako'y makita.

Tungod, ang giingon ni Pablo nga ang—ang kasado nga magtiayon, “Kung ang kauban patay na, nan kung ingon-ana sila'y gawasnon na nga makigminyo sa kung kinsa man nga gusto nila diha sa Ginoo.” Apan hangtud niana, apan, matikdi, gisaad ninyo kini, “Hangtud nga pagabulagon kita sa kamatayon.” Mao kana. Gipanumpaang ninyo kana, nakita n'yo.

¹⁰² Busa, sa hunahuna ko wala gyud sa tan-aw ko. Karon, kung adunay. . . Kung aduna mo'y makita nga usa, ug husto mismo, aba, okey—okey ra kana. Apan, kung ako lang, ako—wala ako'y unsa man nga hingkaplagan.

178. Unsa ba'y buut ipasabot sa “ayaw pag-unsaa ang lana ug ang bino”, diha sa Pinadayag 6:6?

¹⁰³ Ang Balaang Espiritu kana. Kita n'yo? Bag-ohay ra kitang nahuman niana. Siguro may usa ka tawo, kabalo na mo, nga pagsulod niya medyo ulahi na para sa maong Mensahe, sila. . . bueno, para sa uban pang mga teyp usab, nakita n'yo.

“Ayaw pag-unsaa ang lana ug ang bino.” Unsa ba'y pasabot sa lana ug bino?

¹⁰⁴ Ang Lana, sumala sa atong pagsimbolo niini, nagakahulogan og Balaang Espiritu. Kita n'yo? Ang bino mao ang. . . ug lana, konektado sa usa'g usa, diha sa Biblia, sa pagsimba. Kita n'yo? Ug ang bino, ingon sa atong paghulagway, dinha ko nakuha ang ideya, “Ang kadasig.” Nagapadasig ang bino. Ug ang bino, sa—sa anti-tipo niini diha sa natural, ang kadasig, tungod sa kapadayagan.

¹⁰⁵ Karon hunahunaa lang. Unsa man ang nagapadasig sa Iglesia? Ang kapadayagan. Kita n'yo? Busa, ang bino, ang bag-ong bino, mao'y mamahimong. . . Karon matikdi. Ang lana ug bino magkauban kana, diha sa paghalad; magkauban, sa—sa

pagsimba sa iglesia. Karon matikdi, magkauban nga simbolo, konektado sa usa'g usa.

¹⁰⁶ Kung aduna kamo'y concordance, tan-awa ug makita ninyo ang tibuok listahan diin magkauban ang bino ug lana sa pagsimba. Kung aduna kamo og—og iya ni Cruden, aba, ginasulti kana mismo dinha.

¹⁰⁷ Karon matikdi kini. Apan karon, nakita n'yo, ang lana mao sa kanunay ang Balaang Espiritu. Hingsayran nato kana diha sa Ezekiel. Ug makita nato kana sa Daang Tugon. Makita pud nato kana sa kinatibuk-an sa Bag-ong Tugon.

¹⁰⁸ Nganong ginahaplasan man nato ang mga masakiton og lana? Ginahaplasan nato ang masakiton og lana tungod kay nagasimbolo man kana sa pagbubo sa Balaang Espiritu diha kanila. Kita n'yo? Usab, ang maalam nga dalagang ulay adunay Lana; ang dili-maalam walay Lana, Espiritu, kita n'yo. Karon, mao kana ang Lana. Ug dayon ang bino, kana—kana'y. . . Kung ang lana nagarepresentar, nagarepresentar sa Dios. Ang Dios Espiritu. Kita n'yo?

¹⁰⁹ Ang Dios mao ang Pulong. “Sa sinugdan mao na ang Pulong; ang Pulong kauban sa Dios. Ang Pulong nahimong unod, ug mao kana ang Dios.” Karon, kung ingon-ana, kung ang Pulong karon diha sa . . . dinhi sa usa ka natural nga porma, ang bino mao ang tubig nga sama, niana, o ang kapadayagan nga nagapadayag nianang interpretasyon sa Pulong, nga mao'y nagapadasig sa magtotoo, nakita n'yo. Aba, moingon mismo sila, “Wala ko pa gayud Kini nakita kaniadto! Grabe! Himaya!” Unsa man kana? Kita n'yo, kadasig, kita n'yo, tungod sa kapadayagan.

¹¹⁰ Wala gyud ko nakahibalo niana hangtud niadtong miaging adlaw lang, sa paglingkod ko didto, usab. Kita n'yo? Karon, kana'y, “Unsa man ang lana ug bino. . . ?” Kanang, “Siguradoha nga ayaw pag-unsaa.” Ang mangangabayo kadto sa itum nga kabayo. Ug panahon kadto sa mangiub nga kapanahonan, ang ikatulong kapanahonan sa—sa iglesia. Himatikdi. Ug, dinha, “Aduna na lamang og diyutay ang nahibilin Niini, diyutay na lamang, apan ayaw Kini pag-unsaa.”

¹¹¹ Ug gatoo ko nga kung makuha ninyo kana, ang—ang Ikatulong Selyo, diha sa teyp, inyong. . . makita n'yo kana dinha, diin ato na kanang gipatin-aw sa ingon ka detalyado, o ang mga detalye niini, diay.

179. Igsoong Branham, ang Basahon sa Kinabuhi sa Cordero, ug ang Basahon sa Kinabuhi, pareho ra ba nga Basahon?

¹¹² Oo, kita n'yo, tungod dinha nahisulat ang tibuok kaluwasan, sa niini nga Basahon. Kita n'yo? Ang ilang mga ngalan anaa sa. . . Moingon mo, “Bueno, ang among ngalan nahisulat na sa Basahon sa Kinabuhi sa Cordero, Igsoong Branham. Ako—gisulat ko kini, niadtong miaging gabii.” Dili, dili ikaw ang nagsulat. Dili, dili ikaw ang nagsulat. Hingkaplagan mo lang nga

nasulat kini dinha, niadtong miaging gabii, tungod nga . . . kita n'yo, tungod kay ang ilang mga ngalan nahisulat na man sa wala pa ang pagkatukod sa kalibutan. Kita n'yo? Kana, mao ra kana nga Basahon, kita n'yo.

180. Karon, Igsoong Branham, tinuod ba nga—nga ang matag Judio, nga natawo sukad niadtong miabot si Cristo, mamaluwas? Ug si kinsa ba ang usa ka gatus kap-atan ug upat ka libo? Sila ba ang mga gipili-nang-daan nga maselyohan sa Espiritu Santo? Ug unsa ma'y katungdanan nila?

¹¹³ Adunay halos tulo ka pangutana sa usa ra, dinha. Apan, ania, ang pinaka una:

Tinuod—tinuod ba nga ang matag Judio nga natawo sukad nga miabot si Cristo, sa kalibutan, mamaluwas?

¹¹⁴ Dili. Walay mamaluwas, kondili kadto lamang nga ang mga ngalan nahisulat na sa Basahon sa Kinabuhi sa Cordero sa wala pa ang pagkatukod sa kalibutan, Judio man o Gentil. Kita n'yo? Kana lang. Ang Basahon ang nagakupot niana nga misteryo, ug ginapahayag lamang kana sa maong Basahon karon; dili ang ngalan sa matag usa, kondili kung unsa ang misteryo sa Basahon, samtang ginatawag niini kana nga mga ngalan. Sa katapusan nasabtan na ba ninyo kana karon? Kita n'yo?

¹¹⁵ Wala nagaingon ang Basahon, “Bueno, sa niini nga kapanahonan sa iglesia pagaluwason si Lee Vayle, o—o kaha si Orman Neville,” o—o si kinsa man. Dili, dili ingon niana ang ginaingon niini. Ginapakita lamang niini ang misteryo, og ginapadayag ang misteryo sa kung unsa ang maong butang. Apan kita, sa atong mga kaugalingon, pinaagi og pagtoo, nagatoo kita Niini. Mao kana'y gisulti ko niadtong miaging gabii.

¹¹⁶ Adunay miingon, “Bueno, dili ko na diay gikinahanglan nga maningkamot pa. Miingon man si Igsoong Branham nga aduna lang kono og usa ang mamaluwas gikan sa Jeffersonville.” Kita n'yo? Karon, kita n'yo, nagapakita kana og usa ka samingay. Kana—kana—dili kana—kana—dili kana ingon niana. Mahimong linibo ang pagaluwason. Wala ako mahibalo. Nagalaum ko nga unta ang matag usa kanila mamaluwas, kita n'yo, apan wala ako mahibalo.

Apan ingon niini ang gusto kong toohan, “Ako kanang maong usa.” Toohi ninyo ang ingon-niana usab para kaninyo. Kay kung dili ingon niana ang pagtoo mo, nan aduna gyu'y problema sa imong pagtoo; dili pa diay ka sigurado sa kung unsay imong ginabuhat.

¹¹⁷ Unsaon mo—unsaon mo man pagduol atubangan sa kamatayon, kung dili ka pa diay sigurado kon luwas na ka o dili? Kita n'yo? Unsaon mo man sa pag-anhi dinhi ug moingon ngadto niining piang nga lalaki nga nagahigda dinhi, buta ug

baldado, “MAO KINI ANG GINAINGON SA GINOO. Tumindog ka! Giayo ka na ni Jesus Cristo”?

118 Unsaon mo man sa pagbarug, atubangan nianang bugnaw og migahi na nga lawas nga nagbuy-od dinha, nga patay na, ug patay na sulod sa pila na ka mga oras, ug nagbuy-od dinha, nga bugnaw ug migahi na; ug moingon, “MAO KINI ANG GINAINGON SA GINOO, tumindog ka”? Siguradohon mo, kinahanglan nahibalo ka mismo kung unsay imong ginasulti. Kita n’yo?

119 Bueno, moingon ka, “Pag-angkonon na sa kamatayon ang tanan. Wala na.” Oo, apan sa dihang ipadayag ang Pulong sa Dios, ug nasayod ka nga ang Dios kana, nan ginausab niana ang mga butang. Husto kana.

120 Karon, oo, kini nga mga Judio dili . . . Dili tanang mga Judio maluwas. Dili, sir. Dili sila maluwas; kondili kadto lamang mga . . . Pagmaghisgot gani Siya og—og Judio, “Judio,” usa ra kana ka ngalan nga gitawag kanila human nga ningbiya sila . . . nagatoo ko nga, si Nabucodonosor, kadto, ang nagsugod sa pagtawag kanila nga “Judio,” kaniadto, tungod sa banay ni Juda nga gibihag paingon didto. Ug gihatagan sila og usa ka ngalan nga “Judio,” kaniadto, tungod kay naggikan man sila sa Judaea, ug didto nila nakuha ang ngalan nga Judio.

121 Apan, karon, lahi pud ang Israel. Ang Israel, ug Judio, magkalahi kini. Ang matag Judio—ang matag Judio dili man Israelinhon, kita n’yo. Dili, usa lamang siya ka Judio. Apan, kaniadto, ang Israel . . . wala gayud miingon si Pablo nga ang tanang mga Judio maluwas. Ang ingon niya, “Ang tibuok Israel maluwas.” Ngano man? Ang ngalan nga Israel, kana’y—mao kana’y ngalan sa katubsanan, gikan pa sa sinugdanan. Kita n’yo? Ug ang tibuok Israel pagaluwason, apan dili ang tibuok Judaea—dili ang Judaismo. Kita n’yo?

122 Sama ra sa mga Gentil, magkaadunay usa ka . . . Aduna ma’y linibo ka pilo nga—nga mga tawo, oo, literal nga minilyon, sa niini nga mga organisasyon, ug nagpatawag sila nga “Cristohanon, iglesia ni Cristo,” ug tanan nang ingon-ana nga mga ngalan. Wala kana nagkahulogan ni unsa man. Wala . . . Wala kana nagapasabot nga mamaluwas sila.

Moingon ang mga tawo, “Karon, kinahanglan mong magpamiyembro sa *ingon-niini* o *ingon-niana*, sa usa ka organisasyon, usa ka inila nga organisasyon. Kung ang imong ngalan wala nakalista sa among listahan, malaglag gyud ka.” Bueno, kulto ang ingon niana. Kita n’yo? Kulto kana. Kita n’yo?

123 Aduna lamang og usa ka paagi nga mamaluwas ka, ug, kana mao’y, “Kini dili sa kabubut-on sa tawo, o kaniya nga nagapaningkamot, kaniya nga . . . Kondili, kana mao ang Dios Nga nagapakita og kalooy.” Ug ang Dios, pinaagi sa Iyang pagkahibalo-nang-daan, nagpili-nang-daan og usa ka Iglesia

para sa Iyang kahimayaan, ug mao kana ang mga mamaluwas. Oo. Karon, ang imong pagtoo nakaangkla gayud Dinha!

¹²⁴ Moingon ka, “Bueno, ang akong pagtoo nakaangkla man Dinha.” Ug tan-awa gani kung unsa nga matang sa kinabuhi ang imong gikinabuhi. Nakita mo nga dili gani ka angayan para Dinha. Sayup ang imong pagka-angkla. Nakaangkla ka sa balas imbis unta nga sa bato. Sa unang balod pa lang mogun-ob na kana. Uh-huh.

¹²⁵ Pag naipadayag ang Pulong diha sa usa ka butang. “Ang akong iglesia wala man nagtudlo Niana!” Nagapakita kana dihadiha mismo nga wala ka nakaangkla sa unsa man nga bato. Nakaangkla ka diay sa balas. Uh-huh. Husto kana. Busa, karon nasabtan na ninyo, ha.

Ug ang usa ka gatus kap-atan ug upat ka libo, sila ba ang mga gipili-nang-daan?

¹²⁶ Oo, sir. Ang Israel kana, ang espirituhanon nga Israel.

¹²⁷ Hunahunaa lang, moabot sila og pila ka milyon didto. Wala lang ko nasayod kung unsa na sila ka daghan didto karon; siguro usa na ka dakung pundok, apan dili man silang tanan mamaluwas tungod lang kay anaa sila sa Judaea. Kita n’yo?

Aduna ba mo’y ideya kung unsa na ka daghan ang atua didto karon? Wala ako mahibalo. Apan sila tingali’g . . . Pagmosugod na kining mosunod nga pagpanglutos . . . Nagakadaghan na sila didto tungod sa . . . Kabalo na mo, aduna ako’y teyp mahitungod kanila, nga akong dalhon sa kasadpan ngadto—ngadto sa usa sa—sa—sa iglesiang Covenant nga anaa sa . . .

¹²⁸ Kana’y ang karaang . . . Oh, nahikalimtan ko na karon. Kini ang nagpasugod sa . . . Aduna sila niana didto sa Africa. Dutch Reform. Mao kana ang iglesiang Dutch Reform, ang Covenant. Karon, kung aduna man kaninyo ang ania dinhi, sultihan ko kamo kon ngano. Nagatoo man gud gihapon kamo nianang karaan na nga Katekismong Heidelberg, ug eksaktong mao gyud kana ang hinungdan nga anaa gihapon kamo sa . . . sa Dutch Reform gihapon. Busa, tingali’g nagpahimo ra kamo nga moderno pinaagi sa usa ka Amerikanong ngalan. Kana’y—mao kana sa gihapon ang anaa sa luyo niana, tungod nga nagapanudlo man kamo gikan nianang mao gihapon nga katekismo, ang karaang Heidelberg. Pangutan-a n’yo ang inyong pastor kung dili ba kana husto. Kita n’yo? Busa, karon, himatikdi kini.

Ang usa ka gatus kap-atan ug upat ka libo, sila ba ang mga gipili-nang-daan nga maselyohan sa Espiritu Santo?

¹²⁹ Oo, sir. Eksakto gyud kana. Oo. Karon kung adunay unsa mang . . . Karon kung ako’y . . .

Kung wala ko man natubag, nga uyon diha kaninyo, aba, siguro ako’y . . . mahimong nasayup ako, kita n’yo. Apan, kini,

mao na kini ang kutob sa akong nahibaloan, nakita n'yo. Mao kini ang kutob sa akong nahibaloan.

181. Igsoong Branham, sumala sa imong paghisgot o pag-... mahitungod sa binhi sa serpente... (Uh-oh, wala ko gayud namatikdan kining usa. Nakalusot ra kining usa kanako.)... **binhi sa serpente niining semanaha, angay lang ba nga ipangutana ko kini nga pangutana? Gihangyo man gud ko sa akong mga higala nga isaysay ang Genesis 4:1, ug dili man ko makasaysay. Mahimo mo ba akong tabangan?**

¹³⁰ Kini'y—wala na kini sa hilisgotanan. Apan, bisan pa man, akong—akong—paningkamotan ko kutob sa akong mahimo, pinaagi sa tabang sa Dios. Atong tan-awon karon. Klarohon ko una, sa makadiyut lang. Sa hunahuna ko dinha kana kon diin miingon si Eva, “Nakabaton ako og usa ka anak nga lalaki gikan sa Ginoo.” Ako—nagatoo ko nga mao kana. Sa hunahuna ko ingon niana ang gisulti ni Eva dinha. Akong susihon, aron makasigurado gayud.

¹³¹ Tungod, nakasulti man gud ko, niadtong miaging gabii, og pito... imbis nga... pito ka gatus imbis nga pito ka libo. Ug nagpanerbiyos kini kanako, kita n'yo, ug mao nga kinahanglan ninyong magbantay usab. Ug ang kaaway anaa pirme sa imong kilid, ug kamo—nasayod kamo niana, nakita n'yo. Oo, mao kana.

Ug giila ni Adan si Eva nga iyang asawa; ug nanamkon siya, ug nag-anak kang Cain, ug miingon, nakabaton ako og usa ka lalaki gikan sa Ginoo.

¹³² Karon, tubagon ko lang ikaw sa usa ka pangutana, igsoon kong lalaki, o igsoong babaye. Ug karon, hinumdumi, dili—dili ingon nga pagpangdaut kaninyo, dili. Nagapaningkamot kong tabangan kamo, kita n'yo. Gihigugma ko kamo, ug gihigugma ko ang maong tawo nga tingali'g dugay nang kritiko mahitungod niini. Apan wala ko nagahunahuna nga ang tuyo niining tawo manaway. Ingon sila, “Tabangi ako,” kita n'yo, tungod kay ang mga tawo nagatoo man niini, apan wala lang gayud sila napahayagan og ayo, sa Espiritu, aron mahibaloan kung unsay isulti sa maong tawo nga nagapangutana niini kanila.

¹³³ Karon, ginaingon niya dinhi kung unsa ang pangutana, walay pagduhaduha, nga ginaingon nilang, “Miingon man gud si Eva nga nakabaton siya niini nga lalaki gikan sa Ginoo.”

¹³⁴ Sa hunahuna n'yo unsaon man pagtungha sa kinabuhi kung dili kana nagagikan sa Ginoo, dili igsapayan kung kini man husto o sayup? Si kinsa—si kinsa ba'y nagpadala kang Judas Iscariote sa kalibutan? Sultihi ko niana. Miingon ang Biblia nga gipakatawo siya ingon nga “anak sa kalaglagan.” Ipangutana n'yo kana kanila; dili igsapayan kung kini man ulod diha sa lemon, kita n'yo. Kita n'yo? Karon, nakita n'yo, dili nila mahimong—dili mahimong... Mao kana.

135 Matikdi, kung ingon-ana, kung gusto n'yong gamitan sila og usa pa ka diyutay'ng taktika. Tan-awa. Nagsulti si Eva dinhi, kung gusto n'yong sabton kini sa pinulongan nga ania dinhi, nga gikasulat aron ililong kini gikan sa mata, sa mga makinaadmanon ug mga masinabuton. Si Eva, dinhi, sa paagi nga gikatudlo kini, nga ang Dios kono Mao ang gigikanan niini nga anak. Ug Siya'y usa man ka Espiritu, ug dili mamahimo kana. Kita n'yo? Karon matikdi dinhi, kung gusto n'yong matikdan kana. "Nakabaton ako og usa—usa ka lalaki gikan sa Ginoo." Kita n'yo, dili n'yo mamahimo kana nga mora'g unsa mang. . . Kondili kinahanglan aduna gyud kana og hustong interpretasyon, kita n'yo. Oo, sir. Dili sir, kung ingon-niana man, nan ang espiritu. . .

136 Ug kanunay baya natong gipanunod ang kinaiyahan sa atong ginikanan. Nasayod kamo niana. Tan-awa ang maong bata, ang kinaiyahan niini. Bueno, kung ingon-ana nga, si Adan usa ka anak nga lalaki sa Dios; si Eva usab usa ka anak nga babaye sa Dios; oo, ang unang linalang sa paglalang sa Dios, nga wala gyu'y ni usa ka tipik sa—sa kadautan bisan asa. Wala pa man gani hiilhi ang kadautan kaniadto.

137 Kung ingon-ana nganong bakakon man si Cain, usa ka mamumuno, ug tanang uban pa? Hain man kana nagagikan? Ipangutana lang ninyo kana nga pangutana sa inyong mga kaugalingon. Ang binhi mismo kadto sa serpente. Kita n'yo? Dili ba ingon niana ang ginaingon sa Biblia? Matikdi n'yo ang iyang binhi hangtud karon. Diha niana, nahimo siyang. . .

138 Kang kinsa bang panag-iya ang kalibutan? Sa yawa. Kinsa ba ang nagakontrolar niini karon? Ang yawa. Husto gayud. Ginakontrolar sa yawa ang kalibutan. Ngani giingnan niya si Jesus, miingon, "Kita Mo kung unsa kini katahum, ang tanang kahimayaan niini? Ihatag ko kini Kanimo kung Imo akong simbahon." Kita n'yo, siya mao ang tig-kontrolar niini. Karon panag-iya niya kini.

139 Karon matikdi, manggialamon ang iyang mga anak; ang mga anak sa yawa. O, tan-awa ang mga anak ni Cain, kung gusto ninyo, ug subaya kana diha sa mga kagikanan, ug mahibaloan gyud ninyo nga sila diay mga maantigo nga mga tawo, ang matag usa kanila.

140 Apan sa dihang gipatay niya si Abel; ug gihatag sa Dios si Seth ingon nga kapuli, nga usa ka tipo sa matarung, nga tubusonon; nga bisan patay na, gibanhaw. Ug gikan dinha. . . Karon matikdi. Dili gikan sa unang binhi, nga natural; namatay sila. Karon bukas ba ang inyong mga hunahuna? Kita n'yo? [Nagaingon ang kongregasyon, "Amen."—Ed.] Ang unang binhi, sa natural nga binhi, ingon nga maayo gayud, gitipo niini ang modernong iglesia, si Abel. Aron mapreserba kana nga kaliwat hangtud-hangtud, namatay kanang usa aron may usa pa nga

motungha, nakita n'yo. Busa, kinahanglan nga matawo kana, pag-usab. Nasabtan n'yo ba kini? [“Amen.”] Maayo, aron nga masabtan gyud ninyo kini, kita n'yo. Kita n'yo?

141 Mao kana, ang hingpit nga tipo. Busa bisan ang natural nga tawo, nga gipanganak ni—ni Adan, nga iyang amahan, nagapakita og ingon nianang natural nga kahilig. Dili kana magpulos; tungod dili man masabtan sa natural nga tawo ang mga butang nga iya sa Dios. Busa adunay usa ka Tawo nga miabot diha sa natural, ug namatay, aron maibalik kana pag-usab; ug nga girepresentar diha sa kamatayon ni—ni—ni Abel, ug sa pagpuli ni—ni Seth.

142 Ug matikdi kung unsa kana nga matang sa mga tawo, kaniadto, ang espiritu nga nagbunga gikan kaniya; mga mapainubsanon, mga mag-uuma, og mga magbalantay-sa-karnero. Matikdi usab kung unsay gibunga niining kaalam sa kalibutan dinhi; maantigo nga mga tawo, mga magtutukod, ug—ug nagahimo'g mga puthaw, ug tanan nang matang sa pagka-intelihente ug mga ingon-niana. Tan-awa kung asa sila nahidangat, kaniadto, didto, ug gilaglag sa Dios ang matag usa kanila, matag usa kanila, ug giluwat ang mga mapainubsanon. Dili ba giingon ni Jesus, diha sa Mateo 5, “Ang mga maaghop magapanunod sa yuta”?

143 Busa, oo, ayaw'g kabalaka. Wala na sila'y puedeng ipangatarungan pa. Kita n'yo? Dili lang gyud sila motoo nga anak kadto ni Cain. Apan aduna man kita'y teyp mahitungod niana, kung gusto n'yong madungog kana nga gisaysay sa detalye. Kita n'yo? Wala gyud, sir.

144 Ug nakita ko nga aduna sila'y usa ka bahin sa mantalaan dinha, diin mapamatud-an na kono karon sa siyensiya nga “Si Eva kono wala gayud mikaon og mansanas. Kondili ang gikaon niya usa kono ka melokoton.” Kita n'yo? Anaa kanako ang maong mantalaan didto sa balay karon, kita n'yo. “Usa kono kadto ka melokoton.” Grabe na—grabe na gyud ka halayo ang mga tawo . . . Usa kana ka karnal nga panghunahuna, kita n'yo.

“Dayon, sa tinuod lang kono, si Moises wala pud kono mitabok sa tubig. Kondili mitabok kono siya sa usa ka dagat sa mga bagakay; gidala ang Israel latas didto hangtud ngadto sa Dead Sea. Adunay usa ka hugpong sa mga bagakay kono didto, usa ka tibuok dagat sa mga bagakay, kon diin ang tubig usa ka higayon kaniadto, mihubas. Ug milaktod ra kono si Moises ug didto kono siya miagi.” Ug gidawat kana sa mga iglesiang Orthodox. Nasayod kamo niana. Gidawat kana sa mga iglesiang Orthodox, nga mao kono kadto ang nahitabo.

145 Oh, grabe, dili ba ninyo makita kanang binhi sa serpente, kanang anticristo, ug ang maong tibuok butang anaa mismo dinha? Sigurado. Oo, sir.

Igsoong Branham, palihog iampo ang akong luoy'ng... (Bueno, usa kini ka hangyo para sa pag-ampo; nasabtan ko kini.) **Iampo ang akong luoy'ng apo, nga naggrabe gayud tungod sa trangkaso. Anaa siya karon sa Riverview Hotel.**

¹⁴⁶ Ginoong Jesus, kining luoy'ng tawo dinhi dili gyud mosulat og ingon niini sa walay kapuslanan lamang. Nakita Ka niya nga bug-os giwagtang ang rheumatic fever sa usa ka batang lalaki niadtong miaging gabii. Nasayod siya nga Ikaw ang gamhanang Dios, ug ginahalad namo ang among mga pag-ampo para nianang batang lalaki. Sa Ngalan ni Jesus Cristo, hinaut nga mamaayo na siya. Amen.

¹⁴⁷ Pag adunay mosulat og unsa man, dili kana ingon nga walay kapuslanan. Sila—sila—aduna sila'y usa ka... Bisan unsa man kana ka yano paminawon para kanato, ug unsa man kana, apan—apan aduna gyu'y usa ka butang luyo niana, nakita n'yo; nianang gining, nianang batang lalaki, og unsa man.

182. Ang Elias ba, nga moabot aron magwali ngadto sa mga Judio, siya ba ang mismong tawo nga nagpuyo sa yuta kaniadto, o siya ba'y mamahimong espiritu lamang ni Elias diha sa ubang tawo?

Karon, kana mao'y, ako—nahadlok ko nga mosulti. Wala man gud ko kabalo. Kita n'yo? Basahon ko kana pag-usab.

Si Elias ba, nga moabot aron magwali ngadto sa mga Judio (oh, oo), siya ba ang mismong tawo nga nagpuyo sa yuta kaniadto, o siya ba'y mamahimong espiritu ni Elias diha sa ubang tawo?

¹⁴⁸ Karon, kung matubag ko kana nga husto, mahimo kong isulti usab kaninyo ang mahitungod kang Enoch, kita n'yo. Apan ako—dili ko mahimo kana, kita n'yo. Ang bugtong butang nga nahibaloan ko mao, lamang, ang ginaingon sa Kasulatan kung unsa'y magakahitabo. Ug karon tingali'g ang... Karon, ako—medyo mas ginatoohan ko... Karon isulti ko kini nga ingon-niini. Ug nanghinaut ko nga ang teyp, ang mga kaigsoonan nga nagapaminaw sa teyp, makasabot unta niini. Mas ginatoohan ko nga mga dinihogang tawo kana, sa ilang espiritu. Tungod kay, kita n'yo, ginaingon niya, “Dili ba... anaa kang Eliseo? Dili ba ang espiritu ni Elias nagpuyo man kang Eliseo?” Kita n'yo, “ang espiritu ni Elias.” Ug gibuhat niya ang mismong mga gibuhat ni Elias, kita n'yo. Busa, ako, kung ako... Apan dili ko makasulti nga husto kana. Ako—wala man ko kahibalo, kita n'yo. Matinudanon ako kaninyo. Wala ako kahibalo.

183. Igsoong Branham, mahimo bang tubagon mo kini para kanako, ang mahitungod sa bautismo? Nagatudlo ang Mateo 28:19, “sa Amahan, Anak, ug Espiritu Santo.” Ug si Pedro, sa Mga Buhat 2:38, “sa Ngalan ni Ginoong Jesus.” Kanus-a ba nahitabo kini nga kausaban sa Mga Buhat sa mga Apostoles? Karon, nagatoo ko, “sa Ginoong Jesus.”

149 Bueno, igsoong lalaki o igsoong babaye, si kinsa man ang nagsulat niini, wala—wala ma’y nahitabo nga kausaban, kita n’yo. Kini. . . Ug si Pedro gibuhat man niya eksakto kung unsay gisulti ni Jesus nga buhaton. Karon, kung aduna ma’y moduol ug moingon, “Gamita ang maong mga titulo sa Amahan, Anak, ug Espiritu Santo,” nan gibuhat nila kung unsay gisulti ni Pedro nga dili angay’ng buhaton, ug kung unsay gisulti ni Jesus nga dili buhaton. Kita n’yo? Karon, miingon si Jesus nga. . .

150 Maghisgot lang—lang ta og diyutay pa, diin, gusto ko lang ipakita kaninyo ang usa ka butang dinhi. Matikdi. Karon matikdi, kung ania ka man dinhi, ang tawong nangutana. Magbutang ko og tulo ka buok nga materyales dinhi. Karon tan-awa. [Ginaplastar ni Igsoong Branham ang tulo ka butang ingon nga mga paghulagway—Ed.] *Kini* ang Amahan, *kini* ang Anak, og *kini* ang Espiritu Santo; ingon nga nagatoo niini ang mga tawong trinitarian, nagatoo nga sila’y tulo ka nagkalainlaing mga indibiduwal. Ginatoohan nila kana. Kita n’yo? Bueno, kung ingon-ana, karon tugoti akong. . .

151 Ug dayon diha sa Mateo 28:19. Miingon si Jesus, “Lumakaw kamo sa tibuk kalibutan, ug iwali ninyo ang Maayong Balita sa tanang binuhat. Siya. . .” Dili diay, pasayloa ko. Nagakutlo ako sa Mga Buhat karon, o sa Mga Buhat 2, diay. Dili, Lucas 24:49, diay ang akong ginakutlo. Miingon Siya. . . Basahon ko kini, aron makuha ko kini, kita n’yo, ug dayon. . . tungod nga niadtong miaging adlaw miingon man gud ko nga pag dili ko. . . gusto kong makasigurado nga makuha ko kini sa husto. Ako—nasayod ko sa maong titulo mahitungod sa kung unsay imong ginaingon dinha, apan gusto ko lang basahon kung unsay gisulti Niya. Magsugod ta sa ika-16 nga bersekulo, sa ika-29. “Ug samtang ang napulo’g usa nanaglingkod sa lamesa, ang. . .”

Ug ang napulog usa. . . nangadto sa Galilea, ngadto sa bukid nga gitudlo kanila ni Jesus.

Ug sa ilang pagkakita kaniya, ilang gisimba siya: apan ang uban nanagduhaduha.

Ug si Jesus miduol ug miingon kanila, nga nagaingon, Ang tanang kagahum sa kalangitan ug sa yuta gikahatag ngadto sa. . . Ang tanang kagahum gikahatag kanako sa kalangitan ug sa yuta.

152 Karon asa na man ang kagahum sa Dios? Asa na man ang Dios? Kung ang tanang kagahum sa Langit, ug ang tanang kagahum nga anaa sa yuta, gikahatag na, nan asa na man ang Dios? Atua Siya, kita n’yo. Kanang nagasulti kaninyo. Oo.

Busa panglakaw kamo, ug panudloan ninyo ang tanang mga nasud, magabautismo kanila sa ngalan sa Amahan, ug sa Anak, ug, dayon, sa Espiritu Santo.

153 Karon ang panglantaw sa trinitarian mahitungod niana, “Ginabautismohan ko ikaw sa ngalan sa Amahan, sa ngalan

sa Anak, sa ngalan sa Espiritu Santo.” Wala man gani kana sa Balaang Kasulatan. Kita n’yo? Ang ingon Niya, “Bautismohan sila sa Ngalan sa Amahan, ug Anak, ug sa. . .” Dili nga. . . magbutang og ngalan sa unahan sa matag usa. Usa ra ka Ngalan! Matikdi dinhi. Wala giingon nga, “Bautismohan sila sa mga ngalan.” N-a-m-e [N-g-a-l-a-n], usa ra ka Ngalan, “Sa Ngalan sa Amahan, Anak, ug Espiritu Santo.” Kita n’yo?

¹⁵⁴ Karon gusto kong pangutan-on kamo. Ang “Amahan” ba usa ka ngalan? [Nagaingon ang kongregasyon, “Dili.”—Ed.] Ang “Anak” ba usa ka ngalan? [“Dili.”] Pila ba ang mga amahan nga ania dinhi? Si kinsa ba kaninyo ang gipangalanan og “Amahan”? Pila ba ang mga anak nga ania dinhi? Pila ba ang mga tawo nga ania dinhi? Kita n’yo? Bueno, si kinsa ba kaninyo ang gipangalanan og “Amahan,” “Anak,” o kaha “Tawo”? Kita n’yo?

¹⁵⁵ Sama sa gisulti sa usa ka babaye usa ka higayon kaniadto, ingon niya, “Igsoong Branham, ang ‘Espiritu Santo’ usa man ka ngalan. Usa man kana ka Persona.”

¹⁵⁶ Ingon ko, “Oo, Sir. Usa pud ko ka persona, apan ang akong ngalan dili man ‘Persona.’ Usa ako ka persona, kita mo. Ang akong ngalan mao si William Branham; apan usa ako ka persona.”

Ang Espiritu Santo usa ka Persona. Ingon niana Kana. Dili kana usa ka ngalan; usa lang kana ka titulo sa Persona sa Dios. Kita n’yo? Usa kana ka titulo sa personalidad sa Dios, kung unsa Siya. Karon—karon kung. . .

¹⁵⁷ Miingon Siya, “Busa panglakaw kamo, ug panudloan ninyo ang tanang mga nasud, magabautismo kanila sa Ngalan sa Amahan, ug sa Anak, sa Espiritu Santo.” Dili nga “sa ngalan sa Amahan, ngalan sa Anak, og ngalan sa Espiritu Santo.” O, dili pud “sa mga *ngalan* sa Amahan, ug sa Anak, sa Espiritu Santo,” kondili, “Sa Ngalan sa Amahan, Anak, ug Espiritu Santo.” Ug kung ang “Amahan, Anak, ug Espiritu Santo” dili man ngalan, nan unsa diay kana?

¹⁵⁸ Pananglitan kung kana ma’y “ngalan,” bueno, asa man niana? Kon gusto ninyong tawgon ang usa kanila nga ngalan, unsa man nga ngalan kana? Kung gusto ninyong tawgon ang maong titulo nga usa ka ngalan, nan unsa man nga ngalan kana, unsa man nga titulo kana ang gusto ninyo sa pagbautismo, ang “Amahan” ba o ang “Anak”? Usa ra kinahanglan, kita n’yo.

Karon moabli kita dinhi sa—sa. . . ug mao kana ang ulahing basahon sa Mateo.

¹⁵⁹ Sama sa kanunay ko na nga paghatag og katin-awan niini. Kung mobasa kamo og usa ka sugilanon sa gugma, ug moingon, “Si Juan ug si Maria nagpuyo na nga malipayon hangtud sa hangtud.” Kita n’yo, tungod wala man kamo—wala man kamo makaila kung kinsa si Juan ug si Maria. Baliki n’yo ang

sinugdanan sa maong sugilanon, og hibaloa kung kinsa ba gyud si Juan ug si Maria. Kita n'yo?

160 Karon ingon-ana usab ang ginahimo ninyo dinhi sa Mateo. Ginabasa n'yo lang ang ulahing bahin niini. Baliki gani ang sinugdanan sa Mateo ug basaha kung unsa ang istorya. Ulahi na man gud kana nga kapitulo sa Mateo, ug ang ulahing mga bersekulo.

161 Sama ra nga mokuha ka og usa ka basahon, ug moingon, “Si John ug si Mary nagpuyo na nga malipayon hangtud sa hangtud. Kana ba’y si John Jones ug—ug si Mary *Ingon niini-ug-ingon niana?* Kana ba’y si . . .? Dili, kana ba’y si John . . .? Kana ba’y si John Henry ug si *Ingon niini-ug-ingon niana?* Kini ba’y si John nga *Kinsa man* ug si *Ingon niinin-ug-ingon niana?*” Dili, wala ka pa mahibalo, nakita n'yo. Ang butang lang nga buhaton, aron makasigurado, baliki ang basahon ug basaha kana. Kita n'yo, dili ka puedeng mokuha og usa lang ka bahin *dinhi*. Kinahanglan mong tipunon ang tibuok butang, aron maporma ang maong hulagway.

162 Karon baliki n'yo ang Mateo, ang unang kapitulo. Ug nagasugod kana ug nagarepresentar sa kagikanan sa maong mga kaliwatan, gikan sa unang kapitulo. Dayon pag-abot na sa ika-18 nga bersekulo, ug giingon, “Karon ang pagkatawo ni Jesus Cristo ingon niini.” Husto ba kana? [Nagaingon ang kongregasyon, “Amen.”—Ed.]

163 Karon aduna ko’y gustong ipangutana kaninyo. Karon paminaw pag-usab. Inyong, isulti ninyo kini. [Ginatudlo ni Igsoong Branham ang kada usa sa tulo ka butang ingon nga mga paghulagway—Ed.] Kinsa man *kini*? Ang Dios nga . . . [Nagaingon ang kongregasyon, “Amahan.”] Ang Dios nga . . . [“Anak.”] Ang Dios nga . . . [“Espiritu Santo.”] Karon si kinsa man *kini*? [“Amahan.”] Si kinsa man *kini*? [“Espiritu Santo.”] Si kinsa man pud *kini*? [“Anak.”] Anak. Okey. Karon nasabtan na nato kini ha. Karon unsa gani inyong gisulti nga *kini* mao ang; Dios nga *Kinsa*? [“Espiritu Santo.”] Ang Espiritu Santo. Oo. Karon, sige.

*Karon ang pagkatawo ni Jesus Cristo ingon niini:
Sa . . . kaslonon pa ang iyang inahan nga si Maria kang
Jose, sa wala pa sila managkatiayon, hingkaplagan siya
nga nanamkon tungod sa . . .*

164 [Nagaingon ang kongregasyon, “Espiritu Santo.”—Ed.] Karon, abi ko ba og miingon mo nga ang Dios mao’y Iyang Amahan. Karon aduna gyu’y sayup dinhi; dili man Siya puedeng magkaaduna og duha ka Amahan. Nasayod kamo niana. Kita n'yo? Karon aduna gyu’y sayup. Karon si kinsa man niini nga mga Lalaki, kung sila ma’y tulo ka mga Persona, si kinsa man Kanila ang Iyang Amahan? Klarong nagaingon ang Biblia dinhi, nga, “Hingkaplagan siya nga nanamkon tungod sa Espiritu

Santo,” nan walay unsa man nga kahilambigitan ang Dios nga Amahan niana. Ug miingon man si Jesus nga ang Dios mao’y Iyang Amahan, ug nasayod kita nga ang Dios mao’y Iyang Amahan. Kung ingon-niana, aduna diay Siya’y duha ka amahan; karon usa diay siya ka ilehitimo, sigurado gayud. Karon nakita n’yo na kung unsay nadangtan n’yo tungod niana? Karon:

Ug si Jose nga iyang bana, sanglit tawo nga matarung...dili siya buot magpakaulaw kaniya, naghunahuna sa pagbiya kaniya sa tago.

Apan sa nagapalandong siya niining mga butanga, . . .

¹⁶⁵ Hinumdumi, usa siya ka buutan nga tawo, kaniadto. Ug ang kamot sa Ginoo usa ka kamot nga sama sa karon; sila nga mga gipili-nang-daan makasabot gyud niini. Kita n’yo?

Apan sa nagapalandong siya niining mga butanga, ania karon, mipakita ngadto kaniya sa damgo ang usa ka manulonda sa Ginoo, . . .

Nagasunod ba kamo diha sa inyong Biblia? [Nagaingon ang kongregasyon, “Amen.”—Ed.] Okey.

. . .nga nagaingon, Jose, anak ni David, ayaw kahadlok . . . sa pagdawat kang Maria nga imong asawa: kay kanang . . . gipanamkon niya iya sa . . .

¹⁶⁶ “Dios nga Amahan”? Sayup ba ang pagbasa ko niana? [Nagaingon ang kongregasyon, “Oo.”—Ed.] Oo sayup gyud. “Kanang gipanamkon niya,” walay unsa man nga kahilambigitan ang Dios nga Amahan, kana’y iya “sa Espiritu Santo.” Ug karon nasayod kita nga ang Dios mao’y Iyang Amahan. Husto ba kana? [“Amen.”] Busa unsa man kana? Ang Espiritu Santo mao man ang Espiritu sa Dios, siyempre. Karon nasabtan na ninyo kana. Kita n’yo?

¹⁶⁷ Ang Dios nga Amahan ug ang Espiritu Santo mao ra nga Persona, kay kung dili aduna diay Siya’y duha ka amahan. Ug kung ingon-ana unsa—unsa na lang nga matang sa persona ang inyong ginasimba? Unsa na lang nga matang sa Dios ang aduna kamo karon? Kita n’yo? Kita n’yo? Ang Dios nga Espiritu Santo, ug ang Dios nga Amahan, mao ra mismo nga Espiritu.

Ug igaanak niya ang usa ka anak nga lalaki, . . . (kini nga Tawo dinhi) . . . ug pagatawgon mo ang iyang ngalan . . .

Nga unsa? [Nagaingon ang kongregasyon, “JESUS.”—Ed.] “Ang Iyang Ngalan!” [“JESUS.”] Karon timan-i.

. . .ang iyang ngalan JESUS: kay siya magaluwas sa iyang katawhan sa . . . gikan sa ilang mga sala.

Karon kining tanan nahitabo, aron matuman ang gisulti sa Ginoo pinaagi sa propeta, kang kinsa nagaabot ang Pulong, nga nagaingon,

Ania karon, ang usa ka ulay magapanamkon, ug magaanak og usa ka anak nga lalaki, ug ilang... pagatawgon ang iyang ngalan Emmanuel, nga kung hubaron, ang Dios nga kauban nato.

168 Unsa man ang Ngalan sa Dios? Unsa man ang Ngalan sa Amahan, Anak, og Espiritu Santo? [Nagaingon ang kongregasyon, “JESUS.”—Ed.] Miingon ang Biblia nga “JESUS” ang Iyang Ngalan.

Dayon ang tawo nga mianhi dinhi kaniadto naninguha pang debatehan kini, dinhi sa tabernakulo, miingon, “Nalusotan ra ni Igsoong Branham ang tanan niana, apan dili na gyud niya malusotan kining usa.” Miingon, “Dinhi nagapakita kini og tulo ka nagkalainlaing mga persona, sa hingpit, ka eksakto gayud.” Miingon, “Mateo, sa ika-3 nga kapitulo! *Ania* si Juan nga nagatindog, nagawali; *ania* nagaabot ang Anak, nagaduol aron mabautismohan. Miadto Siya sa tubig, gibautismohan ni Juan; og mihaw-as na gikan sa tubig. Ug, ‘Ania karon,’ ‘nabuksan Kaniya ang kalangitan.’ Ug ingon pa, ‘Gikan sa Langit mikunsad ang Espiritu Santo, sama sa usa ka salampati nga nagakunsad. Ug usa ka Tingog gikan sa Langit, ang nagaingon, “Kini mao ang Akong Anak nga hinigugma, nga kaniya...”’ Tulo ka nagkalainlaing mga persona kono, sa usa ra ka higayon mismo.” Oh, grabe!

169 Oo. Nagapakita lang kana nga ang mga tawo nga walay bautismo, ug dili tinawag alang sa katungdanan sa—sa usa—usa ka ministro, wala gayu’y katungod nga maanaa sa pulpito. Husto kana.

Ako—ako—mahimo kong gunitan kana nga tawo, karon, pinaagi sa tabang sa Dios, ug gapuson sila sa ingon ka hugot nga pagkagapus nga mangalipong gyud sila. Tan-awa, dili ko igsapayan kung unsay . . .

Dili, dili ko ginapasabot nga “ako.” Dili kana maayong paminawon. Pasayloa ko. Wala ko kana gituyo, Ginoo. Wala gyud, intawon. Nabati ko nga gitul-id Niya ako tungod niana, kita n’yo, busa wala ko gituyo nga masulti kana sa ingon niana nga paagi. Ako—pasayloa ako. Nagatoo ko nga mahimong ipadayag sa Balaang Espiritu diha niana nga tawo ang unsa man nga tinago. Mas maayo pa kanang paminawon. Hmm.

170 Sama ra kana sa pagpa-tono og usa ka instrumento, pagmakabuhat ka og usa ka butang nga sayup. Ug masulti man ninyo kana, kung usa ka ka Cristohanon, pag nakasulti kamo’g sayup. Dili Niya gusto ang ingon-niana. Kita n’yo, napahimutang usab ako dinha. Kita n’yo? Wala ako’y kahilambigitan, man lang. Ako lamang. . . ayaw ko gayud nga ako ra mismo sa akong kaugalingon o unsa man. Siya lamang, pasagdi nga Siya ang mamuhat. Siya man ang nagapatingog.

Amang ang trumpeta; ngani ang tingog sa luyo niini, mao ang nagahatag og tingog.

171 Karon, tan-awa dinhi. Sayup ang pagsabot sa maong tawo sa Pulong. Kita n'yo, Kini'y . . . Hinumdumi, “Gililong Kini sa mga mata sa mga makinaadmanon ug mga masinabuton; og gipadayag ngadto sa gagmay'ng mga bata.”

Karon, *atua* kanang usa ka Persona, nga si Jesus Cristo, nga nagatindog sa yuta. Karon, ang kalangitan; siyempre, aduna ma'y kawanangan sa itaas. Karon matikdi, “Ug nasaksihan ni Juan. . .”

172 Karon ang ingon nianang tawo, “*Ania* ang Dios nga Amahan; ug *ania* ang Dios nga Espiritu Santo, sama sa usa ka salampati; ug *ania* ang Dios nga Anak; nga nagakahimong tulo ka persona.” Sayup kana.

173 Si Juan, nga nagatindog *didto*, nasayod na nga *kadto* mao ang Cordero. Miingon si Juan, “Nagapamatuod ako, nga nakita ko ang Espiritu sa Dios sama sa usa ka Cordero. . .” *Atua* ang Dios nga Espiritu, sama sa usa ka salampati, ang buot kong ipasabot. Karon pareho kana sa akong nasulti niadtong miaging gabii, nakita n'yo; imbis nga pito ka gatus, pi- . . . Kita n'yo? Ang Espiritu sa Dios! Kini mao ang Cordero *didto*. Ug ang Espiritu sa Dios, ang Salampati, mao ang Dios. “Ang Espiritu sa Dios nagakunsad gikan sa Langit. Ug usa ka Tingog gikan sa Langit, ang nagaingon, ‘Kini mao ang Akong Anak nga hinigugma, nga Kaniya Ako may kalipay nga mopuyo.’”

“Ang tanang kagahum sa Langit ug yuta gikahatag na nganhi sa Akong kamot.” Kita n'yo? Kita n'yo? Kita n'yo? Siya kana. Karon unsa man ang Iyang Ngalan? [Nagaingon ang kongregasyon, “JESUS.”—Ed.] Sigurado gayud. Kita n'yo?

174 Busa, ang teoryang trinatarian, ingon nga may tulo ka nagkalainlaing Dios, paganismo kana! Wala gayud kana gikatudlo sa Biblia. Wala gayud kana gikatudlo sa Mensahe sa leon, kondili gidawat ra kana sa misunod, nga mao ang anticristo. Pangutan-a ang si kinsa man nga gusto ninyo, ang si kinsa mang teologo. Wala gyud kana kaniadto, miabot ra kana tungod sa doktrina sa mga Nicolaita. Mao kana kon nganong anaa na kana sa panahon ni Martin Luther; og nagpadayon kana sa panahon ni John Wesley; ug mipadayon hangtud ngadto sa mga Pentecostal.

175 Sa adlaw nga mitungha ang Pentecostal, aduna sila og “Jesus Only” nga pundok. Karon, sayup kana, usab. Unsaon man ni Jesus sa pagkahimong Iya Mismong Amahan? Kita n'yo? Busa ginapakawalay-kahulogan kana niana.

176 Apan aduna gyu'y moabot nga panahon sa agila. Kita n'yo? Mao kana ang panahon nga pagatul-iron Niini ang tanan nga mga tinago. Kita n'yo?

177 “Amahan, Anak, ug Espiritu Santo” mga titulo lang kana ni Ginoong Jesus Cristo. Matikdi, ang tulo kanila! Ang ingon ni Mateo, “Amahan, Anak, Espiritu Santo.” Ang ingon pud ni Pedro, “Ginoong Jesus Cristo.” Si kinsa man ang Amahan? “Ang Ginoo miingon sa akong Ginoo, ‘Lumingkod Ka sa Akong toong kamot.’” Husto ba kana? Amahan; Anak, Jesus; Espiritu Santo, ang Logos nga migula gikan sa Dios. “Amahan, Anak, Espiritu Santo” bug-os gayud nga tulo ka titulo sa Persona sa Dios nga napadayag diha sa—sa—sa tulo ka nagkalainlaing paagi, o tulo ka kinaiyahan sa Iyang Kaugalingon.

178 Ug aron maiklaro kini, para kang kinsa man nga wala makasabot, mora kini og tulo ka opisina sa mao ra nga Dios. Sa tinuod lang, kini’y tulo ka kinaiyahan sa mao ra nga Dios. Ang Dios nga nagapamuhat sa tulo, ka nagkalainlaing buluhaton; ilalum sa pagka-Amahan, ilalum sa pagka-Anak, og ilalum sa dispensasyon sa Espiritu Santo. Ang Dios nagakahingpit sa tulo. Mahinumduman n’yo ba ang numero sa anticristo, upat? Kita n’yo? Ang Dios nga, “Amahan, Anak, ug Espiritu Santo,” bug-os gayud nga mao si “Ginoong Jesus Cristo.”

179 Pag magbautismo kamo, sa Ngalan ni “Jesus” lamang, sayup kana, ingon-niana lang, “Ginabautismohan ko ikaw sa Ngalan ni Jesus,” sayup gayud kana. Aduna man ko’y daghang kaila nga mga Jesus. Aba, ang mga nasud nga Latin puno mismo nianang, mga Jesus.

180 Apan kini mao si “Ginoong Jesus Cristo,” nga nagasulti sa ingon ka eksakto kon Kinsa Siya.

181 Aduna usab og daghang mga Branham, kung gusto n’yong hisgotan ang mahitungod kanako sa personal, apan ako’y—ako mao ang nag-inusarang William Marrion Branham. Kana—ako kana. Apan daghan man pud og ubang mga William Branham, ug uban pa, sa palibot.

182 Apan klaro kini nga pagtawag sa usa ra ka Persona, sa Ginoong Jesus Cristo, kita n’yo, ang Maong dinihogan. Aduna lamang og Usa kanila. Karon, husto kana.

Busa kung aduna ma’y dugang pa bahin niana, pagsulat mo og usa ka sulat o ingon-niana, o—o usahay pag magatubag na pud ko sa ubang mga pangutana. Gusto kong matubag gyud kining usa pud, aron mahibaloan ko kung mahimo pa ba nato ang pipila niining mga tawong may sakit, mga nagaantus, nga maiampo.

184. Igsoong Branham, kung kini nga pangutana wala—walay kalabutan, walay kalabutan sa...ayaw lang tubaga. (Maayo kini. Ginapasalamatan ko kini.) **Unsa nga mga bata—unsa man nga mga bata ang mahiuban sa Pagsakgaw, kung aduna ma’y gagmay’ng mga bata? Salamat.**

Wala nila sulati og ngalan. Karon, kung wala man ninyo masulati, dili man pud kana kinahanglan.

¹⁸³ Apan, tan-awa. Sa dihang gisulat na sa Dios ang usa ka ngalan diha sa Basahon sa Kinabuhi sa Cordero sa wala pa ang pagkatukod sa kalibutan, wala na gayu'y unsa man nga butang sa kalibutan ang makapanas niana, tungod kay gisulat kana pinaagi sa Dugo ni Cristo. Kini ma'y *ingon-niini* ka daku, *ingon-niana* ka daku, o kaha *ingon-niana* ka daku, o unsa pa man kana, mahiuban gihapon kana. Kita n'yo? Ang tanang mga bata, ang tibuok Iglesia, ang tanan nga anaa sa, sa . . . Dios, pinaagi sa Iyang pagkahibalo-nang-daan.

¹⁸⁴ Bueno, wala kita masayod. Moingon mo, "Igsoong Branham, mapamatud-an mo ba nga anaa pud ka dinha?" Dili, sir. Dili ko mapamatud-an kana. Mahimo akong gamiton sa Dios ingon nga usa ka galamiton alang sa kung unsa man, ug gamiton pud kamo sa mao rang paagi. Apan nagatoo ko, ug pinaagi'g pagtoo, nga luwas ako. Dili pinaagi'g kahibalo nga naluwas ako; kondili pinaagi'g pagtoo! Sa ingon nianang paagi nga maluwas kamo. Sa ingon nianang paagi nga kitang tanan maluwas.

¹⁸⁵ Apan, hinumdumi, nga ang Dios walay-kinutoban. Nagatoo ba kamo niana? [Nagaingon ang kongregasyon, "Amen."—Ed.] Walay-kinutoban! Bueno, sa pagkahimong walay-kinutoban, nagapahimo kana Kaniyang . . . Ug, kung ingon-ana, Siya'y nahibalo-sa-tanan. Nagatoo ba kamo niana? ["Amen."] Ang *pagkahibalo-sa-tanan* nagakahulogan og "Nasayod Siya sa tanang butang." Dili Siya mamahimong—dili Siya mamahimong nasayod-sa-tanan kung dili mahimong walay-kinutoban. Kita n'yo, wala gayu'y unsa mang butang nga wala Niya masayri. Hingsayran Niya ang matag tagnok nga maanaa sa yuta, ug kung pila ka higayon kini mamilok, ug kung unsa ka daghang tambok ang anaa niini, og kung unsa ka daghang tambok ang anaa nilang tanan. Hingsayran pud Niya ang matag hangin nga inyong giginhawa, ug kung unsa ka halawom kana nga mosulod sa inyong baga. Ingon niana ang pagkawalay-kinutoban.

¹⁸⁶ Karon, kung Siya'y walay-kinutoban, nan nagapahimo kana Kaniya nga nahibalo-sa-tanan. Husto ba kana? [Nagaingon ang kongregasyon, "Amen."—Ed.] Ug kung Siya'y nahibalo-sa-tanan, nan nagapahimo kana Kaniya nga anaa-sa-tanang-dapit, tungod kay hingsayran gani Niya sa ingon ka eksakto ang minuto, oras, panahon, bisan ang gamay'ng pitik sa singkwenta'y-singko sa usa ka libo sa usa ka segundo, og kung kanus-a kana nagapitik. Kita n'yo? Nasabtan n'yo ba ang ideya karon? ["Amen."] Kung ingon-ana, nasayod Siya sa tanang mga butang. Ug mao kana'y hinungdan nga aduna Siya og tanang kagahum, nasayod sa tanang butang, ug mahimo ang tanang butang.

187 Karon atong tan-awon. Karon, “Ug ang tanang mga bata nga ang Dios. . . Ang matag usa nga ang Dios. . . Sa diha nga sila. . .” Karon, hinumdumi, kanus-a ba si Jesus. . . Miingon ang Biblia. . .

188 Karon nasayod kita nga gipatay si Jesus mga A.D. 30 kaniadto. Husto ba kana? Halos, mga tunga-tunga kadto sa tuig, siguro, sa A.D. 30.

189 Karon, apan miingon ang Biblia nga gipatay Siya sa wala pa gilalang ang kalibutan. Ug ang inyong ngalan, sa dihang ang Basahon sa Cordero. . . Sa dihang gipatay ang Cordero, aron tubuson kini nga Basahon. . . Ania ang dakung butang karon. Mahimong maghinungdan kini og kadasig. Tan-awa. Sa dihang ang—sa dihang ang—sa diha nga ang Cordero. . . Karon hinumdumi, miingon ang Biblia nga nahisulat na ang Basahon sa Kinabuhi sa Cordero sa wala pa ang pagkatukod sa kalibutan. Ug nahisulat na ang inyong ngalan, og anaa na niana nga Basahon sa diha nga gipatay ang Cordero sa wala pa ang pagkatukod sa kalibutan, aron tubuson ang matag ngalan nga nahisulat diha niana nga Basahon. Kita n’yo? Nasabtan n’yo ba kini karon?

190 Kita n’yo, wala gayu’y unsa mang butang nga wala sa kahanayan. Nagalihok kini nga eksaktong sama gayud sa dakung orasan sa Dios, kita n’yo, sama sa usa ka orasan nga nagatuyok nga insakto. Ang inyong ngalan nahisulat na dinha sa wala pa ang pagkatukod sa kalibutan, sa diha nga gipatay ang Cordero aron tubuson kung unsa ang anaa niana nga Basahon. Ug karon miduol Siya ug gikuha kana nga Basahon, aron sa pag-angkon sa Iyang mga tinubos.

Dili ko gustong maghisgot niana; tungod basin man gud og dili na ’ta makatubag og dugang pa nga pangutana karon. Okey. Pangutana:

185. Ang hades ba, ug ang linaw nga nagadilaab og kalayo ug asupre, pareho ra?

191 Dili. Ang hades, sa hubad diha sa Biblia, nagatoo ko. . . Karon, aduna ma’y mga eskolar nga ania dinhi, ug gusto kong pasidungnan sila. Ang atong Igsoong Iverson nga nagalingkod dinhi, ug si Igsoong Vayle, ug daghan pa niini nga mga kaigsoonan nga mga teologo mismo. Ang gihubad nga pulong, *hades*, nagakahulogan og “lubnganan.” Husto ba kana? Ang Griyegong pulong para sa lubnganan. Apan ang Linaw nga Kalayo lahi pa kana nga butang. Tungod kay, diha sa Pinadayag, “Ang, hades ug ang tanan, gitambog ngadto sa Linaw nga Kalayo.” Kita n’yo? Sige. Karon atong hibaloon.

186. Kung dili man, nan ang Linaw nga Kalayo ba, ug ang hades, Eternal?

192 Dili, sir. Dili, sir. Ang unsa mang butang nga gilalang dili Eternal. Dili. Ang unsa mang butang nga gilalang. . . Mao

kana'y hinungdan nga dili mahimong magkaaduna og usa ka Eternal nga impiyerno. Kung aduna ma'y mosulti kaninyo nga pagasunogon kamo diha sa usa ka Eternal nga impiyerno, nan gusto ko og Kasulatan para niana. Kita n'yo? Wala gayu'y ingon-nianang butang.

193 Gilalang ang impiyerno alang sa yawa ug sa iyang mga anghel, alang sa anticristo ug sa iyang mga katawhan; mao kana ang yawa, ang nagpakatawo nga yawa. Gilalang kana para niana, aron pagapoohon. Ug unsa mang butang nga adunay. . . Unsa mang butang. . .

194 Adunay usa lang ka butang, gayud, gikan sa tanang butang, sa tibuok kalibutan ug sa tanang uban pa, adunay usa lang ka butang nga Eternal, ug mao kana ang Dios. Sa wala pa nagkaaduna og usa ka atom, o kaha mga electron, o sa wala pa nagkaaduna og cosmic light, mga electron o unsa man, Siya'y Dios na. Usa Siya ka Magbubuhat.

195 Ug kana lang ang bugtong paagi nga mamahimo kang Eternal, ang dawaton ang Kinabuhing Walay Katapusan. Kanang Griyegong pulong dinha, nagatoo ko, mao'y *Zoe*. Dili ba husto kana? *Zoe*. *Zoe*. Ug dayon, kana—kana nga Kinabuhi, gihatag kana sa Dios para kanimo. Maingon nga ang amahan, ang imong amahan, naghatag sa iyang kinabuhi para kanimo, pinaagi og—og saad sa kaminyoon uban sa imong inahan; ug siya, pinaagi niana, gihatag, ang—ang kalipay sa paghatag (Nasabtan ba ko ninyo.), sa paghatag og kinabuhi para sa usa ka anak. Ug ingon niana usab ang ginabuhat sa Dios, nagakalipay sa paghatag sa Iyang Kinabahi para sa usa ka anak. Kita n'yo? Ug dayon nahimo ka nang kabahin Kaniya, nga mao ang *Zoe*, Kaugalingong Kinabuhi sa Dios. “Hatagan ko. . . sila og Kinabuhing Walay Katapusan.”

196 “Pagabanhawon sila, sa kaulahiing adlaw.” Mao lang kana ang bugtong butang nga—nga. . . Makabaton kamo og Kinabuhing Walay Katapusan. Ug nasayod kana nga Kinabuhing Walay Katapusan sa Iyang lawas, ug kinahanglan nga mabanhaw kana. Nga mahimo nianang. . . Imposible nga magpabilin ra kana dinha. Maingon nga ang Espiritu ni Cristo nagpaibabaw sa lawas, ang Espiritu sa Dios ibabaw kang Cristo, niadtong halangdon nga adlaw, nasayod kana nga mabanhaw gyud kana; nasayod ang mga balaan nga mao usab ang ilang mga lawas.

197 Karon hinumdumi. Si Jesus, sa pagkamatay Niya kaniadto, miadto Siya sa impiyerno. Tungod nga, kinahanglan Niyang moadto didto; Siya man ang babag-sa-sala. “Ug nagwali Siya sa mga kalag nga atua sa impiyerno, nga wala naghinulsol niadtong pagkamapailubong, mga adlaw ni Noe.” Husto ba kana? Miadto Siya sa impiyerno ug nagwali ngadto sa mga kalag, ang nahimulag gikan sa Dios nga mga kalag. Ang *kamatayon*

nagakahulogan og “pagkahimulag.” Ug nahimulag sila gikan sa Dios, og dili na gayud makabalik pa. Ug miadto si Jesus aron magpamatuod nga Siya Mao ang gikasulti, nga—nga Binhi sa babaye.

¹⁹⁸ Ang binhi sa serpente, hingsayran n’yo ba kung unsay gibuhay sa binhi sa serpente? Ang anticristo; midangat sa kamatayon, pagkahimulag, og sa pula nga kabayo. Ang Binhi usab sa babaye, ang Kinabuhi, misangpot sa puti nga kabayo, si Jesus Cristo. Kita n’yo? Unsa man kana? Ang usa batok sa usa pa; ang binhi sa serpente batok sa Binhi sa babaye. Nasabtan ba ninyo kini karon? Oh, kung mahimo lang unta nato nga magpabilin pa dinha og diyutay! Dili ba maayo unta? Apan magpabilin lang kita niini.

187. Igsoong Branham, ang unang mangangabayo ba, sa Unang Selyo, ang nagtuman sa Ikaduhang Mga Taga-Tsalonica, “ang pagpadayag sa tawo sa sala”?

¹⁹⁹ Oo. Husto kana. Mao kana. Sayon ra kana. Mao gyud kana. Mao kana ang tawo sa sala. Ang mao ra gihapon nga tawo, sa nagkalainlaing mga hugna, nga nagapangabayo hangtud nga misakay siya sa usa ka maluspad nga kabayo nga gitawag og “Kamatayon.” Si Cristo nagpadayon usab diha sa, pagpamatarung, pagpakabalaan, ngadto sa puti nga kabayo, ug mao kana ang Kinabuhi, nakita n’yo.

188. Unsa ma’y mahitabo sa mga natawo-na-pag-usab nga mga magtotoo nga anaa sa nagkalainlaing mga denominasyon apan wala diha sa Pangasaw-onon ni Cristo? Unsa ma’y mahitabo kanila?

²⁰⁰ Bueno, sa hunahuna ko gisaysay na nato kana, kaganina. Kita n’yo? Mopaingon sila sa Kasakitan. Paga-martiron sila diha sa Kasakitan. Mamangon sila sa katapusan, pagkahuman sa Milenyum, alang sa ilang paghukom. Kita n’yo? Tungod, miingon man ang Biblia nga ang tanang uban pa nga mga buhi... “Ang tanang uban pa nga mga patay dili mabuhay hangtud nga matapos una ang usa ka libo ka tuig.” Dayon magkaaduna og pagkabanhaw, ug pagkahuman parehong mamangon, ang mga matarung ug dili-matarung, ug pagahukman ni Cristo ug sa Pangasaw-onon. Moanhi Siya sa yuta uban ang napulo ka libo ka napulo ka libo ka pilo nga Iyang mga balaan. Husto ba kana? Ang Iyang Pangasaw-onon.

²⁰¹ Dayon pagasugdan na ang paghukom. Ang mga Basahon pagabuklaron. Pagabuklaron ang mga Basahon. Ug may usa pa ka Basahon ang pagabuklaron, nga mao ang Basahon sa Kinabuhi. Iyang ihimulag, didto, ang mga kanding gikan sa mga karnero. Husto ba kana? Wala na’y kahilambigitan dinha ang Pangasaw-onon. Didto na Siya mismo nagatindog sa Hukmanan, uban ang Iyang Rayna... ang Rayna ug Hari, nga magkauban na. “Moanhi Siya uban ang Iyang mga balaan; napulo ka libo ka

napulo ka libo ka pilo ang magapangalagad Kaniya,” ang Iyang asawa. Dayon pagasugdan na ang paghukom, ug dayon ihimulag ang mga karnero gikan sa mga kanding. Mahinumduman n’yo ba niadtong miaging gabii, nga akong gisaysay kadtong hamubo nga pagpamalandong, aron inyong masabtan kini, ang pagpamalandong sa usa ka cowboy? Kita n’yo? Mao kana.

²⁰² Dili, sila, sila kana, ang—ang—ang iglesia, ang mga tawo nga anaa sa mga denominasyon, nga—nga tinuod nga mga Cristohanon, nga nakadawat unta og Mensahe ug wala nila Kini makita. Dili na Kini igawali pa ngadto kanila. Ug kadtong mga anaa sa nagkasagol nga mga pundok, kang kinsa gikawali Kini, molabay ra Kini mismo ibabaw sa ilang mga ulo, gawas kon ang ilang ngalan nasulat sa Basahon sa Kinabuhi sa Cordero. Oo. Apan maayo baya sila nga mga tawo.

²⁰³ Ug pagabangonon sila pag-usab ug hatagan og pagbista, ug pagahukman sa mismong grupo nga nagwali kaniadto kanila. “Wala ba kamo masayod nga ang mga balaan ang magahukom sa kalibutan?” Pagawalihan sila, kita n’yo. Pagawalihan sila, sa mao ra mismong mga tawo nga nagpahayag kanila mahitungod sa Mensahe, nga “Manggawas kamo gikan dinha!” Kita n’yo? Nanghinaut ko nga nahatagan unta kana og katin-awan. Aduna pa ko’y daghan dinhi, nga . . .

189. Igsoong Branham, ang ikapitong manulonda, nga may espiritu ni Elias, mao ba mismo ang tawong si Elias nga igapadala ngadto sa usa ka gatus kap-atan ug upat ka libo nga mga Judio sa panahon sa tulo ug tunga ka tuig human sa Pagsakgaw? Ang uban kanamo nangalibog man gud, niini.

²⁰⁴ Dili. Dili siya mao. Kita n’yo, kana’y duha ka managlahi nga tawo. Ang Eliseo nga miabot kaniadto sa porma ni Elias dili man mao si Elias mismo. Ug ang espiritu ni Elias nga miabot sa usa ka tawo nga ginganla’g Juan Bautista dili man pud mao si Elias mismo. Ug ang maong tawo usab nga ikapitong manulonda nga mensahero, sa katapusan sa Kapanahonan sa Laodicea, dili mamahimo nga mao ang literal nga Elias. Siya’y usa ka Gentil, ngadto sa iyang katawhan.

²⁰⁵ Ang Elias, o ang espiritu ni Elias nianang panahona, nga moabot sa . . . ug alang sa mga tawo didto, siya’y usa ka Judio, kita n’yo, tungod gikapadala man sila alang sa ila mismong katawhan. Mao kana ang akong kapadayagan. Ang hinungdan nga ako . . . Ni Tommy Osborn, sa dihang gihisgotan namo kana, kaniadto, si Tommy ug ako, wala gayud ako nasayod. Nagaampo lang ako niadtong para sa mga may sakit.

²⁰⁶ Ug atua ako didto, ug dihay usa ka babaye nga taga Fort Wayne Gospel Tabernacle, usa ka misyonaryo diha sa natad sa pagpangmisyong gawas sa nasud. Ang iyang suso *ingon-niana* na lang ka daku, og giut-ot na gayud sa kanser. Ug atua siya didto

mismo sa gamay'ng balay kon diin kami nagapuyo kaniadto, dinhi dapit. Ug nag-ampo ako para sa maong minahal nga igsoong babaye. Ug naayo siya, ug mibalik na sa natad sa pagpangmisyon. Ug sa dihang . . . Siya'y taga Africa. Ug nagbilin siya og usa ka gamay'ng basahon didto, mahitungod sa mga pagpangmisyon.

207 Ako—sa hunahuna ko, “Bueno, maayo man ang mga misyonaryo.” Ug akong . . . Wala gyud ko sukad naghunahuna og ayo mahitungod sa mga misyonaryo. Ug busa nahunahuna ko, “Bueno, sila'y usa lang usab ka opisina sa Dios didtong dapita. Busa kana'y . . . Mao pud kini ang akong lugar dinhi mismo, sa Eighth ug Penn Street.” Busa magpadayon lang ko kutob sa akong mahimo.

208 Apan usa ka adlaw, sa nagalingkod ako sa lawak-tun-anan, gikuha ko kadto nga basahon. Ug aduna kadto'y usa ka hulagway sa—sa Negro nga kaliwat, usa ka tigulang na nga amahan, ug aduna siya'y diyutay'ng ubanon na nga buhok. Ug sa ilalum niana may nakasulat nga ingon niini, “Tawong puti, tawong puti, asa ba ang imong amahan? Kita mo, tigulang na ako karon ug luya na ang panghunahuna, ug dili na ko makasabot kaayo. Kung nailhan ko lang unta si Jesus kaniadtong usa pa ako ka batan-ong lalaki, giwali ko na unta Siya ngadto sa akong mga kabanay.” Bueno, nabasa ko kana.

209 Ug may Butang nga nagsige'g ingon kanako, “Basaha kana pag-usab. Basaha kana pag-usab.” Nagpadayon pud ko sa pagbasa. Oh, nakasinati na usab kamo og ingon niana. “Balik-baliki kana'g basa. Aduna gyu'y butang dinha.”

210 Sama niadto nga adlaw didto sa Green's Mill, sa paggawas ko sa langub. Wala ako makasabot niadto, kung unsa nga ang mga tawo makasulti man sa laing mga dila ug managsinggit, ug adunay tinuod nga Espiritu Santo, ug anticristo man sa gihapon. Makasulti sa laing mga dila, sa tinuod nga Espiritu Santong pagsulti-og-mga-dila, ug usa ka yawa sa gihapon. Husto kana. Mapamatud-an ko kana kaninyo. Oo, tinuod gayud. Ug dayon matikdi . . . sa dihang nanindog sila didto.

211 Busa, ang pagsulti og laing mga dila dili mao ang ebidensiya sa Espiritu Santo. Usa ra kana sa mga gasa sa Espiritu Santo. Kita n'yo? Ug ang yawa makahimo man sa pagsundog-sundog sa tanan-tanan nga aduna ang Dios, sa Balaanong pagpang-ayo ug tanan nang uban pa.

Miingon Siya, “Daghan ang magaduol Kanako nianang adlaw, ug magaingon, ‘Ginoo, dili ba nagpagula man ako og mga yawa? Dili ba . . .’” Kanang mga nagwali sa Maayong Balita. “‘Dili ba nakahimo man ako og gamhanang mga buhat sa Imong Ngalan, ug tanan niining mga butanga dinha?’ Magaingon Ako, ‘Pahalayo kamo Kanako, kamong mga mamumuhat sa kadautan. Wala gani Ako nakaila kaninyo.’”

212 Miingon ang Biblia, nga, “Nagakahulog ang ulan sa mga matarung ug sa mga dili-matarung, usab.” Ug ang mao ra nga amoreseko, nga nagatubo dinha sa tamnanan og trigo, mahimo mang magmalipayon ug magasinggit, tungod sa mao rang tubig nga nahulog kaniya, ingon nga kini parehong gipadala kanilang duha. “Apan pinaagi sa ilang mga bunga mailhan mo sila.” Ngani makatindog kanang gamay’ng amoreseko dinha, ug malipay mismo ug magasinggit kutob sa iyang mahimo, og mapuno mismo sa mao rang tubig nga aduna ang trigo.

213 Mao kana. Busa makasinggit pud sila, makasulti og laing mga dila, ug makasundog-sundog sa tanang butang nga gustohon nila; pero nianang adlaw, pagatawgon nga, “Mga mamumuhat sa kadautan.”

214 Sama sa gikaingon ko na kaninyo, kaganina, paminawa n’yo kung unsay akong ginasulti! Paminaw og ayo. Baliki’g tan-aw, og susiha ang inyong kaugalingon diha sa Pulong ug tan-awa kung hain na kamo.

215 Kamong mga kababayan-an nga may mughong mga buhok, pataasa kana. Nanagsul-ob kamo og mga shorts; huboa kana. Managlihok kamo ingon nga usa ka maugdang nga babaye. Kamong mga kalalaken-an nga nagapanigarilyo sa gihapon, ug nagaadto sa mga bilyaran, undangi na ninyo kana. Dili ko igsapayan kung unsa unsa man ang inyong ginapahayag. Kung nagapabilin pa gihapon kamo niana nga organisasyon, ug nagaingon, “*Ingon-nini* Kini, ug *ingon-nini* Kini,” mas maayo pang undangan ninyo. Tan-awa ninyo, og susiha kana diha sa Pulong. Napahilayo na kita sa . . .

216 Angay unta nga nagkinabuhi kita nga lagpas pa sa mugbo nga buhok ug tanan na. Kining kapanahonan karon, nahibalik na kita sa usa ka Butang karon, ingon nga ginapadayag na sa Dios ang gililong nga mga tinago, nga nahisulat sa Basahon sa wala pa ang pagkatukod sa kalibutan. Ug kadtong mga nanagtuman niining gagmay’ng mga butang, makasabot gayud Niini sa niining uban pang mga butang. Kung wala sila nagtuman, nan molagpas lang Kini sa ilang mga ulo, sama sa kon unsa ka halayo ang sidlakan gikan sa kasadpan. Bug-os kining. . .

217 Sama ni Gideon kaniadto, nga gilain-lain ang iyang mga kalalaken-an. Aduna man gud siya’y linibo ug mga linibo kanila. Miingon ang Dios, “Kana’y daghan ra kaayo. Pinigon mo sila pag-usab.” Gisulayan niya sila pag-usab. Ug, “Pinigon mo sila pag-usab. Pinigon sila pag-usab.” Ug padayon, hangtud nga aduna na lang siya’y pipila. Miingon ang Dios, “Mao kana nga pundok ang gusto Kong mobuhat sa buluhaton.” Eksaktong ingon niana ang nahitabo.

218 Ang Pentecostal nga mga kababayan-an (nga nagabalik-balik na) sa paglingkod dinha, nga nadungog na ug nasayod na,

pinaagi sa Pulong, nga sayup kana. Sa hunahuna n'yo mosunod kaha sila Niini? Dili, sir. Matag tuig, sa akong paghapit dinhi, mas nagkadaghan na hinoon ang mga mugbo og buhok kay sa niadtong nagsugod pa ako.

²¹⁹ Miingon, “Unsa ma’y kahilambigitan...Angay mo untang...” Adunay miingon, “Aba, Igsoong Branham, ginaila ka baya sa mga tawo ingon nga usa ka propeta.”

Bueno, wala baya ko nagsulti nga usa ako ka propeta. Walay si kinsa man ang nakadungog kanako nga nagsulti og ingon-niana. Apan isulti ko kini, nga kung—kung ingon-ana man ang inyong gihunahuna, kung ingon-ana ang inyong pag-ila . . .

Ingon pa, “Nganong dili mo man tudloan ang mga tawo kung unsaon pagdawat sa Espiritu Santo, ug kung unsaon pagdawat *niini*, ug kung unsaon pagdawat og dagkung espirituhanon nga mga gasa ug tabangan ang iglesia?”

Unsaon ko man pagtudlo kanila sa Algebra nga dili man gani sila maminaw sa ilang ABC? Husto kana. Buhata 'usa ninyo kining gagmay'ng mga butang. Naug 'sa mo dinhi sa ubos ug isalikway kana, ug magsugod nga husto. Amen. Bueno.

²²⁰ Unsa man ang akong gihisgotan, diay? Tan-awon nato. Wala nako gituyo nga mopahilayo niana nga hilisgotanan. Pasayloa ko, kita n'yo. Okey. “Ang pipila sa...ang pipila kanamo nangalibog man gud. Ang maong Elias ba sama ra sa...” Oo, uh-huh, husto kana.

Dili. Kining Elias nga moabot ngadto sa mga Gentil, usa kini ka Gentil nga dinihogan niana nga espiritu, tungod gigamit man sa Dios kanang mao gihapon nga espiritu aron ipahigawas ang Iyang mga tawo gikan sa kagubot sa matag panahon. Ug gituman man niini ang Iyang katuyoan, busa pabalikon Niya kini mismo. Tungod kay, kita n'yo. . .

Tungod kay, karon, kung mogamit Siya og usa ka binansay-og-ayo, edukado, nan mga ingon-ana nga matang usab ang madani niana.

²²¹ Apan ang ginapadala Niya mao'y tawo nga halos wala gani nahibalo sa iyang ABC, ug dili makalitok og husto sa iyang mga pulong, ug tanan nang ingon niana; usa ka tawong gikan pa sa kamingawan sa kung asa man, ug ihatud Kini ug ipahayag ngadto nianang mga tawo nga may yano-rang-panghunahuna. [Ginapalagitik ni Igsoong Branham ang iyang tudlo sa makausa—Ed.] Ug masabtan nila Kini, dayon. Masabtan nila Kini, kita n'yo. Kung moabot Kini, pinaagi'g dekuwelyo . . .

²²² Sama sa gisulti ni Pablo, “Wala ako mianha diha kaninyo pinaagi og kahanas sa edukasyon, apan nagaanha ako kaninyo diha sa Gahum sa pagkabanhaw.” Nagkinahanglan ang Dios og tulo ug tunga ka tuig, didto sa Arabia, aron tangtangan kadto

gikan kang Pablo, ang iyang edukasyon. Migahin—migahin pud Siya og kuwarenta ka tuig aron tangtangon kadto gikan kang Moises. Kita n'yo? Busa mao kana. Kana'y . . .

Wala ko ginaingon nga ang Dios walay...wala ko ginasuportahan ang kawalay-kahibalo ha, apan ako—ginapaningkamotan kong isulti kaninyo nga wala kana nagkinahanglan. . . Ang edukasyon wala . . .

²²³ Ang kaalam niining kalibutana sukwahi. Ang edukasyon mao gyud ang pinakadakung babag nga nagkaaduna sukad ang Ebanghelyo. Kung wala kita'y edukasyon, wala pud unta kita nagkaaduna niining dagkung mga seminaryo ug ingon-anang mga butang nga aduna kita karon. Ang mga tawo, nga may yanong-panghunahuna ra unta, ang magpatalinghug sa Pulong. Apan sila'y binansay na kaayo ug nadoktrinahan na, ug nahikitan na gayud, dinha, nianang mga organisasyon, hangtud nga dinha na lang gyud sila. Kana lang. Nadawat nila ang ingon-anang espiritu. Nakakita na ba mo og usa ka maayong babaye, nga nakigminyo sa usa ka dautang lalaki? Kanang dautan nga lalaki mamahimong usa—usa ka maayong lalaki nga sama sa maong babaye, o kaha mamahimong dautan ang babaye nga sama sa lalaki. Kita n'yo? Husto kana.

²²⁴ Mao kana'y hinungdan nga miingon Siya, “Panggula kamo gikan kanila, samtang nagaandam na Ako aron ipahitabo kanang Pagsakgaw.” Kinahanglan n'yong magkaaduna og usa ka matang sa pagtoo nga magpahigawas kaninyo dinha.

190. Kanus-a ba ang pakigsaad, sa Daniel 9:27, gipamatud-an sulod sa usa ka semana?

²²⁵ Gipamatud-an na ang katunga niini, nga pakigsaad, kaniadtong ania pa si Jesus Cristo sa yuta nga nagawali ngadto sa mga Judio. Wala gyud Siya miadto sa mga Gentil, man lang. Ug gisultihan Niya ang Iyang mga tinun-an, “Dili kamo mangadto sa mga Gentil.” Para kadto sa mga Judio, lamang. Kita n'yo? Ug nagwali Siya sulod sa tulo ug tunga ka tuig. Kana'y katunga na sa ika-setenta ka semana, ha, sumala sa gisulti ni Daniel nga pagabuhaton sa Dios.

²²⁶ Karon, timan-i ninyo, Siya'y bug-os gayud nga gipanghimatud-an para ngadto sa mga Judio. Apan gibutahan lang ang ilang mga mata, aron mapasulod kini nga panahon sa Gentil. Dili ba ninyo makita ang maong tibuok programa? Kita n'yo? Ug gipamatud-an Niya mismo ang Iyang Kaugalingon, ingon nga usa ka propeta, gibuhat Niya sa ingon ka eksakto kung unsay angay'ng buhaton sa usa ka propeta, gipakita kanila ang ilhanan sa usa ka propeta. “Nga, miingon ang inyo mismong Kasulatan, ‘Kung ang usa ka tawo magaingon nga siya'y espirituhanon, o usa ka propeta, bantayi kung unsay iyang ginasulti; ug kung mahitabo kana, padayon mismo nga nagakahitabo, kung unsay iyang ginasulti, sa kanunay.’”

²²⁷ Sama sa, kung tan-awon ninyo sa Biblia, nagaingon kini, “Pagtuktok, kay kini pagaablihan; pagpangita, og makakaplag; pagpangayo, og pagahatagan.” Karon, kung inyong matikdan, kanang “pagpanuktok.” Padayon lang sa pagtuktok. [Hinay-hinay nga ginatuktok ni Igsoong Branham ang ibabaw sa pulpito sa makabaynte-tres ka higayon—Ed.] Ipadayon lang gyud kana. Sama sa dili-matarung nga maghuhukom, nga ayaw ng tubagon ang babaye; padayon lamang siya nga nagapanuktok sa iyang pultahan. Nagaingon, “Anaa ako sa Imong kamot.” [Mihunong na si Igsoong Branham sa pagtuktok.] Dili nga mangita, og moingon, “Ginoo, gusto kong magkaaduna *niini*. Amen.” Dili ingon niana. Pagpabilin dinha mismo hangtud nga madawat mo na kana. Nasayod ka na nga moabot kana. Tungod, gisaad man Niya kana, busa pagpabilin lang dinha mismo hangtud nga mahawiran mo na kana. Kita n’yo?

Bueno, karon, sa ulahing bahin, sa ika-setenta ka semana, ang ulahing bahin niana mao na ang panahon sa Kasakitan, human sa Pagsakgaw sa Iglesia. Dayon ania ang tulo ug tunga ka tuig, nga pagapamatud-an kanila pag-usab pinaagi sa mga propeta, kita n’yo, si Moises ug si Elias, Pinadayag 11. Karon atong tan-awon kung unsa kini:

191. Kung usa ikaw sa Iyang mga pinili, mahiuban ka ba sa Pangasaw-onon? (Oo. Uh-huh. Oo, sir. Ingon niana ra ka sayon.)

192. Igsoong Branham, buut mo bang ipasabot nga pito ka libo ang wala nangluhod ngadto kang Baalim, o pito ka gatus?

²²⁸ Pito ka libo, ang buut kong ipasabot diay. Pasayloa ko niana, kita n’yo. Usa lamang. . . Kana’y usa—usa lamang ka sayup sa paglitok. Ako gayu’y. . .

Sama, sa akong nasulti kaganina. Namatikdan n’yo ba nga sa nagatindog ako dinhi, miingon ko, “Ug—ug nagapamatuod sila, nga nakita ang Cordero. . .”? Kita n’yo? Kita n’yo? Ania ang Cordero sa yuta kaniadto. Kita n’yo? “Nagapamatuod, nga nakita ang Espiritu sa Dios nga nagakunsad sa Cordero.”

²²⁹ Karon, dinha, ang ingon niini, “Kini mao ang Akong Anak nga hinigugma, nga Kaniya Ako may kalipay.” Nakita n’yo? Karon, nahisulat kana sa usa ka aktuwal nga pagkahan-ay sa Griyego, nga ginauna ang berbo sa adberbyo. Apan matikdi ninyo dinhi, sa tinuod lang ingon-niini kini. Karon toohi lamang ang Pulong, kita n’yo. Nagaingon ang Biblia, sa hubad sa San Santiago dinhi, “Kini mao ang Akong Anak nga hinigugma, nga Kaniya Ako may kalipay nga mopuyo.” Apan, sa tinuod lang, kung isulti nato kini sama sa pagkasulti nato karon, “Kini mao ang Akong Anak nga hinigugma, nga Kaniya Ako may kalipay nga mopuyo.” Balit-aron ninyo kana, kita n’yo. Kita n’yo? “Kini mao ang Akong Anak nga hinigugma, nga Kaniya Ako may kalipay nga mopuyo.” Kita n’yo? Karon, kung isulti nato kini sa

karon, “Kini mao ang Akong Anak nga hinigugma, nga Kaniya Ako may kalipay nga mopuyo.” Kita n’yo, mao ra man nga pulong, bisan pa’g balit-aron kini. Kita n’yo?

²³⁰ Karon, oo, ang buut kong ipasabot...Pasayloa ko, kung mahimo. Ako...Ug—ug, mga igsoon, kamo nga mga nagapaminaw dinha sa teyp, ug mga higala, paminaw. Wala ko gituyo nga isulti ang ingon niana. Ako—ako—ako usa ka ministro sa Ebanghelyo. Ako, sa makadaghan nang higayon nga giwali ko kana, nasayod gyud ako nga pito ka libo kana. Nahitabo lang nga pito ka gatus ang nasulti ko. Pero wala ko gayud gituyo nga pito ka gatus. Ang buut kong ipasabot, kamo...Wala ko man gud kana basaha sa Kasulatan. Miabot lang kana sa akong hunahuna samtang nagasulti ako, ug mao nga nasulti ko ang pito ka gatus imbis nga pito ka libo. Nagakasayup ako og mga ingon-niana sa tanang panahon. Ako—usa gayud ako ka burong, busa pasayloa ko ninyo. Kita n’yo? Wala ko gituyo nga buhaton kana.

193. Ang Pangasaw-onon ba ni Cristo, ug ang Lawas ni Cristo, pareho ra?

²³¹ Oo, sir! Kita n’yo? Karon, ania, karon tan-awa, dili ko unta gustong maghisgot mahitungod niana, tungod makawa-... makawali na sab ko mahitungod niana, kita n’yo. Apan dili ko buhaton kana. Pero gusto ko lang ipakita kaninyo. Sa dihang gihatag sa Dios kang Adan ang iyang pangasaw-onon, nga gikuha sa iyang kilid, miingon siya, “Siya’y unod sa akong unod, ug bukog sa akong bukog.” Husto ba kana?

²³² Sa dihang gihatag pud sa Dios kang Cristo ang Iyang Pangasaw-onon, gihatagan sa Espiritu ug unod ang Pangasaw-onon, gisumbag Siya, gidughang Siya sa kilid ilalum sa Iyang kasingkasing, ug migula, ang tubig, Dugo, ug Espiritu; nga nahimong “unod sa Iyang unod, ug bukog sa Iyang bukog.” Kita mao ang unod ug mga bukog; ang Pangasaw-onon ang mamahimong unod ug mga bukog ni Cristo, eksakto gayud. Sila mao ang...Mao kana ang Iyang Pangasaw-onon.

194. Magkaaduna ba ang Pangasaw-onon ni Cristo og...? Magkaaduna ba ang Pangasaw-onon ni Cristo og usa ka ministerio sa dili pa ang Pagsakgaw?

²³³ Oo. Mao kana’y nagakahitabo mismo karon, kita n’yo, sa Pangasaw-onon ni Cristo. Sigurado gayud. Kini mao ang Mensahe sa niining panahon, kita n’yo, sa Pangasaw-onon ni Cristo. Oo. Naglangkob Siya og mga apostoles, mga propeta, mga magtutudlo, mga ebanghelista, ug mga pastor. Husto ba kana? [Nagaingon ang kongregasyon, “Amen.”—Ed.] Mao kana ang Pangasaw-onon ni Cristo. Oo. Aduna Siya’y usa ka ministerio, halangdong ministerio, ang ministerio sa niining panahon. Kini’y mahimong ubos ra kaayo.

²³⁴ Karon hinumdumi. Pila man ang ania dinhi, sa unang, sa dihang ako...? Niadtong miaging Dominggo, kita n'yo, mahinumduman n'yo ba kung unsay akong giwali? Pagpaubos. Oh, ayaw n'yo hikalimti kana. Mohunong 'usa ko sa makadiyut, aron ipahinumdom kana pag-usab. Hinumdumi, nga sa dihang nagatagna ang Dios og unsa mang dakung butang nga mahitabo, nagalantaw ang mga tawo nga halayo ra kaayo, tungod sa ilang kaalam, hangtud nga dili nila makita kung unsa na'y nagakahitabo. Pagmosulti ang Dios nga ang unsa mang butang nga halangdon, mangatawa ra ang mga tawo niana. "Kanang pundok sa mga walay-hibangkaagan!" Husto kana.

Apan sa diha nga ang bantugang kalibutan usab, ug ang bantugang mapahitas-on nga iglesia, moingon, "Aba, mahimayaon kana!" Moingon pud ang Dios, "Usa ka pundok sa mga walay-hibangkaagan!" Busa, kita n'yo, kinahanglan n'yong magbantay. Dili ko ginapasabot nga tingalig'g ingon niana kana, nga ingon ka eksakto gayud, apan ingon niana gyud kana.

²³⁵ Matikdi! Ania ang usa ka bantugang, balaang Orthodox nga iglesia kaniadto, "Nasayod kami sa Pulong. Aduna kami og mga eskwelahan. Aduna pud kami og mga seminaryo. Hinashasan kaayo ang among mga ministro! Aba, sulod sa gatusan na ka mga tuig nagmatinud-anon gyud kami kang Jehovah. Kami mao ang Iglesia. Kami mao ang Sanhedrin. Aduna kami og Konseho sa mga Iglesia dinhi. Ang mga Fariseo ug mga Saduceo, ug ang tanang mga denominasyon, nagakatigum kami," sama ra sa nagakahitabo sa karon. Kita n'yo? "Kaming tanan usa ra, ang—ang Konseho sa iglesia. Kami ang mga bantugan dinhi. Nasayod man 'mi nianang Kasulatan. Bisan unsa pa'y isulti kanamo, nianang gamay'ng, walay-hibangkaagan nga lalaki didto sa suba, nga puno og balbas ang tibuok niyang nawong, ug nagsul-ob pa og panit sa karnero?" Sigurado gayud, dili nila paminawon Kadto.

²³⁶ Apan miingon ang Biblia, sa Malaquias sa ika-4 nga kap-... o sa ika-3 nga kapitulo, "Akong ipadala ang Akong mensahero sa atubangan Ko, aron sa pag-andam sa dalan para Kanako." Pito ka gatus ug dose ka tuig sa wala pa kadto, si Juan... Oh, mibarug ang halangdong propeta nga si Isaias kaniadto, ug miingon, "Magkaadunay usa ka tingog nga magasinggit sa kamingawan, 'Andama ninyo ang dalan para sa Ginoo, ug himoang patag ang Iyang dalan.'" Husto kana. Ug miingon... ug si Dav-... Oh, daghan kanila! Miingon, "Ang tanang hatag-as nga dapit pagapaubson."

²³⁷ Oh, miingon sila, "Adunay usa ka... Pagmoabot na kini nga tawo, ipunting niya lang ang iyang tudlo, ug mapabalhin niya ang mga bukid. Oh, ug ang tanang ubos nga mga dapit, ang mga kanal, pagapatas-on. Dayon ang tanan, ang tanang gansang-gansangon nga mga dapit, pagapatagon. Igsoon, managtanum

kita og mais sa matag umahan dinhi. Ug, oh, managbuhat kita og dagkung mga butang pagmoabot na kini nga tawo.” Kita n’yo?

²³⁸ Nanagdahum sila kaniadto nga kuhaon sa Dios ang pulohan ug tuyokon kini, ipapanaug ang hagdanan, og moingon, “Kanaug na, ikaw nga halangdong mag-uuna sa Akong Mesias.” Ug dayon sa dihadiha nga motaliwan na siya, ipatuyok nila kini pag-usab, ug tapos na ang iyang ministerio. Ipaubos nila kini pag-usab, ug ipahimutang kini dinhi mismo sa maong seminaryo, ug moingon, “Sige, Akong pinalanggang Anak, kanaug ug sultih sila.” Kita n’yo? Oh, grabe!

²³⁹ Matikdi, kaniadtong miabot na siya. Unsa ma’y nahitabo? Ania miabot ang usa ka tawo nga walay hingsayran ni usa sa ilang mga eskwelahan. Ni wala gani og usa ka fellowship card. Oh! Wala usab og mga kredensiyal. Wala. Wala gayu’y si kinsa man ang nasayod kon naka-eskuwela ba siya sukad sa tibuok niyang kinabuhi. Dili mo kini makita sa iyang mga pagpamulong. Wala gani siya mogamit og mga termino sa usa . . . sa mga terminong pang-simbahan. Naghisgot hinon siya mahitungod sa mga bitin, mga atsa, ug kamingawan, ug—ug—ug mga butang nga ingon niana, kita n’yo, og mga kahoy usab. Wala siya naghisgot nga gamit ang mga terminong pang-simbahan sa niadtong panahon, o sa niining panahon o sa uban pang panahon.

²⁴⁰ Miabot siya ingon nga “sassafras,” sama sa tawag nato niini dinhi sa Indiana. Migula siya gikan sa mga kakahoyan sa kung asa man. Wala gani siya nakapang-ahit, ug nangtuskig ra ang mga buhok sa iyang ulo. Dili ko mahunahuna kon nagaligo ba kaha siya; kausa sa kada duha o tulo ka bulan. Oo. Wala pud siya nagasul-ob og pajama inig kagabii. Wala gayud siya nakasakay sukad og usa ka sakyanan. Wala pud siya sukad naga-brush sa iyang ngipon. Oh, grabe! Pagkakuyaw niini nga lalaki! Walay pagduhaduha.

²⁴¹ Ania siya nagaabot, mitungha didto nga gikan pa sa kamingawan, nga sama niana, miingon, “Ako mao ang tingog nga nagasinggit sa kamingawan. Andama ninyo ang dalan para sa Ginoo, ug himoang patag ang Iyang dalan!”

²⁴² Mibarug didto ang pipila sa mga magtutudlo ug miingon, “Huh! Uy, higala, aduna ka ba’y . . .? Dili kami puedeng makigtimbayayong kanimo sa niini nga buluhaton. Ania, dili namo mapahigayon kini. Bueno, asa ang imong—asa man ang imong kard? Asa man ang imong ilhanan?” Gibalewala lang niya sila. Aduna man siya’y usa ka mensahe, busa nagpadayon lamang siya niini, nakita n’yo, nga nagawali sa gihapon.

²⁴³ Ingon sila, “Bueno karon, hulat ’sa! Bueno, kung moadto kita didto, nan istoryahon nato ang obispo, karong adlaw, ug hibaloong kung unsay iyang ikasulti mahitungod niini. Moadto kita didto aron hibaloong nato. Kana’y mga pangulo man sa

iglesia. Ug nasayod kita nga kinahanglan niyang ilhon kana. Kung siya’y iya sa Dios, ilhon niya ang atong mga obispo.”

²⁴⁴ Gipalingkod na silang tanan didto, ug atua na ang tanan, ang mga tawong hataas og katungdanan.

²⁴⁵ Ingon niya, “Kamong mga kaliwat sa mga bitin! Kamo nga mga bitin sa kasagbotan!” Mga tawong nakapilo ang kuwelyo, ug “balaang mga padre,” ug uban pa. “Kinsa ma’y nagpasidaan kaninyo sa pagkalagiw gikan sa kapungot nga umaabot? Nasayod man diay kamo nga ang inyong takna haduol na. Ayaw ninyo hunahunaa nga . . . Moingon mo, ‘Bueno, miyembro kami sa *ingon-niini*, *ingon-niana*.’ Sultihan ko kamo, ang Dios nga akong ginaalagaran makahimo sa pagpatindog og mga anak kang Abraham bisan sa niining mga bato.” Oh, grabe!

²⁴⁶ Karon mosulti na pud siya og sukwahi, sa pang-simbahan nga pagpamulong. “Magaingon ako nga ang atsa napataup na sa gamut sa kahoy! Busa ang matag kahoy nga wala nagapamunga og mga maayong bunga pagaputlon ug isalibay ngadto sa kalayo! Oh, ako sa pagkamatuod nagabautismo kaninyo sa tubig, ngadto sa paghinulsol, apan nagaabot Siya sunod kanako. Ang bulan mamahimong dugo! Ug inyong . . . oh, grabe, Iyang pagahinloan pag-ayo ang Iyang mga giukanan! Ug Iyang dalhon ang—ang mga uhot ug pagasunogon kini uga anga sa kalayo nga dili arang mapalong, ug Iyang dalhon ang trigo ngadto sa dapa. Iyang pagalainon ang mga bunglayan ug ang trigo.” Oh, grabe! Pagkaanindot nga mensahe!

²⁴⁷ Miingon sila, “Kini nga tawo? Huh! Unsay gisulti niya, unsa—unsa—unsa kono kadto nga panahon? Oh, pagkawalay-hibangkaagan! Aduna man kita’y tawo dinha, si Igsoong Jones. Siya ang tawo nga mobuhat niana, kung aduna ma’y si kinsa man sa niini nga kapanahonan. Si obispo *Ingon niini-ug-ingon niana* ang mobuhat niana; si Balaang Padre *Ingon niini-ug-ingon niana*.” Oh, grabe! Kita n’yo?

Ang Dios diha sa kayano, kita n’yo, nagapamuhat diha sa kayano.

²⁴⁸ Dayon, mahibaloan mo na lang, nagatindog siya didto usa ka adlaw, ug miingon siya, “Oo, anaa Siya nagatindog sa inyong taliwala!” Sigurado gyud siya nga siya mao kadtong mag-uuna. Nasayod siya mismo kung kinsa siya. Mao kana’y hinungdan nga mahimo niyang tay-ogon sila. Miingon, “Karon, ayaw kamo pagpangurog, apan lakaw lang ug magpadayon. Kamong mga sundalo, sunda ninyo ang inyong mga pangulo. Ug kung nakabuhat kamo og unsa man nga dautan, dawata ninyo kanang . . .”

²⁴⁹ “Unsa ma’y among buhaton? Mohunong na ba kami sa pagbuhat *niini*? Moundang na ba kami sa pagbuhat *niini*?”

²⁵⁰ Ingon siya, “Padayon lang sa kung unsay ginabuhat ninyo. Padayon. Padayon lang. Sige. Kung nagatanum man kamo og

mga patatas, pagtanum ra niana. Kita n'yo? Kamo nga mga sundalo, ayaw mo pagbuhat og unsa man nga pagpanglupig. Ug—ug buhata ninyo kini. Ug kung unsa man kamo, padayon lang sa kung unsay ginahimo ninyo. Sunda ninyo ang inyong mga amo, ug uban pa.”

“Rabbi, unsa ma’y angay namong buhaton?”

²⁵¹ “Padayon lang sa kung unsay ginabuhat ninyo, kita n’yo. Apan adunay Usa diha sa inyong taliwala, nga wala ninyo hiilhi.” Hingsayran na niya kadto, ang panahon sa iyang mensahe. Hingsayran na niya nga siya ang magpaila niadto nga Persona. Hingsayran niya nga atua Siya didto. “Usa nga anaa sa inyong taliwala! Wala ninyo Siya makita. Ngani nagakahitabo na ang mga butang, nga wala gyud kamo’y unsa man nga kasayoran niini.” Ug busa, dayon, “Adunay—adunay butang nga mahitabo,” ang ingon niya, “nakita n’yo, ug maania Siya dinhi. Ug maila ko Siya.”

²⁵² Ug sa katapusan, usa niana ka adlaw, ingon niya, “Tan-awa, ania na Siya! Mao kana ang Cordero sa Dios nga magakuha sa sala sa kalibutan!” Miingon, “Ug tapos na ang akong panahon karon. Napaila ko na kamo ngadto Kaniya. Kinahanglan ko nang mokunhod karon. Kinahanglan ko nang mohawa sa esena. Siya na’y magadumala sugod karon.”

“Ang Milenyum magasugod na, dayon, kita n’yo, ug ang—ang maong panahon haduol na.” Dayon pagmoabot na Siya, pag. . .

²⁵³ Gani miingon pa si Juan, “Iyang, oh, Iyang pagatangtangan ang tipaka. Iyang—Iyang pagalainon ang trigo gikan sa—gikan sa mga uhot, ug Iyang pagasunogon kini. Ug Iyang pagahinloan pag-ayo ang Iyang mga giukanan, ug ang Iyang nigong-paliran anaa na sa Iyang kamot!” Apan unsa man Siya? Gamay, kaayong. . .

²⁵⁴ Bueno, gipaabot nilang ingon niini ang mahitabo, “Oh, aba! Magkaaduna Siya og usa ka bangkaw nga mokabat og usa ka milya ang katas-on. Motindog Siya dinhi dapit sa Palestina, motindog lang dinha ug basta. . . ibabaw sa usa sa niining maputi nga mga panganod, ug pangpuniton ang tanan niining mga Romano, nga sama *niini*, ug itambog sila ngadto sa impiyerno. Padayon Niya silang ipangtambog nga sama *niana*, kita n’yo, hangtud nga mapoo Niya silang tanan.” Aba, ingon niana ang bug-os nilang pagpaabot.

Ug sa dihang nahitabo kadto, usa ra ka gamay’ng Cordero ang migula sa taliwala nila, maaghop ug malumo, nga gituklod-tuklod lang sa *ingon-niini* nga direksyon ug sa *ingon-niana* nga direksyon.

²⁵⁵ Bisan si Juan nakasulti mismo. Karon tan-awa si Juan, ang propeta; ingon niya, “Lakaw ug pangutan-a ninyo Siya. Siya na ba gayud Kana?” Pagka-mapainubsanon kaayo, hangtud nga

wala kadto makita sa maong propeta. Miingon, “Siya na ba Kana, o magapaabot pa ba kami og lain?”

²⁵⁶ Karon, wala gayud ang Dios naghatag kang Juan og usa ka basahon para niadtong mga tinun-an, diha sa—sa Mateo 11. Miduol sila ug gipangutana Siya, sa dihang ang mga tinun-an ni Juan. . .

Atua si Juan sa bilangoan. Ug siya’y nalibog gayud hangtud nga siya. . . nagatoo ko nga si Pember kadtong miingon, “Ang iyang matang-agila nagakahalap na, didto,” nakita n’yo. Mahimo niyang. . . Minaug na siya—siya sa yuta; gikan na siya kaniadto sa kawanangan. Apan sa dihang natapos na ang iyang pagpropesiya, minaug na siya sa yuta pag-usab, kita n’yo, tungod, gibalhog man siya sa bilangoan, nakita n’yo. Wala na niya magamit kadtong dagkung mga pako, busa mipuyo na lamang siya didto. Apan milupad siya kaniadto nga mas hataas kay sa uban pa kanila.

²⁵⁷ Aduna ko’y ipakita kaninyo. Gigamit siya sa Dios. Ug nasayod si Jesus, nakita n’yo, tungod mao kadto ang—mao man kadto ang nagpakatawo nga Dios didto. Kita n’yo? Siya mao. . . Busa, Siya—miingon Siya didto, miingon Siya. . .

Karon, wala gayud Siya naghatag kaniya og usa ka basahon kung unsaon niya pagminatarung sulod sa bilangoan; og moingon Siya, “Karon kadali lang. Magsulat ’sa Ko og usa ka hamubong sulat dinhi, ug dalha ninyo kini ug suginli si Juan kung unsaon niya pagminatarung pag anaa na siya sulod sa bilangoan, alang Kanako.” Kita n’yo? Wala, wala gyud Siya nagsulti og ingon-ana.

²⁵⁸ Wala pud Siya miingon, “Lakaw ug suginli si Juan nga kinahanglan niyang makabaton sa iyang Ph.D. nga digri sa dili pa siya mogawas.” Kita n’yo? Kay kung gibuhat man ni Juan, nan siguradong nahimo gyud siyang sama sa uban pa kanila; nahimo gyud unta siyang usa ka tigsalikway.

Matinud-anon si Juan ug gipangutana ang maong pangutana.

²⁵⁹ Ug miingon Siya, “Paghulat ’usa hangtud nga matapos ang panagtigum, ug pagkahuman lakaw ug ipakita kang Juan kung unsay nahitabo, dayon mahibalo na siya. Kung suginlan ninyo siya kung unsay nagakahitabo, nan mahibaloan niya.” Kita n’yo? Kita n’yo? “Umadto lang kamo ug tugoti siyang. . . Suginli siya. Suginli siya nga kini’y. . . Anaa man siya sa bilangoan ug dili siya makaanhi. Apan—apan mitambong man mo sa panagtigum, ug nakita ninyo kung unsay nahitabo. Umadto kamo ug suginli siya.”

Busa, pagkahuman, miingon ang mga tinun-an, “Sige, Ginoo.”

260 Ug nangadto sila sa pikas bungtod. Naglingkod si Jesus ibabaw niadtong bato, gitang-aw lang sila hangtud nga nakatabok sila ug mitungas ngadto sa bungtod.

261 Milingi Siya ngadto sa kongregasyon, miingon, “Kinsa—kinsa man ang giadto ninyo aron makita, sa panahon ni Juan?” Kita n’yo? Miingon, “Unsa man ang giadto ninyo aron makita? Nangadto ba kamo aron makita ang usa ka tawo nga nakapilo ang iyang kuwelyo, ug nagasul-ob og bistis nga hamili, ug hinashasan-kaayo ug edukado. Ingon niana ba nga matang sa tawo ang giadto ninyo aron makita?” Miingon, “Dili. Nasayod ba kamo kung unsa kana sila nga matang? Nagahalok sila sa mga bata, ug, kabalo mo, nagatrabaho sila sa mga palasyo sa mga hari. Sila, kana—dili ingon niana nga matang si Juan.”

262 “Bueno,” miingon, “kung ingon-ana, nganong nangadto man kamo? Aron ba makita ang usa ka tawo nga gikahatagan og usa ka ministerio ug ihilambigit kana mismo sa usa ka organisasyon, o mora’g ingon niana? Ginakusokuso sa matag . . . Ug, kung ang—kung ang Oneness dili ganahan kaniya, moadto na lang siya sa Trinity? Ug kung ang Trinity dili sab ganahan kaniya, moadto na pud siya sa Church of God, og bisan asa na lang? Ingon niana ba nga matang sa tawo ang inyong giadto aron makita, ginakusokuso sa bisan unsang bagakay? Oh, dili. Dili ingon-ana si Juan.”

263 Miingon Siya, “Kung ingon-ana unsa man ang giadto ninyo aron tan-awon? Usa ba ka propeta?” Ingon pa Siya, “Ug moingon Ko nga husto kana. Apan aduna Ko’y isulti kaninyo nga wala ninyo masayri; labaw pa gani siya sa usa ka propeta. Siya’y labaw pa gayud. Kung makadawat kamo niini, mao kini siya ang gihisgotan sa nahisulat, sa Biblia, kita n’yo, dinha, sa Kasulatan, ‘Akong ipadala ang Akong mensahero sa atubangan Ko,’ Malaquias 3, kita n’yo, ‘ug siya magaadam sa dalan sa atubangan Ko.’” Kita n’yo?

264 Ug wala sila makasabot. Bisan ang mga tinun-an wala gani makasabot niadto, kita n’yo. Husto kana. Oh, grabe! Pagkayano gayud! Magmapainubsanon, kita n’yo. Magpaubos mismo . . . Pag nagsaad ang Dios og usa ka butang nga daku, kita n’yo, kana’y daku gayud sa Iyang panan-aw.

265 Karon, kung gusto ninyo nga kanunay kining mahinumduman, gusto ko nga inyong . . . Hinumdumi ninyo kini. Ug pagmahitabo kini, nan mahimo ninyong usabon kini. Pangab-ot mo ug panguha niining usa sa gagmay’ng mga bulak inig-tingpamulak nga taliabot na niining tuiga, o kaha magkuha lang mo og usa ka ordinaryong dahon sa balili ug hawiran kana, ug moingon, “Hawiran ko kini karon, ug makita kanang butang, nga ingon ka yano, nga naghimo *niini*. Ug gusto kong makita ang utok, nga makapagpalupad og rocket ngadto sa bulan, nga makahimo niining dahon sa balili.” Kanunay mong

magkaaduna niana. Makasigurado gyud mo niana. Kanunay mong magkaaduna niana. Kita n'yo? Adunay kinabuhi ang dahon sa balili sulod niini, kita n'yo. Kana'y yano ra kaayo ug ubos ra.

²⁶⁶ Nakita n'yo, kung ang tawo usa ka dakung tawo, oo, ug kung siya'y ingon ka daku nga mamahimo niyang magpakayano ra, kita n'yo. Makaplagan niya ang Dios. Apan kung dili niya mahimong magpakayano, nan dili gayud niya makaplagan Siya. Busa kinahanglan gyud ninyo nga magpakayano lang. Karon bersekulo. . .

195. Sa Pinadayag, bersekulo 5:9, kinsa man kining hingkaplagan nga nag-awit—nanag-awit sa diha nga gikuha sa Cordero ang Basahon gikan sa—gikan sa. . . gikuha ang Basahon? Kini ba mao—mao ang gisakgaw nga mga balaan?

²⁶⁷ Dili. Pinadayag 6. . . 5:9, diay. Dili. Kung himatikdan ninyo, dili kini mao ang mga balaan. Aduna sila'y. . . Wala pa man Niya giangkong ang Iyang mga panag-iya. Kita n'yo? Dili kini mao ang mga balaan. Kung himatikdan ninyo, sila mao ang mga anciano ug ang mga Buhing-binuhat, ug nanag-awit sila.

²⁶⁸ Atong basahon kini, aron kana nga tawo. . . Ug dayon paningkamotan kong. . . Aduna pa ko'y mga tunga sa dosena dinhi, ug siguro matubag ko ra ang mga niini sulod sa pipila ka minuto. Atong tan-awon. Pinadayag 5:9. Karon basahon 'usa nato sa makadiyut lang. Tungod, ang maong tawo, karon, siya'y matinuuron man mahitungod niini, ug gusto nilang mahibalo. Matikdi.

Ug sa nakuha na niya ang—nakuha na ang basahon, ang upat ka mga buhing binuhat ug ang kaluhaang upat ka mga anciano mihapa sa atubangan sa Cordero, nga ang matag usa kanila may mga alpa, . . . mga bulawang panaksan nga napuno sa incienso, nga mao ang mga pag-ampo sa mga balaan.

Ug nanag-awit sila sa usa ka bag-ong awit, (kita n'yo, kita n'yo,) nga nagaingon, Takus ikaw sa pagkuha sa basahon, ug sa pag-abli Niini, (kita n'yo,) . . . gitubos mo kami. . .

Ug. . . gihimo kaming mga sacerdote ug mga hari. . .

²⁶⁹ Mao kana ang Langitnong grupo, dili pa ang mga tinubos. Bueno, karon.

Igsoong Branham, kung ang tanan nga. . .

Karon kadali lang. [Mihunong 'una si Igsoong Branham—Ed.] Sa hunahuna ko, ang. . . Pasayloa ko.

Igsoong Branham, kung—kung ang tanang mga diosnon, (oo), ang mga diosnon pagalalinon diha sa Pagsakgaw, asa man magagikan si Elias ug ang. . . ug si Moises?

270 Morag adunay butang nga sayup. Aduna gyu'y sayup. Mao lang gayud kana. Aduna—aduna gyu'y nahitabo. Kita n'yo? Aduna gyu'y sayup sa kung asa man. Okey ra ba ang gibati sa tanan? [Nagaingon ang kongregasyon, "Amen."—Ed.] Wala . . . Wala ba'y balatian, o unsa man?

[Usa ka igsoong lalaki sa kongregasyon ang nagaingon, "Basaha pag-usab kanang ika-9 nga bersekulo, diha sa Pinadayag 5."] Atong tan-awon, Pinadayag . . . Asa gani kana, igsoon? ["5."] 5. ["5."]

Oh, ang pangutana diay! Oh, ang maong pangutana nga bag-ohay ko lang gitubag. Karon atong tan-awon. "Ikaw . . ." Ang husto nga punto:

Ug sa iyang pag- . . . sa basahon, ang upat ka mga buhing binuhat ug ang kaluhaag upat ka mga anciano mihapa sa atubangan sa Cordero, nga ang matag usa kanila may mga alpa, ug mga bulawang panaksan nga napuno sa incienso, nga mao ang mga pag-ampo sa mga balaan.

Ug nanag-awit sila sa usa ka bag-ong awit, nga nagaingon, Takus ikaw sa pagkuha sa basahon, ug sa pag-abli sa selyo niini: kay ikaw man . . . ang gipatay, ug . . .

Ania ra! Ania kini! Nasayup diay ko kaganina. Kita n'yo?

. . . gitubos mo kami alang sa Dios pinaagi sa dugo . . . sa tanang kabanayan . . .

271 Husto kana. Karon, unsa ma'y hunahuna ninyo bahin niana? Oh, kung wala ang Presensiya sa Espiritu Santo dinhi, unsa na lang kaha? Dili gyud Niya itugot . . . Kita n'yo, ang unang bahin lang niana nga bersekulo ang akong nabasa. Kita n'yo, kana'y—kana'y usa lang ka ber- . . . o usa ka butang nga naisulat dinhi, ug gipaningkamotan ko untang humanon, samtang nagatan-aw nianang orasan. Apan namatikdan n'yo Siya nga gipugngan ako diha niana? Himaya! Kita n'yo, wala ko pa nabasa ang ubang bahin niana. Kita n'yo, ang gibasa ko dinhi, "Ug . . ." Tan-awa dinhi, "Ug sila—ug nanag-awit sila og usa ka bag-ong awit," ug mihunong na ko, kita n'yo. Apan, tan-awa dinhi, "Ang awit nga ilang giawit, nagaingon, 'Gitubos mo kami gikan sa tanang kabanayan, pinulongan, ug nasud.'" Oo, mao kana sila! Grabe! Oh, grabe! Oh, grabe! Kita n'yo kana? Ug, lain pa'y ato, aduna pa diay usa ka pangutana dinhi, usab.

196. Mahimo mo bang (k-o-n-t-r-o- . . .) kontrolon kadtong gihatagan . . .? Bueno, kontrolon "kadtong mga gihatagan og maputi nga mga bisti," sa Pinadayag 6:11, sa "niadtong nanaglaba sa ilang mga bisti sa Dugo sa Cordero?"

272 Karon atong tan-awon, ang Pinadayag 6. Dili ko mahimong dalion kini, mga higala, sama niini dinhi, kita n'yo, tungod kay

mahimo kining. . . basin sayup ang akong matubag. Karon, ayaw Niya—ayaw gyud Niyang buhaton ko ang ingon-ana. Tinuod kana, busa tabangan unta ako. Nasayod ang Balaang Espiritu sa Dios nga tinuod kana. Kita n'yo? Basta ako. . . Aduna gyu'y butang. . . ako—ako nagtan-aw man gud ko niana. . . nagtan-aw ko sa orasan, alas onse-traynta na, ug nahunahuna ko, “Kung dili ko magdali karon, nan dili ko na maiampo ang mga may sakit.” Ug paningkamotan kong buhaton kana. Tungod ako. . . Ug ang akong hunahuna gayud. . . dili ko mahimong. . .

²⁷³ Timan-i ninyo, nga kinahanglan ninyong sabton nga, ako'y—tawo ra man gud ko, kita n'yo. Ug ako—pito na ka adlaw nga anaa ako dinha, ug ang akong. . . Ug aduna ko'y usa pa ka butang, unyang hapon, nga kinahanglan ko pang hibaloon sa Dios.

²⁷⁴ Apan, Siya'y determinado gayud nga dili ko mahimo ang maong sayup, mao nga gisenyanan nila ako nga balikan pagbasa ang uban pa nga bahin niana nga bersekulo. Ako gayu'y. . . Nabati ko nga mora'g aduna gyu'y sa kung unsang Butang nga ginapabalik ako, ug miingon, “Baliki! Baliki!”

Nahunahuna ko, “Balikan? Unsa? Mohunong ko mismo nga kinahanglan ko nang sugdan ang pag-ampo para sa mga may sakit? Apan unsa—unsa kaha kini? Unsa kaha'y akong nabuhat?”

Ug sa dihang basahon ko na unta kana, adunay miingon, “Basaha ang bersekulo pag-usab.” Ug gibasa ko kana pag-usab. Ug dinha, sa ubos niini nga pangutana, mao kana, kita n'yo, “Pinadayag 6.”

²⁷⁵ Kita n'yo, gibasa ko ang unang bahin. Parehas gyud kana kon paminawon, sa pinakauna, kita n'yo, “Ug nanag-awit sila og usa ka bag-ong awit.”

Apan dinhi sa ubos, kita n'yo kung unsa kini? Ang sunod, sa pagpadayon, “Gitubos kami.” Oo, ang Pangasaw-onon kana, ang gisagaw nga mga balaan. “Mahimo mo bang. . .” Ug ania, sigurado gayud, ang—bitbit na sa Cordero ang Basahon diha sa Iyang kamot. Human na Niyang gibiyaan ang Trono sa tigpataliwala nga grasya. Kita n'yo? Nakita n'yo kung giunsa kana pagbantay sa Balaang Espiritu? Tungod, eksaktong, mao ra kana nga butang ang gisulti ko niadtong miaging gabii.

²⁷⁶ Sa dihang nagpakigsulti Siya kanako sulod sa lawak, ug mianhi ako dinhi ug nagwali kaninyong tanan, nga, “Sa dihang mibiya na ang Cordero sa maong dapit.” Oh, grabe! Karon siguro mokuha lang kita og usa ka teksto. Kita n'yo, “Gibiyaan sa Cordero ang Iyang lingkoran ug miadto didto,” kita n'yo, sumala sa akong nasabtan didto sa dihang atua Siya, kanang Kahayag, nga mao si Cristo; sa dihang atua Siya, og gisulti kini. Sa dihang biyaan na sa Cordero kanang lingkoran sa Trono,

ingon nga usa ka Tigpataliwala, dayon moanhi Siya, ug matapos na ang Adlaw sa Katubsanan alang sa Iglesia.

²⁷⁷ Ang sunod nga pagaablihan nga katubsanan, alang na sa mga Judio, ang usa ka gatus kap-atan ug upat ka libo. Husto ba kana? Tungod nagsaad man Siya nga putlon Niya ang kahoy, kabalo na mo.

²⁷⁸ Karon, ania, ania Siya karon nga nagaabot, ang Cordero, ug dayon matapos na ang Adlaw sa Katubsanan. Ug ang tanan nga mga pagaluwason, giluwason na ug nahisulat na sa Basahon, ug ania Siya nga ginaablihan ang Basahon. Oo!

²⁷⁹ Oh, salamat Kanimong, Ginoo. Kita n'yo? Pasayloa ang Imong nerbiyoso nga alagad sa pagpaninguha nga magdali sa usa ka butang.

Karon, mahimo mo bang tugotan “kadtong mga gihatagan og maputi nga mga bisti,” sa Pinadayag 6:11 . . .

²⁸⁰ Karon atong tan-awon, ang 6:11. Sige. Hain na man kita niini karon? “Maputi nga mga bisti,” oo, kana mao ang—ang gipanglansang, nga anaa ilalum sa halaran. Ang—ang mga Judio, tali niana nga panahon, “Gihatagan sila og maputi nga mga bisti.”

. . . uban “niadtong nanaglaba sa ilang mga bisti sa Dugo sa Cordero,” sa Pinadayag 7:14?

²⁸¹ Dili. Bueno, lahi kana, sigurado gayud. Tungod, kita n'yo, dinhi, hingsayran nato *dinhi*, nga “kini sila gihatagan og maputi nga mga bisti,” dinhi niini nga panahon. “Gihatagan sila og maputi nga mga bisti,” sila mismo, tungod sa grasya. Ug kini sila *dinhi*, “Gilabhan nila ang ilang mga bisti sa Dugo sa Cordero,” ug dinhi sa Pinadayag, kini sila mao kanang “dakung panon nga mitungha sa atubangan sa Dios, gikan sa tanang kabanayan, mga pinulongan, ug mga kanasuran.” Ug *kini sila* eksaktong nagapahinungod gayud ngadto sa mga martir, ang mga Judio, nakita n'yo. Karon, karon husto kana, ha.

197. Igsoong Branham, kung ang tanang mga diosnon pagalalinon diha sa Pagsakgaw, asa man magagikan si Elias ug si Moises? Sila ba'y mga Judio? O ang atong Elias ba, nga gikahatag kanato, mahimong—mahimong uban kanila?

²⁸² Dili. Ang—ang Gentil nga pagadihogan niini nga espiritu, aron tawgon pagawas ang mga Gentil, pagalalinon man usab. Tungod, nakita n'yo, ang tibuok Iglesia, tanan, gilalin na nianang panahona. Ug kining duha ka propeta, sa—sa ika-11 nga kapitulo, papanaugon na. Ug ang adlaw sa grasya tapos na sa Gentil, ug ipadala na ngadto sa mga Judio. Dili, dili kana mamahimong pareho ra nga tawo. Karon, ako—sigurado gayud ako niana. Karon hinumdumi, nga mao lang kini ang kutob sa akong nahibaloan.

Tan-awon nato kung unsa kini, ang ginaingon dinhi. Pangutana, “Ang trigo ba ug ang bino. . . ?” Oh, “Ang. . . ?” T-r-i-g-o. Dili, sa hunahuna ko ang buut ipasabot niini—niini, “Unsa ang. . . ?” Pero wala man gud kini og “unsa” dinha. Ginaingon lang:

198. Ang trigo ba ug ang bino, o ang trigo ug bino, unsa man ang. . . sa Pinadayag 6:6?

Tan-awon nato kung unsa kini, pag mabasa ko na kini, dinhi karon.

Ug nadungog ko ang usa ka tingog diha sa taliwala sa upat ka mga buhing binuhat nga nagaingon, Kinahanglan usa ka denario ang bili sa usa ka litrong trigo, ug kinahanglan usa ka denario ang bili sa usa ka litrong cebada; . . . ayaw pag-unsaa ang bino ug . . . lana.

²⁸³ Siguro ginapasabot niana “ang trigo ug ang bino.” Aduna kana’y kahilambigitan, sa usa’g usa.

O kaha, ang usa ka simbolo, sa bino nga ginagamit diha sa lamesa sa komunyón, sa Pin-. . . sa Unang Mga Taga-Corinto 11:24?

²⁸⁴ “Ang bino ba—ang bino. . . ?” Dili. Ang usa niana usa man ka espirituwal nga simbolo, kita n’yo. Ug ang usa pa mao mismo ang—ang kapadayagan sa Pulong.

199. Mahimo kaha nga ang hinungdan nga daghan ang mga masakiton, tungod kay wala nato ginaila ang Lawas sa Ginoo? (Husto!)

. . . apan karon napadayag na pinaagi sa pag-abli sa Ikaunom nga Selyo?

²⁸⁵ Karon, tan-awon nato. Tan-awon ko lang kung nakuha ko ba kini karon. Dili kamo ang saypan; kondili ako. Wala man ninyo. . . Maayo man ang inyong pagkasulat niini; ako lang gyud ang saypan.

Mahimo kaha nga ang hinungdan nga daghan ang mga masakiton, tungod kay wala nato ginaila ang Lawas sa Ginoo? (Aduna man kana’y marka nga pangutana, sa tumoy niana.)

²⁸⁶ Bueno, nagaingon ang Kasulatan, nga, “Daghan kaninyo ang mga masakiton ug mga maluya, tungod sa pagpang-ila sa Lawas sa Ginoo.” Eksakto gyud kana. Tungod, kita n’yo, ang Lawas sa Ginoo mao man ang Pangasaw-onon. Ug daghan kanila ang nangahisalaag, ug wala na sila nagasunod Niini. Tinuod kana. Kita n’yo, dili sila kabalo kung unsaon nila pagminatarung sa ilang mga kaugalingon. Nagakinabuhi sila og bisan unsa na lang nga matang sa pagkinabuhi; ug moambit pa sa komunyón ug mga ingon-niana. Dili kana husto. Kita n’yo? Pag moambit ang mga tawo sa komunyón, nga nagapamakak ug nagapangawat

ug nagahuboghubog, ug, kana—kana—malisud kana. Ayaw gyud ninyo buhata kana. Kita n'yo?

...apan karon napadayag na pinaagi sa pag-abli sa Ikaunom nga Selyo?

²⁸⁷ “Ang pag-abli sa Ikaunom nga Selyo.” Atong tan-awon karon. Dili. Karon, hingsayran n'yo na, nga ang pag-abli sa Ikaunom nga Selyo dinhi, mao'y alang sa mga Judio. Kita n'yo, human nang gisakgaw ang—ang Iglesia. Mao kini ang panahon sa Kasakitan, busa dili kini mamahimong pareho. Dili. Dili. Dili gayud.

²⁸⁸ Ang usa kanila mao ang espirituwal nga bino, mao kana ang kapadayagan sa Pulong, kung ingon-ana nagakadasig ang—ang magtotoo tungod sa kapadayagan sa Pulong. Ug ang usa pa mao ang simbolo sa Dugo ni Jesus, nga ginaambit diha sa lamesa sa Ginoo. Karon, mao kana ang kutob sa akong nasabtan niini.

200. Aduna ba'y tawo nga dili predestinado ang makadawat sa Ginoo? Kung makadawat man sila, mahulog pa ba sila?

Dili sila mahulog kung sila gayu'y mga predestinado. Dili. Kita n'yo, dili sila mahulog.

201. Asa man ang Kasulatan nga nagapakita nga ang...nga pagalimbongan sa Katolisismo ang mga Judio ug angkonon ang ilang bahandi?

²⁸⁹ Karon, “Asa man gyud kanang ginaingon nga—nga—nga ang mapintas nga mananap manglimbong alang sa bahandi?” Dili gyud ingon niana ang pagkasulti. Apan giasumir lang nato nga kana mao'y... Bueno, niadtong miaging gabii, kon inyong mahinumduman. Mahimo ninyong paminawon og ayo ang teyp. Wala gayud ko miingon nga mao kana ang buhaton nila. Ingon ko... Kita n'yo, ang mga Katoliko mao ang pinakadato nga grupo sa kalibutan. Wala gyu'y si kinsa man nga sama nila. Ug kung unsa ma'y wala kanila, ang tanang uban pa niini anaa sa mga Judio.

²⁹⁰ Ingon niini ang ekomoniya sa niini nga nasud karon... Nangabuhi kita karon mismo sa kuwarta sa buhis, sumala sa *Lifeline*, gikan sa mga buhis (sumala kana mismo sa Washington, DC) nga pagakolektahon pa lang kuwarenta ka tuig gikan karon. Mao kana ang atong ginagastos sa karon. Ingon niana kita ka utangan, nga ginautang na, kita n'yo, ang mga buhis nga pagakolektahon pa lang kuwarenta ka tuig gikan karon. Nabangkaruta na ang nasud. Impas na kini.

²⁹¹ Karon, si Castro, ang bugtong maalamon nga butang nga iyang gibuhay, mao'y sa dihang naghimo-himo siya og iyahang panalapi ug gibayaran ang mga balayronon, ang mga bond, ug gisunog ang mga niini, ug—ug giusab ang panalapi. Mao lang kadto ang bugtong niyang mahimo.

Ug adunay usa na lang ka butang ang nahibilin para buhaton niining Estados Unidos. Karon hinumdumi, si William Branham kini, kita n'yo, nga nagasulti. Akoa kining ideya. Pagpanalagma lang kini, ingon nga ginatan-aw kana basi sa natural nga baruganan, nga tingali'g milyon ka milya ka halayo. Nagatoo ako nga dinha mismo, niana nga kuwarta. . . “Ang paghigugma sa salapi mao ang gamut sa tanang kadautan.” Ug nagatoo ko nga diha niana mismo magasugod ang maong butang.

²⁹² Karon, ang iglesiang Katoliko kaniadto, tungod sa pagpabayad para sa misa, ug uban pa, mao na ang nagakupot sa bahandi sa kalibutan. Hinumdumi ninyo, nga miingon ang Biblia, “Siya’y dato,” ug kung unsa siya. Ug, hinumdumi, nga dili lamang gikan sa usa ka nasud. Siya’y nadato tungod mismo sa matag nasud nga anaa ilalum sa Langit. Nagakaylap siya. Aduna siya’y salapi. Karon, kung unsa ma’y wala kanila, aduna ang Wall Street, nga kontrolado sa mga Judio.

²⁹³ Karon, ug hinumdumi pud ninyo, nakuha ni Jacob ang kuwarta kaniadtong mibalik na siya (nahibaloan nato kana kagabii) ug nahimong Israel. Aduna gayud siya’y kuwarta. Apan ang iyang kuwarta wala gayu’y unsa man nga mapalit para kaniya, kita n'yo, ngadto kang Esau. Aduna ma’y kuwarta si Esau, usab. Kita n'yo, ang parehong magkakontrahanay, ug—ug ang usa. . . Kita n'yo, kini’y ingon gayud ka eksakto.

²⁹⁴ Karon matikdi dinhi. Ingon ko tingali'g gustohon nilang maghiusa na lang tungod sa panalapi, ug ang—ug ilogon sa Romanong gahum ang gahum sa Judio, ug ang panalapi, nga dili na ginasunod sa ilang pagpakigsaad. Mahimong dili mismong ingon niana ang mahitabo. Kita n'yo, nasayod ko nga dili gyud nila sundon ang maong pagpakigsaad, apan ako—wala lang masayod sa kung unsay hinungdan, tungod wala pa napadayag kanako ang mahitungod sa kung unsay ilang buhaton.

²⁹⁵ Apan tan-awa. Karon, kung karong panahona, karon unsa na lang kaha niining panahona, ang butang na lang nga puede natong buhaton, nga mahimo natong buhaton? Kung ang ginagastos nato nga mga buhis (kung husto man gani kana nga pahayag) gikan sa panalapi, gikan sa kuwarta sa buhis nga pagakolektahon pa lang kuwarenta ka tuig gikan karon, nakita n'yo, nan ang atong bulawan. . . Human na natong nagasto kana. Nabangkaruta na kita. Wala na kita’y kuwarta. Ug nagakinabuhi na lang kita sa maayong ngalan nga aduna kita kaniadto.

²⁹⁶ Ingon niana usab ang ginabuhat sa iglesia sa karon, ang iglesia; dili ang Pangasaw-onon. Nagakinabuhi na lang ang iglesia sa maayong dungog nga aduna kini kaniadto ilalum sa ministerio sa panahon sa leon. “Kami ang Iglesia! Kami ang inahan nga Iglesia! Kami ang nagsugod. . .” Husto kana.

Kita n'yo? Nagakinabuhi kini basi na lang sa kanhing maayong dungog!

²⁹⁷ Ang Methodist nagakinabuhi usab sa ilang maayong ngalan kaniadto. Ang Baptist nagakinabuhi sa ilang maayong ngalan kaniadto. Ug ang Pentecostal nagakinabuhi usab sa ilang kanhing maayong ngalan. “Himaya sa Dios! Dugay nga panahon na kaniadto, sa diha nga ang mga balaan kaniadto nanagsayaw diha sa Espiritu, ug kung unsa nga sila . . . Gibuhat kaniadto sa Ginoo ang *ingon-niini* ug *ingon-niana*.” Kana, butang kana nga sa kaniadto pa. “Dagku na kitang tanan karon, igsoon.” Oh, grabe! Kita n'yo? Bug-os na lang nakabasi sa kanhing maayong ngalan!

²⁹⁸ Kini nga nasud nagakinabuhi—nagakinabuhi sa usa ka kanhing maayong ngalan kung unsa ang unang mga amahan kaniadto, kita n'yo, ug mao kana'y hinungdan nga nagadahum kita nga mamaluwas kita. Ngani wala man gipasidunggan sa Dios ang Israel sa kung unsa sila kaniadto, kung unsay ilang naagian; kung unsa sila mismo niadtong panahona! Matikdi.

²⁹⁹ Apan, karon, ania kung unsay akong ginahunahuna, kung unsay akong—akong ginahunahuna nga mahitabo. Bueno, dili man siguro mamaingon niana. Nagatoo ko nga moabot ang panahon nga mapugos gyud kita nga atubangon ang maong problema. Ug pagmahitabo man kanang, ingon-niana, imbis nga atong usabon ang panalapi. . . Unsa ma'y epekto niana ngadto sa Philip Morris? Unsa ma'y epekto niana ngadto sa—sa mga kumpanya sa whiskey? Unsa ma'y epekto niana ngadto sa industriya sa puthaw? Unsa ma'y epekto niana sa tibuok komersyo? Unsa gyu'y epekto niana? Makapabangkaruta kana kanila. Mabangkaruta gayud sila. Apan, kung, “Mahimo ra natong mautang kana nga kuwarta.” Nakita n'yo kung unsa siya ka utokan?

³⁰⁰ Dayon ibaligya na ang nasud ngadto sa maong iglesia. Ug kung ingon-ana ang iglesia ug ang estado mahiusa na pag-usab, ug mao na kana. Kita n'yo? Ingon-niana kana. Himatikdi. Sige. Karon, sa niining:

202. Kung ang usa ka tawo anaa sa usa ka asosasyong organisasyon sa atong gobyerno, ug puede man siyang magsulti sa dikta sa kaugalingon niyang kasingkasing, o kaha ang Kamatuoran sa kaulahi-ang-adlaw, matawag ba siya gihapon ingon nga usa sa “mga bigaon”?

³⁰¹ Atong tan-awon. “Kung ang usa ka tawo diha sa asosasyong organisasyon. . .?” Bueno, kita n'yo, ang asosasyong organisasyon; ang—ang organisasyon, nga gikahatagan kini og mga katungod sa gobyerno, sa pagsulti. Kita n'yo, wala kana'y unsa man nga kahilambigitan sa iyang kasingkasing. Kita n'yo? Karon, kung siya'y usa ka tinuod nga magtotoo, ug natawo sa Espiritu sa Dios, moabot ang panahon o unsa man

nga pagasawayon siya. Kita n'yo? Dili puedeng klaro kaayo ug dayon dili niya kini makita.

³⁰² Karon, gusto ko nga inyong... Kita n'yo, kinahanglan n'yong hinumduman kini, higala, nga ang Dios—ang Dios wala gayud nagabuhat niini, o nabuhat kini sa unsa mang panahon, kutob sa akong mahinumduman, kita n'yo, apan ang... .

³⁰³ Matikdi, nga si Jesus mao ang—mao ang sentrong tema niining tanan, tungod Siya ang Dios, Emmanuel, nga nahimong unod. Karon, tan-awa kining—kining Lalaking, si Jesus. Kaniadtong... Nasayod ba mo, nga sa dihang mianhi Siya sa yuta kaniadto, wala ra, sa hunahuna ko, og usa sa napulo ka bahin sa kalibutan ang nasayod nga ania diay Siya?

Nasayod ba mo, nga sa dihang miabot kadto nga mag-uuna, sa diha nga ang tanan “nga mga kabukiran,” ug ang mga butang mamahitabo, wala ra og usa sa usa ka gatus sa populasyon sa Israel, sa hunahuna ko, ang nasayod niadto? Dili ba kana makapatingala?

³⁰⁴ Aba, aduna na baya'y mga Judio ug uban pa, ug mga tawo sa tibuok kalibutan. Karon, hinumdumi, nga miabot si Jesus aron mamahimong Saksi, ingon nga usa ka Manluluwas sa kalibutan. Husto ba kana? Apan, aduna gayud og mga tawo, daghang mga tawo, daghang mga tawo, daghang mga kaliwatan, daghang mga tawo, nga wala man lang og kasayoran mahitungod niadto. Nagpadayon lang, maingon nga ang kalibutan usab wala gayu'y kasayoran mahitungod niadto; apan, niadtong panahona mismo, nagakahitabo kadto sa kalibutan. Kita n'yo?

³⁰⁵ Nganong wala man Niya tugoti nga mahibalo sila? Miabot Siya, ug ang mga gitagana-nang-daan ngadto sa Kinabuhing Walay Katapusan mao ra ang mga midawat Kaniya. Wala ma'y kapuslanan nga mosulti pa og unsa man sa tanang uban pa kanila, tungod kay dili man gihapon Niya mahimong luwason sila, tungod nga dili man sila tulubsonon. Nganong ingon-niadto man, nga kadtong mga sacerdote atua man unta mismo nga nanagtindog? Tungod, kinahanglan man Niyang moadto niadtong lugara tungod kay ang mga gitagana-nang-daan didto man gipangbutang, sa palibot didto, mao nga kinahanglan Niyang magwali ngadto kanila ingon nga usa ka pundok.

³⁰⁶ Ug ang mga bantugang eskolar nga unta nakaila Kaniya, nanag-ingon, “Kining Tawhana si Beelzebub. Dili kami mosugot nga pangulohan kami niining Tawhana, ug uban pa, kita n'yo. Dili kami motugot niana.”

Apan ang usa ka luoy'ng bigaon, nga may Kinabuhing diha kaniya, gitaga-nang-daan ngadto sa Kinabuhing Walay Katapusan, ug ang iyang ngalan imortal nang nahisgotan diha sa Pulong sa Dios. Miduol didto, ug, sa unang higayon nga miigo kadtong Kahayag niadtong gamay'ng binhi, sa gilayon naila

niya kini. [Ginapalagitik ni Igsoong Branham ang iyang tudlo sa makausa—Ed.]

³⁰⁷ Tan-awa, usa ka tigulang nga mangingisda ang miadto didto. Atua Siya nga nagtindog didto, nagapamuhat og mga ilhanan ug mga katingalahan, ug—ug ginasulti sa nagkalainlaing mga tawo ang mga tinago sa ilang mga kasingkasing, ug ginapahayag ang Iyang Kaugalingon.

Ug, aba, aduna pud og mga Fariseo nga nanagtindog didto, ug miingon, “Kining Tawhana si Beelzebub.” Kinahanglan man gud nilang motubag sa ilang kongregasyon.

³⁰⁸ Ang tanan kanila nga nanagtindog didto, “Dr. Jones, mahimo ka bang moduol didto ug paminawon kini nga Tawo? Siya—Siya mora’g kahibalo gyud Siya kung unsay Iyang ginahisgotan. Dili Siya nagasulti nga sama sa ordinaryong mga tawo.”

³⁰⁹ “Sige paminawon ko Siya.” Miduol siya didto, kita n’yo. Oo, ang Dios—dili na siya maabot sa Dios.

Ug atua nagatindog Siya didto, ug miingon Siya . . .

Miingon sila, “Karon tan-awa dinha. Tan-awa dinha. Anaay usa ka lalaki nga nagaduol. Mao kana ang usa sa Iyang mga tinun-an. Anaay usa na usab ka lalaki nga nagaduol karon. Karon, ang ngalan niana nga lalaki, mao si Andres. Hinumdumi. Oh, mahinumduman n’yo pa ba ang tigulang—ang tigulang nga mga mangingisda dinhing dapita? Sila kana. Oo, anaa—anaa pud si Simon, ang iyang igsoon. Kita n’yo? Ug kana’y—mga anak kana sa tigulang nga si Jonas. Karon atua sila . . . Tan-awa, siya—nagdala pud siya og usa ka lalaki ngadto Kaniya. Kinsa kaha kana? Oo, tan-awon ’ta kung unsay Iyang buhaton karon. Siya’y—siya na man ang mosunod dinha.” Ug miduol na siya.

Ug miingon si Jesus, “Ang imong ngalan mao si Simon, ug anak ka ni Jonas.”

³¹⁰ “Si Beelzebub gyud kanang Tawhana! Kita n’yo, aduna gyu’y usa ka matang sa espiritu diha Kaniya. Usa Siya ka salikwaut nga Tawo. Kita n’yo? Sugod karon, ayaw na gyud kamo paminaw sa walay kapuslanang butang sama niana, kita n’yo. Pahilayo kamo niana. Dili na ko motambong pa sa niini nga mga panagtigum, dili na gyud, kita n’yo. Sa dihadiha nga matapos na kining butanga, manggawas na kita dinhi. Dili na gyud kita moanhi, dinhi pag-usab.” Kita n’yo? Ngano man? Bueno, mao kana ang iyang gihunahuna, ug bisan pa man mao na man diay kadto. Tan-awa, ang mao mismong mga tawo nga gianhian Niya mao ra ang nagpalansang Kaniya. Kita n’yo?

³¹¹ Apan adunay usa ka luoy’ng bigaon nga ginasipa-sipa lang sa tanan! Dili nga ginasuportahan ko ang prostitusyon. Dili, gayud! Apan ginapakita ko lang kaninyo ang Binhi nga gitagana-nang-daan.

312 Matikdi kining lalaki dinhi, kining tigulang na nga mangingisda, dili ba siya. . . Miingon ang Biblia nga kini siya walay-nakat-onan. Husto ba kana? Dili lamang kana, kondili siya’y walay-hibangkaagan usab. Karon, husto ba kana o sayup? Oh, kung mahimo lang unta kitang mga walay-hibangkaagan sa daghan niining mga butang nga abi nato may kahibalo kita. Kita n’yo? Oo. Kita n’yo, siya’y parehong walay-hibangkaagan ug walay-nakat-onan. Ug dayon miduol siya didto sa Presensiya ni Ginoong Jesus, ug gisultihan Niya siya kung si kinsa siya. Niadto mismong tungora mao na gyud kadto.

313 Karon, unsa ma’y argumento niining usa pa ka lalaki batok niana? “Hala, tan-awa, gitoohan niya kana. Tan-awa gud ninyo kung kinsa kana. Nasayod na man mo kung kinsa kana. Bueno, kanang tawhana wala gyu’y. . . Aba—aba, siya’y usa ra ka mangingisda. Aba, dili gani siya kahibalo sa iyang ABC. Mipalit ako og isda gikan kaniya; dili gani siya makasulat kanako og usa ka resibo. Kana, kita n’yo, ingon niana siya nga matang sa tawo! Ingon niana ang matang sa mga tawo nga mopatalinghug sa usa ka butang nga sama Niana.” Salamat sa Ginoo. Amen. Kita n’yo? “Aba—aba, dili siya. . . Tan-awa ang iyang amahan; siya’y walay-hibangkaagan usab. Wala man gani niya sila gipaeskwela.” Apan mao kana ang usa nga gipaeskwela ni Jesus; gitudloan sa paagi nga gusto Niya para kaniya.

314 Dili nga ginasuportahan ko ang dili pagpaeskwela, ha. Nanghinaut ko nga nasabtan ninyo. Apan aduna lang gyu’y usa ka tipo, kita n’yo, nga makuha ninyo diha niana. Mao kana ang matang, ug hinungdan nga milagpas ra kana sa ibabaw nila.

315 Ug kabalo ba mo kung unsa? Walay usa. . . Akong, masulti nga wala ra og usa sa tulo ka bahin sa tanang mga Judio sa yuta kaniadto ang nasayod og unsa man mahitungod Kaniya nga miabot na. Ug—ug, dayon, usa—usa ra sa lima nianang tulo ka bahin ang nagpatalinghug Kaniya. Ug, dayon, usa ra pud sa usa ka gatus nianang usa sa lima ka bahin ang midawat Niini. Nasayod na kamo kung unsa ra ka daghan ang aduna Siya. Aduna Siya og dose ra nga nanagbarug didto sa krus, gikan sa tibuok pundok. Asa man ang uban pa kanila? Kita n’yo? Mibiya ang setenta.

316 Bueno, samtang nagapang-ayo pa Siya sa mga may sakit, ug nagasige adto didto, nga wala nagasulti og unsa man mahitungod sa Iyang Doktrina; nagpadayon lang gyud Siya, sa pagpang-ayo sa mga may sakit ug tanan na. Oh, grabe! Kadto, ang Espiritu sa Dios kadto nga anaa Kaniya. Nagatoo ba kamo niana? [Nagaingon ang kongregasyon, “Amen.”—Ed.] Sa dihang nagapang-ayo pa Siya sa mga may sakit, pagkamaanindot gayud! “Usa kana ka gamhanang Rabbi. Aba, kamong mga kaigsoonan, angay n’yong dapiton Siya sa inyong iglesia. Aba, pag-hisgotan ang mahitungod sa gahum, kana nga Lalaki tinuod

gyud nga makaayo sa mga may sakit! Kinahanglan n'yo gyud nga makita. Aduna gyud Siya'y gasa sa pagpang-ayo."

³¹⁷ Bueno, siyempre, magkaaduna man gyud sila og pipila ka mga pagsundog-sundog niana. Ania na sila nga nagauban-uban, tungod ang matag pundok kinahanglan man gud nga aduna sila og ilahang sama niana nga tawo.

Ania Siya nga nagaabot. Ug dayon, mahibaloan mo na lang, usa ka adlaw milingkod Siya.

"Oh, sigurado, Rabbi, mouban kami Kanimo."

³¹⁸ "Sige, lingkod 'usa. Moadto na ta." Bueno, gipadala ang setenta, ug uban pa.

Dayon usa ka adlaw, human nga nabuhat ang usa ka dakung milagro, milingkod Siya ug sugod Niyang gisulti kanila ang Pulong, kita n'yo. "Sa pagsugod og tingog sa..." Oo. Hinayhinay Niyang gisultihan sila sa Pulong, sa Kamatuoran.

Ingon sila, "Ah, bueno, kadali lang! Hum! Wala man ko mahibalo mahitungod *niini*." Sukwahi kadto sa ilang doktrina. Miingon, "Bueno, kahibalo ko nga mibiya na kita sa sinagoga ug tanan nang ingon-niana, apan tingali'g kita—nasayup ra kita, mga igsoon. Mas maayo pang mamalik na lang 'ta, tungod kana nga Tawo nagasulti ra man og mga talinghaga. Medyo usa Siya ka salikwaut nga Tawo. Dili ko man *kana* masabtan." Kita n'yo? Unsa man kadto? Ang maong binhi dili gayud predestinado sa sugod pa lang.

³¹⁹ Dayon, mahibaloan mo na lang, aduna Siya'y usa ka gamay'ng pundok sa mga ministro, ug nagpakigsulti sa mga ministro. Ingon sila, "Ah! Hum! Mas maayo pang mamalik na lang 'ta, usab, ug mobalik ug mosulod na sab sa organisasyon, balikan na lang nato ang atong mga papeles, kita n'yo. Tungod, kini nga Lalaki man gud, aba, kinsa ba'y makasabot sa usa ka Tawo nga sama niana? Ginasulti Niya ang *ingon-niini* dinhi, ug ginasulti pud Niya ang *ingon-niini* dinhi. Ah!"

³²⁰ Ang uban kanila wala gyud makasabot Niini sama niana. Nagapakita Siya og mga talinghaga ngadto sa pipila kanila, apan dili sa uban.

Busa mingbiya sila. Dayon milingi Siya, mitan-aw sa dose nga nagatindog didto. Miingon, "Gusto n'yo bang mobiya, usab?" Kita n'yo?

³²¹ Karon matikdi. Miingon si Pedro, "Kahibalo ba Ka? Dugay na akong nagatambong nianang karaang dapit didto. Asa pa man sa kalibutan ako mopaingon? Asa man ako moadto? Asa—asa pa man ko mahimong moadto? Human nga nabuhat ko—ko dinhi ang usa ka buluhaton... Ug dili na ko mahimong mobalik pa nianang basurahan pag-usab, diin ang tanang matang nga kahugawan sa kalibutan anaa dinha. Kita n'yo? Ako—ako... Asa pa man diay ko mopaingon? Ako—dili gayud ako mobiya."

³²² Ingon Niya, “Kung ingon-ana, sige, ari ka, umuban ka.” Karon, mao kana. Kita n’yo? Unsa man ang nahitabo, kaniadto? Dose ra gikan sa halos duha ug tunga ka milyon. Ug ang Manluluwas sa kalibutan, gikan sa binilyon, bisan pa niana, mapainubsanon ra, kita n’yo. Magpabilin lang nga mapainubsanon. Matikdi.

Karon, sa tanan niadtong mga Fariseo; ug kadtong luoy’ng bigaon nga miadto didto. Miingon ang maong babaye, “Aba, siguradong usa gyud Ikaw ka propeta! Karon, nasayod kami nga moabot ang Mesias, ug pagmoabot na Siya buhaton Niya kana.”

Ingon Niya, “Ako mao Siya.”

³²³ Ingon ang babaye, “Mao na kini,” ug milakaw na siya. Sulayan man ninyong pugngan siya kaniadto? Dili gyud ninyo mahimo.

203. Igsoong Branham, mga pagpangumosta diha sa Ngalan ni Ginoong Jesus. Palihog isaysay kung kinsa ang maong tawo, diha sa Mateo 22:11, ang tawo nga wala nagsul-ob og bisting pangkasal, nagsul-ob og bisting pangkasal. Nasayod ko nga kini nga tawo mahimong—dili gyud mahimong makasulod sa Langit kon walay sul-ob nga bisting pangkasal. Kini’y usa ra ka bisita, kahibalo ko, dili ang Pangasaw-onon.

³²⁴ Oo, husto kana. Mahimong usa siya ka. . . Oo, nakalusot ra siya. Kita n’yo? Karon tan-awa. Karon, ako. . . Mahimong mogahin kini og usa ka tibuok wali mahitungod niana.

Karon aduna pa ko’y diyos minutos, aron mag-ampo para sa mga may sakit ug tapuson kini. Ug natubag ko na man ang katunga niini, siguro. Matikdi. Apan ako—kinahanglan ko nang magdali, oo, sigurado gayud, human niining usa. Kita n’yo?

³²⁵ Ania kung unsay nahitabo, kung nasayod kamo sa sidlakanong mga gawi. Kita n’yo? Pag ang usa ka pamanhonon nagahatag og mga imbitasyon para sa iyang kasal, nagahatag siya og ingon lang ka daghan nga mga imbitasyon. Ug sa matag imbitasyon nga gipadala niya, aduna siya’y usa ka tigbantay nga nagatindog sa pultahan, aron sul-oban ang giimbita og usa ka bisti. Kung siya’y kabus man, o kung unsa man siya, aduna siya’y. . . kung siya’y dato o kabus, kung unsa man, siya, ang tanan, kinahanglan magsul-ob niining bisting pangkasal.

³²⁶ Pag-anaa na sila sa pultahan, ipasul-ob nila kini kaniya, og ginatabonan niini kung unsa man siya sa gawas. Imbitado siya, siya’y usa man ka milyonaryo o kaha siya’y usa man ka kabus, siya ma’y usa ka mag-uuma, tigkalot, o unsa man siya, o kaha usa ka impluwensiyado nga tawo, siya’y—anaa siya nga nakasul-ob sa maong bisti. Tungod kay, ginapasul-ob man kaniya ang maong bisti diha pa lang sa pultahan, sa pagsulod niya diha sa pultahan.

³²⁷ Karon, basaha ang San Juan 10, nagatoo ko nga nakasulat dinha, Siya miingon, “Ako mao ang pultahan.” Kita n’yo? “Ako mao ang pultahan nga ginasudlan. . . nga inyong ginasudlan.” Karon nagatindog siya dinha sa pultahan, ug ania ang maong Tawo nga magsul-ob kaniya sa bisti, ang Balaang Espiritu, aron hatagan siya og bisti sa pagkamatarung sa diha nga mosulod na siya.

³²⁸ Karon, miadto kini nga tawo pinaagi sa kung unsa man nga organisasyon, luyo sa bintana dinha, usa ka lungag-lutsanan. Ug miduol siya sa may lamesa ug milingkod. Ug dayon sa dihang miabot ang Pamanhonon ug pagtan-aw Niya sa palibot, ang maong tawo usa ka. . . siya. . . *Kini’y* ang mga salikwaut nga pato, kaniadto, karon *siya* ang salikwaut nga pato didto. Kita n’yo? “Unsa ma’y ginabuhat mo dinhi nga sama niana, nga walay bautismo sa Espiritu Santo ug tanan na niining mga butang? Giunsa mo man pagpakasulod dinhi?” Bueno, nakasulod ra siya sa kung asa man nga dili pinaagi sa pultahan. Ug mitambong siya nga walay tarung nga imbitasyon. Kita n’yo? Misulod siya pinaagi sa kung unsa nga sistemang pang-edukasyon, kita n’yo, o mora’g ingon niana. Nakasulod siya.

³²⁹ Ug miingon Siya ngadto kanila, “Gapusa n’yo siya, ang kamot ug ang tiil; itambog siya pagawas gikan dinhi, ngadto sa kangitngitan sa gawas, kon diin adunay paghilak, ug pagdanguyngoy, ug pagkagut sa mga ngipon.” Kita n’yo? Nahidangat siya sa panahon sa Kasakitan. Kita n’yo? Wala siya misulod agi sa maong pultahan. Ingon-niadto, sige. Pangutana:

204. Ang Elias ba sa Malaquias 4 ang mao ra gihapon nga Elias nga gihisgotan diha sa Pinadayag 11:3? Ug ang uban pa nga mga saksi manag- . . . Ang maong duha ka mga saksi managlahi ba nga mga indibiduwal, managlahi ba?

³³⁰ Oo. Ang Elias sa Malaquias 4 dili mao ang Elias sa Malaquias 3. Nahisgotan na nato kana, kagabii. “Ug ang uban pa nga saksi managlahi ba, ang duha kanila?” Oo, sir, si Moises ug si Elias; sumala sa atong kapadayagan. Karon, dili ko gustong langanon kamo og ayo dinhi.

205. Unang Mga Hari 19, Igsoong Branham, nagatoo ko nga ang numero nga wala nangluhod mao’y pi- . . .

³³¹ Oo, husto kana. Pito ka gatus imbis nga. . . Salamat. Husto gyud kana. Pito ka gatus kadto imbis nga pito ka libo. . . “Igsoong Branham. . .” Pito ka libo diay imbis nga pito ka gatus. Karon, nasabtan n’yo ba kana?

³³² Kabalo mo, sa tinuod lang, pag ang usa ka tawo nagaanhi nga ingon niini, aron—aron magwali. . . Aduna ko’y gustong ipangutana kaninyo, karon, aron nga masabtan ninyo.

Kaniadtong mitungha si Elias gikan sa kamingawan, aduna siya’y usa ka mensahe. Mitungha siya mismo gikan niadto nga kamingawan, ug direktso nga miduol ug gisultihan kadtong hari,

“Walay bisan tun-og nga mahulog gikan sa langit hangtud nga igasulti ko kini.” Mao kana ang mga pulong nga aduna siya kaniadto. Ug mibiya na dayon, ug walay unsa man nga gisulti ngadto kang bisan kinsa man. Kita n’yo?

³³³ Sa dihang aduna siya’y usa na usab ka mensahe, mitungha siya mismo didto ug gisulti kini nga mensahe. Ug mitalikod dayon, ug mibalik ngadto sa kamingawan. Kita n’yo?

³³⁴ Karon, kung inyong himatikdan, sa diha nga gipahimutang ko ang ulohang-bato sa ilalum nianang tabernakulo, miingon Siya, “Buhata ang buluhaton sa usa ka ebanghelista.” Ug karon moabot ang takna sa diha nga malahi na kana nga buluhaton. Adunay usa pa ka butang nga nagakahitabo. Dayon ako gayu’y. . . Kita n’yo, mianhi ako dinhi ug gapaningkamot nga mamuhat ingon nga ebanghelista ug sa usa pa ka butang, ug kita n’yo kung asa na kamo karon? Kita n’yo? Kamo’y. . . Oh, ako—nagalaum ako sa iglesia nga mamahimong espirituhanon gayud nga makasabot.

206. Igsoong Branham, nasayod ko nga kinahanglang moabot si Elias sa makatulo ka higayon. Nagsulti ka kanamo nga miabot na siya sa duha na ka higayon, ug nga moabot pag-usab. Karon, ang tawo ba, nga pagakunsaran sa espiritu ni Elias, mamahimo bang usa sa duha ka saksi didto nga mao si Moises ug si Elias?

³³⁵ Dili. Dili. Siya’y usa ka Gentil, kita n’yo, ngadto sa Iglesiang Gentil. Nagapadala ang Dios, sa kanunay, og tawo ngadto sa mismong mga katawhan niini, kita n’yo. “Sa mga Iya mianhi Siya, ug ang mga Iya wala modawat Kaniya.” Kanunay Niyang ginapadalhan ang mga Iya, og Mensahe alang sa maong panahon.

³³⁶ Sa diha nga nakighilambigit pa ang Dios sa mga Judio kaniadto, walay si kinsa man nga mga propetang Gentil ang miabot. Sa diha nga nakighilambigit ang Dios sa mga Gentil, wala usab og mga propetang Judio. Sa dihang mobalik na ang Dios ngadto sa mga Judio, wala na usab og mga propetang Gentil. Kita n’yo? Nasabtan n’yo ba ang buut kong ipasabot? Sige.

Human nga mahitabo na ang Pagsakgaw. . .

³³⁷ Karon, magkaaduna man og pagsapaw sa panahon, siyempre, usa ka Mensahe kadyot nga nagapadayon ngadto sa usa pa. Kinahanglan mahitabo kana nga sama niana, nakita n’yo, sumala sa akong pagsaysay niana, kita n’yo; sama ni Pablo ngadto sa mga Gentil, ug uban pa. Sige.

207. Human nga mahitabo na ang Pagsakgaw, aduna pa ba’y si bisan kinsa sa iglesia ang maluwas sa katapusan, nga wala naapil diha sa Pagsakgaw?

³³⁸ Wala. Huh-uh. Tungod kay, human na man mibiya ang Dugo. Nakita n'yo, wala na'y pagpangaliya. Tapos na ang kapanahonan sa Gentil. Wala na'y usa nga maluwas human sa Pagsakgaw, o walay ni usa sa iglesia, huh-uh, sa iglesia. "Siya nga mahugaw, magmahugaw sa gihapon; siya nga balaan, magbalaan sa gihapon." Kita n'yo? Dili kana mahitabo, kita n'yo, dili gayud human nga gisakgaw na ang Iglesia.

208. Igsoong Branham, namatikdan ta ka, nga naghisgot ka sa setenta ka semana ni Daniel sa Unang Selyo nga Mensahe. Nasayod ko, mahitungod kang Daniel, diha sa teyp mahitungod kang Daniel, sa diha nga ipabalik na ang Ebanghelyo ngadto sa mga Judio, magsugod na ang setenta ka semana. Aduna pa ba'y usa ka setenta . . . usa ka semana, pito ka tuig, nga nahibilin para sa mga Judio? O, kaha, aduna na lang ba og tunga sa semana, usa ka tulo-ug-tunga ka tuig nga nahibilin para kanila?

³³⁹ Tunga sa semana na lamang. Nagpropesiya si Jesus, sa unang tunga nga semana, sumala sa gikatagna na. Tunga sa semana na lang ang nahibilin para kanila.

Igsoong Branham, tungod nga wala man ka nag-ampo para sa mga may sakit sulod sa tibuok semana, mahimo mo bang . . . ? (Usa lang kana ka hangyo para niana.)

Igsoong Branham, mahimo mo ba akong pakigkitaan human sa pan-. . . ? (Usa pud kana ka hangyo, kita n'yo, dinha.)

209. Mahimo mo bang isaysay ang mahitungod kang Satanas nga gigapos sulod sa usa ka libo ka tuig, ug nga gibuhian alang sa gubat sa—gubat diha sa Pinadayag 20:8? Unsa ba'y kahilambigitan niini sa Gubat sa Armageddon sumala sa gihisgotan diha sa Ikaupat nga Selyo? Pagatigumon ba ang Gog ug Magog gikan sa mga tawo sa bag-ong yuta?

³⁴⁰ Bueno, medyo hataas kini, ug akong—hisgotan ko lang ang pinaka punto niini, kita n'yo. Karon, ang unang butang, "Mahimong. . . ?" Karon, tingali'g dili ko maisaysay kini. Buhaton ko lang ang mahimo ko.

Mahimo mo bang isaysay kung giunsa nga gigapos si Satanas sulod sa usa ka libo ka tuig, og gibuhian pag-usab alang sa gubat diha sa Pinadayag 20:8?

³⁴¹ Dili kana ang Gubat sa Armageddon. Mahitabo ang Gubat sa Armageddon sa niini nga bahin, kita n'yo, oo, sa diha nga matapos na ang panahon sa Kasakitan.

Karon, unsa ba'y kahilambigitan niini sa Gubat sa Gog ug Magog?

³⁴² Wala. Ang usa mao kining usa ka libo ka tuig, ug ang usa pa mao'y sa katapusan sa—katapusan sa usa ka libo ka tuig.

**...sumala sa gihisgotan diha sa Ikaupat nga Selyo?
Pagatigumon ba ang Gog ug Magog gikan sa mga katawhan
sa bag-ong yuta?**

³⁴³ Paggibuhian na si Satanas gikan sa iyang bilanggoan, ug mokalagiw aron tigumon ang tanang mga tawo, ang mga dautan, aron dalhon sila ngadto niining dapit. Ug magpaulan ang Dios og kalayo ug asupre gikan sa langit, ug mangaugdaw sila, kita n'yo. Duha ka gubat, tanan. Pangutana:

210. Mahitungod sa saysenta'y-otso ka milyon nga gipamatay sa iglesiang Romano Katoliko, sa unsa man nga panahon sa kasaysayan nga nahitabo kini? Ug unsa man ka dugay sa panahon nga nahitabo kini?

³⁴⁴ Basaha n'yo ang *Glorious Reformation* ni Schmucker. Siguro ang pipila sa niining mga eskolar dinhi aduna niana. Ug mao kana ang kasaysayan sa iglesia. Ug nalimtan ko na karon kung unsa nga panid kana, apan nahitabo kana sukad niadtong panahon sa—sa... gisugdan ang maong butang, o gipabuhat kini ngadto sa iglesia, ni San Augustine nga taga-Hippo, Africa. Kana'y kaniadtong A.D. 354 pa. Ug milungtad kana hangtud 1850, ang masaker sa Ireland, kita n'yo. Busa nianang panahona sukad niadtong A.D. 33 o A.D. 30...354. Tugoti kong ihusto kana, karon, kita n'yo. Gikan A.D. 3-5-4 hangtud—hangtud A.D. 1-8-5-0, 1850, sumala sa kasaysayan, aduna kono og saysenta'y-otso ka milyon nga mga Protestante ang gipamatay, nga nailista diha sa Romanong listahan sa mga martir, tungod sa pagsupak sa papa sa Roma. Sumala kana sa kasaysayan. Kung gusto n'yong moingon nga sayup kana, bueno, kung ingon-ana, siguro wala pa si George Washington kaniadto, o kaha si Lincoln. Kabalo na mo, walay ni usa kanato ang nabuhi kaniadto aron masaksihan kana. Apan nagatoo ko nga sila'y ania dinhi kaniadto, bisan pa man. Makita ko ang mga ilhanan nga sila'y ania dinhi.

211. Igsoong Branham, ang ika-19 nga kapitulo sa...ug ang ika-18 nga bersekulo, “Apan nagbilin ako alang Kanako og pito ka libo sa Israel, pito ka libo sa Israel, nga ang tanan kanila wala nangluhod...nangluhod kang Baalim, ug ang matag baba...o—o nangluhod kang Baal, ug ang matag...nga wala makahalok kaniya, baba nga wala makahalok kaniya.” Palihog isaysay kini para kanako, ang mahitungod—mahitungod sa pito ka gatus.

³⁴⁵ Pito ka libo kadto. Kita n'yo? Ug kanang, “paghalok kang Baal,” wala ba mo mahibalo...Pila man ang ania dinhi nga mga Katoliko kaniadto? Oo. Kita n'yo? Nagahalok man kamo sa mga larawan. Kita n'yo?

³⁴⁶ Ug, hinumdumi, nga sa panahon sa Babilonia ug ni Nabucodonosor, sa diha nga nagsugod na ang gingharian sa Gentil, kita n'yo; sa diha nga nagsugod ang gingharian sa Gentil, misugod kini pinaagi og pagsimba sa usa ka tawo. Nagpahimo

kaniadto si Nabucodonosor og estatwa sa usa ka tawo. Ug kung aduna kamo'y espirituhanon nga panghunahuna, karon paminaw mo niini nga kapadayagan. Kadto nga espiritu, kadto nga tawo kang kinsa mihimo siya og kapadayagan, o, nga iyang gipahimoan og usa ka larawan, tungod sa kapadayagan niini, mao si Daniel, usa ka relihiyosong tawo nga gisimbasing. Nasabtan n'yo ba kini? Tungod kay, ginginganlan niya siya og Belsasar, dili ba? O, Belsasar, nga mao'y ngalan sa iyang diosdios. Ug nagpahimo siya og usa ka larawan niadto nga diosdios, nga mao ang larawan ni Daniel. Ug nagdumili gayud si Daniel nga moluhod sa kaugalingon niyang larawan. Kita n'yo? Kita n'yo?

³⁴⁷ Ug ania kini pag-usab, kita n'yo. Karon matikdi. Nagsugod ang Gentil nga gingharian, sa mga adlaw sa Babilonia, pinaagi ni Haring Nabucodonosor; usa ka Gentil nga hari, nga gihiusa ang iglesia ug ang estado, pinaagi sa pagdawat og usa ka balaan nga imahe . . . o imahe sa usa ka balaan nga tawo, ug pinugsanay nga pagsimba niini. Natapos ang Gentil nga gingharian sa tiil, pinaagi sa sinulat-sa-kamot diha sa bungbong, tungod sa usa ka pulitikanhong gahum nga naghiusa sa iglesia ug estado; aron ipugos ang paghalok sa mga imahe pag-usab, nakita n'yo, mao gihapon, imahe sa usa ka balaan nga tawo. Oo.

212. Igsoong Branham, sa diha nga mahitabo na kining Pagsakgaw—sa diha nga mahitabo na ang Pagsakgaw, ang mga kabataan nga wala pa mahibalo sa matarung ug dautan mahiuban ba diha sa Pagsakgaw?

Kung ang ilang mga ngalan anaa sa Basahon. Oo. Husto kana. Kita n'yo? Oo.

213. Igsoong Branham, gisulti mo kagabii nga ang . . . adunay pito ka gatus nga mga tawo ang mamaluwas, ang mamaluwas ilalum sa pagpangwali ni Elias. Ang buut mo bang ipasabot pito ka lib- . . . ?

³⁴⁸ Oo. Husto kana. Pasayloa ko ninyo tungod niana, kita n'yo. Okey lang kana, kita n'yo, nasulti ko man gyud.

Igsoong Branham, mahimo mo bang hubaron ang mahitungod sa . . . ? Human nga imong ablihan . . . Igsoong Branham, ang—ang (d-e-s-p-e- . . .) dispensasyon . . .

Pasayloa ko. “Ang dispen- . . . ?” Karon, dili kamo ang saypan. Kondili ako, kita n'yo.

214. Matapos na ba ang dispensasyon sa grasya, human nga imong ablihan ang Ikapitong Selyo?

³⁴⁹ Dili lang unta. Dili. Dili. Mga higala, ayaw n'yo kana hunahunaa ha, kita n'yo. Magpadayon lamang kamo. Magkalot lang gihapon og mga patatas, ug magsimba, ug magpadayon. Kung mahitabo man kana sa kabuntagon, kinahanglan mahikaplagan gihapon kamo nga eksaktong nagabuhat kung

unsay angay ninyong buhaton. Ayaw—ayaw mo magpasiugda og. . .

³⁵⁰ Kita n'yo, pagbuhaton ninyo kana, ginatuis n'yo lang ang mismong butang palayo gikan sa—sa katuyoan nga gitagan-an niini. Pagmaghunahuna kamo og medyo lahi nga mga panghunahuna, ug maghimo-himo mo og kaugalingon ninyong mga ideya mahitungod sa maong butang. Ayaw n'yo gamita ang kaugalingon ninyong ideya. Pagnagalingkod mo ug makapaminaw og mga butang nga sama niana, moingon, “Salamat Kanimo, Ginoo. Magkinabuhi gayud ako nga mas haduol pa diha Kanimo.” Kita n'yo? “Magkinabuhi akong. . .” Ayaw mo pangundang sa trabaho ug moingon, “Ibaligya ko na ang tanan-tanan.”

³⁵¹ May usa ka tawo nga mianhi, dinhi, niadtong miaging adlaw, nga taga North Carolina, sa wala pa kami mibiya. Ug ingon siya, “Himaya sa Dios! Masulti mo ba kanako kon asa kining usa ka bantugang *mahinungdanong* tawo?”

Ug ingon ko, “Dili.”

³⁵² “Oh, oo, sir,” miingon, “kini nga tawo adunay. . .” Miingon, “Kini nga tawo mao baya ang presidente sa Audio Mission.”

Ingon ko, “Sa unsa?”

Miingon, “Audio Mission.”

Ingon ko, “Dili ko masabtan.”

Ug ingon siya, “Oh,” miingon, “kini nga tawo mao ang presidente.”

Ingon ko, “Unsa’y sulti mo nga ngalan niya?”

³⁵³ Ingon siya, “Branham, siguro. Mora’g ingon niana, Brown o Branham.”

Ingon ko, “Bueno, ang akong ngalan mao si Branham.”

Ingon siya, “Ikaw diay ang presidente sa Audio Mission?”

Ingon ko, “Dili, sir.”

Ingon pa siya, “Bueno, asa man dapit ang Milenyum?”

Ingon ko, “Wala ko kabalo.”

³⁵⁴ Ingon siya, “Aba, usa ikaw ka. . . Ang buut mo—mo bang ipasabot nga kana—kana—kana—nagakahitabo kana mismo dinhi, ug wala ka kahibalo niini?”

Ingon ko, “Dili, sir, wala gyud ko kabalo.”

³⁵⁵ Ingon siya, “Bueno, himaya sa Dios!” Miingon, “Aduna man gud ko’y pipila—pipila ka mga higala nga mianha ug gisultian ako,” ug miingon, “Miundang na ako sa trabaho.” Sul-ob gihapon niya ang iyang pangtrabaho nga sinina. Miingon, “Igsoon, gusto ko sa Milenyum.”

356 Ug ingon ko, “Bueno, ako—siguro medyo naglibog lang ka, og diyutay, igsoon?”

357 Niadtong mga orasa usab adunay usa ka sakyanan nga miabot, usa ka taxi. Miingon ang babaye, “Kadali lang! Kadali lang! Kadali lang!” Usa ka luoy’ng babaye ang miabot didto, miingon, “Karon mag-ampo ka para sa akong bana.”

Ingon ko, “Oo, ma’am. Unsa—unsa man kana?”

358 Ingon niya, “Bueno, ang nasabtan ko man gud nga kinahanglan pa namong maghulat og usa ka bulan para sa usa ka pagpakighinabi, kita mo, aron maiampo.”

Ug ingon ko, “Unsa diay?”

359 Ug ingon niya, “Oo, sir.” Miingon, “Apan desperado na ako. Kinahanglan mo nang mag-ampo para sa akong bana.”

Ingon ko, “Oo. Asa man siya? Dalha na siya.”

360 Kining maong lalaki nga nagatindog didto, mitan-aw, og miingon, “Nagaampo ka diay para sa mga may sakit, usab?”

Ingon ko, “Oo, sir.”

361 Miingon, “Unsa gani tong imong ngalan, Branham?” Miingon ko. . . “Ug wala ka’y hingsayran og unsa man mahitungod sa Milenyum?”

362 Ingon ko, “Bueno, ako. . . Wala, wala gyud ko’y hingsayran.” Ingon ko, “Ako—wala ko’y nasabtan niana. Basta anaa lang na sa Biblia.”

363 Ingon siya, “Dili, nagakahitabo na kini karon mismo. Nanagpangabot na ang mga tawo gikan sa tanang dapit.”

Ingon ko, “Asa man kana?”

Ingon siya, “Sa Jeffersonville, Indiana, ilalum kono mismo sa tulay.”

364 Ingon ko, “Sir, mas may nahibaloan ka pa, kay kanako.” Ug ingon ko, “Wala gyud ko’y unsa man nga nahibaloan mahitungod niana.” Ingon ko, “Sige sulod ’ta ug manglingkod. Siguro mahimo natong estoryahan kining butanga.” Nag-estoryahanay kami, kita n’yo.

365 Ayaw, ayaw gayud, nakita n’yo na, mga higala, ayaw gyud tinguhaa ang usa ka ministerio. Kabalo na mo sa buut kong ipasabot. Kita n’yo? Mas magmalipayon hinoon kamo kung asa lang kamo. Kita n’yo? Magpadayon lamang kamo.

215. Human ang Pagsakgaw sa Pangasaw-onon, kanus-a ba ang iglesia, nga kinahanglang moagi sa panahon sa Kasakitan, og moatubang sa paghukom? (Dili kini magaatubang sa paghukom. . .) Kini ba’y sa dili pa o pagkahuman na sa Milenyum?

Para “sa iglesia.” Oh, pasayloa ko. Pasayloa ko, kon kinsa ma’y nagsulat niini. “Kanus-a ba ang iglesia nga. . .?”

Human ang Pagsakgaw sa Pangasaw-onon, kanus-a ba ang iglesia, nga kinahanglang moagi sa panahon sa Kasakitan, og moatubang sa paghukom? Kini ba’y pagkahuman na o sa dili pa...?

³⁶⁶ Pagkahuman na! “Ang tanang uban pa nga mga nangamatay dili sila mangabuhi pag-usab hangtud nga matapos una ang usa ka libo ka tuig,” kadtong mga wala nahiuban sa Pangasaw-onon. Atong tan-awon:

216. Gisulti mo sa makadaghan nang higayon nga gipatindog sa Dios ang komunismo, aron tumanon ang Iyang katuyoan, sama ni Haring Nabucodonosor. Karon unsa man ang papel sa komunismo diha niini nga mahimong...sa katapusan...ang pagabuhaton niini sa katapusan? Sa unsang paagi kini matapos? Daghang mga eskolar ang nagatoo nga sa gingharian sa amihanan, ang Gog ug Magog nga gihisgotan diha sa Kasulatan, magaataki sa Israel diha sa—diha sa...(Dili ko masabtan kung unsa gyud kini. Oo. Oo.) Nagatoo ko, nga sa... sa pipila ka mga teyp nga narekord, miingon, miingon ka nga sa katapusan kini...nga sa kataupusan pagagun-obon sa komunismo ang Katolisismo, o ang Vatican, diha sa usa ka pagbuto. Husto ba kini?

³⁶⁷ Oo. Sa Pinadayag 16, mabasa ninyo kana, ug Pinadayag 18:8 ug 12. Kung ania dinhi ang maong tawo, og gustong kuhaon kini nga bahin sa papel, mahitungod niana, makita mo kini mismo. Oo. Kita n’yo, “Alaut, alaut kanang bantugang siyudad! Tungod nga sulod sa usa ra ka oras midangat siya sa iyang katapusan.” Nakita n’yo, ang mga magpapatigayon, ug tanan nang uban pa, nga nagadala sa iyang mga butang pangbaligya. Mahitabo kana. Husto kana. Ug ayaw... .

³⁶⁸ Basta undangi na, kalimti na kanang mahitungod sa komunismo. Kita n’yo? Wala kana’y lain kondili usa ra ka pundok sa—sa mga tawo nga walay lain usab kondili mga barbaro nga—nga mga dili-diosnon. Usa kana ka sistema. Ipakita ko kaninyo ang usa ka butang, ipakita ko lang kaninyo kung unsa kana ka simple. Aba, aduna lang man og usa ka porsyento sa tibuk Rusya nga komunismo. Nagkinahanglan sila og usa ka mensahero. Kita n’yo? Usa ra ka porsyento; dayon, nubenta’y-nuebe ka porsyento kanila ang anaa gihapon sa Cristohanon nga bahin. Usa ka porsyento, ug unsaon man pagkontrolar sa usa ka porsyento ang nubenta’y-nuebe ka porsyento? Kana ang angay maisaysay kaninyo, kana mismo. Kung wala kana gitugot sa Dios, aba, bueno, dugay nga panahon na unta taling gipalagpot. Kita n’yo? Oo.

217. Igsoong Branham, miingon ka nga pagakontrolahon sa Roma ang gobyerno sa mga Judio sa ulahing tulo ug tunga ka tuig. Mao ba kana ang—ang unang tulo ug tunga ka tuig

sa Kasakitan, o mao ba kana ang ulahing tulo ug tunga ka tuig? Husto ba kini?

³⁶⁹ Mao na kana ang ulahing tulo ug tunga ka tuig. Husto kana. Dili ang una, tungod kay nahitabo na man kana.

Aduna pa’y usa human niining usa:

218. Minahal kong igsoon, ang Elias sa Malaquias 4:5 moadto ba sa kamingawan, sumala sa ginaingon kanato sa Unang Mga Hari 17 nga gibuhat sa usa pa ka Elias?

³⁷⁰ Bueno, dili ko moingon sa ingon ka eksakto nga buhaton gyud niya, nga moadto siya sa kamingawan. Apan mamahimo siyang ingon niana, nakita n’yo, siya kaniadto. . . si Eliseo ug si Elias, namatikdan n’yo ba? Kadaghanan sa ingon niana nga mga kalalaken-an mao’y mga kalalaken-an nga kanunay nagapahilayo; sila, nagapahilayo sila sa mga tawo. Sila’y mga lahi gyud. Dili kaayo sila nagapakig-uban sa mga tawo.

³⁷¹ Namatikdan man ninyo kung unsa si Eliseo kaniadto, ug si Elias, ug si Juan Bautista usab, ug ang kinaiyahan niana nga espiritu, nakita n’yo. Ug dili sila. . . Siya—siya, nagatoo ko nga ang maong tawo mamahimo gayud nga usa ka mahigugmaon sa kamingawan, ug siguro magapuyo ra sa kamingawan. Apan, karon, ang isulti mismo nga siya’y mamahimong usa ka ermitanyo ug magapuyo ra sa kamingawan, wala ko masayod mahitungod niana. Hinoon nagpuyo man sila sa kamingawan kaniadto. Wala mipuyo si Eliseo sa kamingawan, apan mipuyo si Elias. Ug dayon, si Juan, siya—nagpuyo pud siya sa kamingawan kaniadto.

³⁷² Ug, malisud isulti, nga kining uban pang mga propeta, sa diha nga nanggawas sila didto sa Judea, wala ko masayod kon diin sila nagpuyo. Tingali’g temporaryo ra silang nagpuyo didto sa bungtod sa kung asa man. O—o, kung unsa ma’y ilang buhaton sa mga adlaw sa ilang pagpropesiya, ako—wala ko masayod kung unsay ilang pagabuhaton.

Apan kamo. . . Ang ginapaningkamotan kong isulti mao kini. “Sila, mamahimo ba sila, mamahimo ba silang usa—usa—usa ka. . . ?” Gisulayan nilang ipapangutana, “Mamahimo ba silang lumolupyo lamang sa kamingawan?”

³⁷³ Bueno, kinahanglan nilang moadto sa amihanang British Columbia aron makakaplag og kamingawan nga pagapuyan karon, sa kung asa man, nakita n’yo. Busa mamahimo kanang usa ka tawo. . . Bug-os nang napuo ang kamingawan. Kita n’yo? Wala na’y igong kamingawan ang nahibilin. Kita n’yo? Busa, ang bugtong butang, sila—sila’y mamahimo gihapon nga mahigugmaon sa kamingawan, kita n’yo, ug siguro kanunay’ng moadto sa kamingawan, ug sila’y mahimong. . . Mamatikdan man ninyo ang kinaiyahan nila, kanang dili-mopakigkompromiso, kita n’yo, ug inyong—mahibaloan man

pud ninyo pagmoabot na kana. Kita n'yo? Makita ninyo kana; kamo'y—nagmata man mo kaayo.

³⁷⁴ Karon, ania ang usa, wala ko kahibalo kung unsaon paghisgot niini. Ug aduna pa ako'y usa sa dili pa kini, ug pagkahuman hangyoon ko sila nga ihunong 'sa ang teyp sa makadiyut.

219. Kung ang Dios usa ra ka personalidad, ngano ug giunsa man Niya pagpakig-istorya sa Iyang Kaugalingon didto sa Bukid sa Pagkabalhin?

³⁷⁵ Bueno, bag-ohay ko pa lang gisaysay kana, nakita n'yo. Kita n'yo? Gusto kong ipangutana kini kaninyo. Akong. . . Sa diha nga nag-ampo si Jesus ngadto sa Amahan, nakita n'yo.

[Misugod sa pagpakig-istorya si Igsoong Branham sa usa ka igsoong lalaki sa kongregasyon—Ed.] Nagatoo ko nga aduna ka na og bautismo sa Espiritu Santo. Dili ba, igsoon? Mahimo ka bang motindog sa makadiyut lang. Ginapahayag mo man nga aduna ka na og bautismo sa Espiritu Santo? [Nagaingon ang igsoong lalaki, "Oo, sir."] Ako man, usab. Dayon, unsa man kana? Kung ingon-ana dili ko ginapahayag nga aduna ako og—aduna ako og mga gahum sa akong kaugalingon aron ipadayag kini nga mga misteryo. Wala pud ko'y gahum aron ayohon ang mga may sakit. Ang Dios ra kana.

³⁷⁶ [Padayon nga nagapakig-istorya si Igsoong Branham ngadto sa igsoong lalaki sa kongregasyon—Ed.] Nagatoo ko nga usa ikaw ka ministro. Kung wala ako masayup, taga-Arkansas ikaw. Bueno, karon. Ug diha kanimo, ang aduna kanimo, mao—mao ang pagwali sa Maayong Balita. Sa yanong paagi, nagdaku ka sa usa ka umahan ug mga ingon niana. Wala gyud ka'y unsa man nga hingsayran mahitungod niini; apan may usa ka Butang nga miabot kanimo, aron iwali ang Maayong Balita. Wala mo ginapahayag kana ingon nga ikaw mismo, wala gayud. Kana'y usa pa ka Persona, nga gitawag og Espiritu Santo. Husto ba kana? ["Oo, sir."] Okey.

³⁷⁷ [Padayon nga nagapakig-istorya si Igsoong Branham ngadto sa igsoong lalaki sa kongregasyon—Ed.] Karon gusto kong mangutana kanimo. Ang. . . Kanang Espiritu Santo nagapuyo man sa kinasuloran nimo. Husto ba kana? [Nagaingon ang igsoon, "Husto kana."] Nagapakigsulti ka ba Kaniya? ["Oo, sir."] Nagapakigsulti ka Kaniya? Nagaampo ka Kaniya? Okey. Mao lang kana ang gusto ko. Salamat, kaayo.

Kita n'yo? Karon nasabtan n'yo ba kini? [Nagaingon ang kongregasyon, "Amen."—Ed.]

³⁷⁸ Pangutan-on ko pa kamo og usa. Giunsa man pagkahitabo nga sa dihang. . . si Jesus, sa San Juan 3, Siya miingon, "Sa diha nga moabot ang Anak sa tawo, nga karon anaa sa Langit." Kita n'yo? "Karon anaa sa Langit; moba-. . . moabot sa yuta." Kita n'yo? "Ang Anak sa tawo nga karon anaa sa Langit," ug ania Siya

nagatindog mismo niadtong orasa nga nagpakigsulti sa maong tawo. Karon tubaga ako ninyo niana. Si Jesus ug ang Amahan mao ra nga Persona.

³⁷⁹ Sama lang sa Balaang Espiritu nganhi kanako; nagatan-aw kamo kanako nga nagawali, apan dili kini ako.

Dili kini ako ang makasulti og pulong nga makapatungha, sama sa hingsayran na ninyo, og usa ka hayop; nagalingkod mismo didto ug gitan-aw kadto, ug gipatay ang maong hayop ug gikaon kadto. Kana mao ang mamugnaon nga gahum. Wala kana sa usa ka tawo.

³⁸⁰ Dili kini ako ang makahimo pag-ayo sa usa ka batang lalaki dinhi, nga nagahigda...Ginapahigda na lang siya sa mga doktor, tungod sa sakit sa kasingkasing, unyang gabii. Ug moingon, “Mao kini ang ginaingon ni William Branham”? Dili. “MAO KINI ANG GINAINGON SA GINOO, tapos na kana.” Ug dalhon siya ngadto sa doktor, pagkasunod adlaw, ug nawagtang na mismo kana.

³⁸¹ May usa ka bata nga dunay leukemia, hangtud nga nangbudlot na ang mga mata niini, ug dalag na gayud, ang tiyan; hangtud nga gidala na nila kini sa ospital, aron maabunohan kini og dugo ug uban pa, aron lang madala kini dinhi. Ug sulod ra sa lima ka minuto, nangayo na og hamburger! Ug gidala kini’g balik ngadto sa doktor, pagkasunod adlaw, ug wala na gyu’y bisan usa ka tipik sa leukemia ang makaplagan kaniya. Kana ba’y “Mao kini ang ginaingon ni William Branham”? Kana mao’y “MAO KINI ANG GINAINGON SA GINOO!” Bisan pa niana, Siya’y usa ka indibiduwal nga lahi kanako, apan ang bugtong paagi nga mapadayag Siya mao’y pinaagi kanako. Kita n’yo?

³⁸² Ingon niana si Jesus ug ang Amahan kaniadto. Miingon si Jesus, “Dili kini Ako ang nagabuhat sa maong mga buhat; ang Akong Amahan kini nga nagapuyo Kanako.”

Karon, “Ang Anak sa tawo mikanaug gikan sa Langit, nga karon anaa sa Langit.” Kita n’yo? Unsa man kadto? Siya’y anaa-sa-tanang-dapit tungod kay Dios man Siya.

³⁸³ Karon, kining usa pa, ako...[Ginapalagitik ni Igsoong Branham ang iyang tudlo sa makausa—Ed.] Gusto kong isulti kini nga mga pulong.

Hatagi’g katin-awan kung unsay gihisgotan mo mahitungod sa...

[Blangko nga bahin sa teyp. Usa ka igsoong lalaki ang nagasulti sa kongregasyon.—Ed.]

Salamat Kanimo, Amahan nga Dios. Ginapasalamatan Ka namo tungod sa Espiritu, nga ania Ikaw dinhi. Ug gikasultihan kami, Amahan, nga usa ka higayon, kaniadto, didto, misulod ang kaaway, ug mikunsad ang Espiritu nganha sa usa ka tawo ug nagpropesiya kaniya, ug nagsulti kaniya. Gihan-ay niini ang

maong butang, kon diin hingsayran nila kung unsaon pag-adto ug pagbuntog sa kaaway, ug kon asa makaplagan ang kaaway.

³⁸⁴ Ug ginapasalamatan ko Ikaw, Amahan, nga nagpabilin Ka sa gihapon nga mao ra nga Dios sa kung unsa Ikaw kaniadto. Mao ra sa gihapon Ikaw. Nagakausab kami, ug nagakausab ang mga kapanahonan, ug nagakausab pud ang mga panahon, ug ang mga tawo. Apan wala Ka gayud nausab sukad-sukad. Ang Imong mga sistema mao ra sa gihapon. Ang Imong grasya mao ra sa gihapon. Ang Imong mga buhat mao ra usab gihapon, tungod kay kahibulongan man ang mga niini, ug lagpas pa sa unsa man nga kahibalo sa tawo aron masabtan niya.

³⁸⁵ Busa mapasalamaton kami, Ginoo, nga ang Imong mga tinago natago diha sulod sa mga kasingkasing sa Imong mga alagad. Ug malipayon kaayo kami tungod niini, Ginoo. Ug hinaut nga managpanglakaw kami ingon nga nagadan-ag nga mga Kahayag, aron . . . gikan sa usa ka lugar ngadto sa usa pa ka lugar, ug gapaningkamot, pinaagi sa gugma, nga—nga madala ang uban pasulod; aron nga among mapukot ang matag gagmay'ng kanto, ug itambog ang maong pukot, aron makasigurado nga makuha namo ang matag isda nga panag-iya Nimo. Ug dayon pagakuhaon na sa Cordero ang Iyang Pangasaw-onon, aron nga maanaa na kanunay sa Iyang kiliran. Nagahulat kami alang nianang panahona, pinaagi sa Ngalan ni Jesus Cristo. Amen.

³⁸⁶ Pila man ang mga may sakit nga ania dinhi? Tan-awon nato ang inyong mga kamot. Bueno, mora'g halos . . . Ipataas ang inyong mga kamot pag-usab. Mga usa, duha, tulo, upat, lima, unom, pito, walo, siyam, napulo, onse, dose, trese, katorse, kinse, dise-sais, dise-siete, dise-otso, dise-nuebe, baynte . . . [Si Igsoong Branham ug ang usa pa ka tawo padayon ug mahilumon nga ginaihap ang mga gipataas nga kamot—Ed.] Kuwarenta'y-siete, mga kuwarenta'y-siete. Oo.

³⁸⁷ Alas onse-traynta na. Mahimo na kitang mag-ampo para sa mga may sakit karon mismo; ipahimutang n'yo unyang gabii sa—sa . . . Mahimo n'yo ba, gusto n'yo bang buhaton kana? [Nagaingon ang kongregasyon, “Amen.”—Ed.]

³⁸⁸ Nagatoo ko nga karon mismo mao'y usa ka maayo nga higayon aron buhaton kini. Sultihan ko kamo kon ngano: ang Balaang Espiritu, ania karon mismo, nga nagadihog. Karon, ingon nga nakasulod kita nianang Espiritu karon, kita n'yo, ug nakita ninyo kana nga Butang, nasayod kamo nga kana nga Butang—ania mismo kana nga Butang, kita n'yo. Ug kung mahimo ninyong toohan, kinahanglan toohan na ninyo kini karon mismo. Kita n'yo? Kung motoo man kamo, karon na.

³⁸⁹ Karon, gusto namong mangduol mo dinhi sa mahilumon lang nga paagi. Ug tugoti kanang mga anaa nianang pasilyo *dinha*, nga nanagpataas sa ilang mga kamot, nga makaagi *niini*

nga pasilyo, ug dayon molakaw *nini* nga agianan. Ug dayon iampo namo sila, sa matag pasilyo. Ug kuwarenta’y-singko—kuwarenta’y-singko lang man, kuwarenta’y-siete kanila; dili ra kaayo kini magdugay.

³⁹⁰ Hangyoon ko si Igsoong Neville nga kung puede moanhi siya, monaug dinhi uban kanako, ug mag-ampo kami para kanila.

³⁹¹ Una, sila nga nagapaingon karon nganha sa pasilyo, tindog lang ‘sa mo sa makadiyut, aron nga makaampo na kami para kaninyo dinhi ug magpandong og mga kamot sa tanan. Karon, husto kana, basta ang tanan nga moduol diha sa linya sa pagpaampo, kita n’yo, sila lang nga moduol diha sa linya sa pagpaampo. Kita n’yo? Karon—karon, kita n’yo, nagdaginot ta sa oras, aron nga masiguro nato nga mapahigayon mismo kini, mag-ampo na kami para kaninyo karon.

³⁹² Tan-awa, mga higala. Karon tugoti kong isaysay ‘usa kini kaninyo. Gisulti kini ni Jesus Cristo, “Kini nga mga ilhanan maganunot kanila nga nagatoo.” Karon matikdi. Wala gayud Siya miingon, “Kung mag-ampo sila para kanila.” “Kung pagapandongan nila sa ilang mga kamot ang mga masakiton, mangaayo sila!” Ug kung nahimo man sa Dios nga ayohon ang walay-pagkaayo nga kaso sa leukemia, ug ang usa ka batang babaye nga dili mismo makabaton og pagtoo para sa iyang kaugalingon, ug himoon kana nga bata nga naayo na; kung nahimo pud Niyang ayohon ang sunod nga kaso, ang usa ka luoy’ng batang lalaki, ug giayo gayud siya hangtud nga ang mga doktor wala na gyu’y nakaplagnan nga rheumatic fever diha sa iyang dugo o unsa pa man; unsa pa kaha ang mahimo Niya para kaninyo? Karon, sila nga mga gagmay’ng kabataan, dili pa gani nila masabtan kung unsa gyud ang pag-ampo. Apan gipandongan lang sila og mga kamot, ug naayo sila. Masabtan na nato kana.

Karon, samtang nagatindog kamo, aron mag-ampo karon.

³⁹³ Langitnong Amahan, pinaagi sa Imong halangdong Presensiya nga ania karon, ang halangdong Balaang Espiritu, ang Usa nga aduna kami og retrato, ang Usa nga ginabasa namo diha sa Biblia, ania Siya dinhi mismo karon. Ginapadayag Niya ang Iyang Kaugalingon pinaagi sa tawhanong lawas.

³⁹⁴ Nakita namo mismo Siya nga walay pagkapakyas ni usa ka higayon, sulod sa daghang mga katuigan, aron ipahayag ang mismong mga hunahuna sa kasingkasing sa tawo, aron ipahayag ang sala nga ilang nabuhat, isulti kanila sa ingon ka eksakto kung unsay nahitabo ug kung unsay mahitabo, nga wala gyu’y pagkapakyas ni usa ka higayon! Kung ingon-ana, nahibaloan namo nga ang Dios ni Abraham, Isaac, ug ni Israel, nagapabilin sa gihapon nga Dios, sa Persona ni Jesus Cristo.

³⁹⁵ Ug karon pinaagi sa Iyang Espiritu nga nagakunsad gikan sa Langit, ilalum sa Dugo nga giula didto sa Kalbaryo, nga

nagakunsad taliwala sa mga tawo, aron himoong dayag ang Iyang Kaugalingon diha sa tawhanong lawas sa dili pa ang pagsunog sa kalibutan; ang halangdong Balaang Espiritu nga girepresentar diha sa tawhanong lawas. Kadtong bililhon nga mga tawo nga midawat sa Dugo nga pangbayad-sa-sala, ug misulod ang Balaang Espiritu sa ilang kinabuhi; ang Dios, nga girepresentar sa tawhanong lawas.

³⁹⁶ Busa, dili lamang ang tawhanong lawas, ang nagabuhat sa maong buhat, sama sa bautismo o uban pa, nga inubanan sa sugo, nga, “Kini nga mga ilhanan maganunot kanila nga nagatoo.” Pinaagi sa pagpandong og mga kamot nganha sa mga may sakit, siguradohon gayud sa Balaang Espiritu nga mangaayo sila, kung motoo lang sila. Karon, Amahan, nasayod kami nga tinuod kining mga butanga.

³⁹⁷ Kining mga tawo nga nagatindog, moagi sila ilalum sa mga kamot sa mga ministro nga nakadawat niining Balaang Espiritu, ug andam sila, Ginoo, nga magpandong og mga kamot nganha sa mga may sakit. Ug nasayod kami, Amahan, nga kung kini nga mga tawo motoo lang gyud! Maingon sa matag Pulong nga Imong gisaad, kinahanglan kining matuman, busa. . . Ug dili kini matuman kon walay pagtoo, tungod dili gayud mahimo ang pagpahimuot sa Dios kon walay pagtoo. Dili gayud namo mahimo kana.

³⁹⁸ Ug karon ingon nga kami adunay pagtoo, toohan namo, kining saad nga anaa sa among atubangan, uban ang mga Selyo sa Biblia nga giablihan na para kanamo, nga ginatuman gyud sa Dios ang Iyang Pulong! Hinaut nga kining minahal nga mga tawo, nga mga masakiton, Ginoo, . . . ug ang akong pagbati para kanila, ingon nga usa ka tawo sa usa ka mortal nga lawas sama sa ilaha. Ug karon ang ilang. . . ang mao gihapon nga Balaang Espiritu nga nagapuyo kanamo, Ginoo, nagapuyo usab diha kanila. Ug naluoy kami para sa matag usa. Ug hingsayran namo nga ang bag-ong Pakigsaad diha sa bag-ong Dugo. . . Kung ang daang Pakigsaad nagtanyag gani og kaayohan, unsa pa ka labaw kaha ang mahimo niining “bag-o ug mas maayo”? Amahan, hinaut nga mamaingon gyud niana kini, aron kining mga tawo dili mapakyas, kondili madawat mismo nila ang ilang kaayohan sa diha nga moagi sila sa mga kamot sa Imong mga alagad, pinaagi sa Ngalan ni Jesus Cristo. Amen.

³⁹⁹ Karon—karon, atong, manglingkod 'usa *kining* mga ania nga bahin samtang nagaagi pa *kining* mga ania nga bahin. Ug dayon mobalik *kining* mga ania nga bahin, ug ang mga anaa sa usa pa ka bahin. . . Karon, ang uban kaninyo nga mga kaigsoonan dinhi, nga manindog. Nagatoo ko nga mga ministro kamong mga dinhi dapita, kamong tanan dinha dapit.

Asa man si Doktor, Igsoong Ned? Moapil ka ba diha sa linya sa pagpaampo, Igsoong Ned? [Nagaingon si Igsoong Ned Iverson,

“Oo. Moapil ako alang sa usa ka tawo.”—Ed.] Sige, Igsoong Ned. Sige. Sa dihadhiha nga maiampo ka na, sige apil ka na sa linya.

⁴⁰⁰ Karon kining mga ania niini nga bahin *dinhi* dapit, lingkod 'sa mo sa makadiyut lang, ug tawgon ko ang mga ania *niini* nga bahin. Dayon, pagkahuman moanha na kami ug tawgon ang sa tunga nga pasilyo, ug pabalikon sila *niini* nga direksyon. Dayon tawgon na *kini* nga pasilyo, ug pabalikon sila *niini* nga direksyon, ug mag-ampo kami para sa tanan.

⁴⁰¹ Hangyoon ko si Igsoong Teddy . . . Asa man siya? [Nagaingon si Igsoong Teddy Arnold, “Ania dinhi.”—Ed.] Sige. Gusto kong tugtogon mo dinha, “The great Physician now is near.” Ug ang piyanista, kung asa man sila, duyogi siya, kung mahimo.

⁴⁰² Paminaw, mahinumduman n'yo ba ang higayon kaniadto nga gipatugtog kana, ug may usa ka batang lalaki ang gidala diha sa entablado? Nagatugtog ang batang Amish nga babaye, “The great Physician now is near.” Aduna siya'y taas, maitum nga buhok, o—o bulagaw nga buhok, diay, usa ka Mennonite o usa ka Amish nga babaye, buhok, nga nakadunghay luyo sa iyang ulo.

⁴⁰³ Ug miabot ang Balaang Espiritu sa maong batang lalaki, sa pagpandong lang og mga kamot; bakul ang iyang mga tiil. Ug milukso siya gikan sa akong mga bukton, ug minaug sa entablado. Mitindog ang iyang inahan, ug nakuyapan; usa ka Mennonite, usab, sa hunahuna ko.

⁴⁰⁴ Ug miabot usab ang Espiritu sa Dios niadtong batang babaye nga Mennonite, o Amish, kung unsa man siya. Sila ug ang ang iyang amahan nanglingkod dinha, nga may . . . nakabisti, ingon nga mga Mennonite, o unsa man kadto. Ug milukso siya gikan sa piyano, nga ginabayaw ang iyang mga kamot. Ug nakadunghay ang matahum niya nga buhok; mora siya og usa ka Anghel. Nagsugod siya sa pag-awit diha sa Espiritu; ug samtang ginabuhat niya kana, padayon ra nga nagatugtog ang piyano, “The great Physician now is near, the sympathizing Jesus.”

⁴⁰⁵ Ang tanan nga nangtingdog didto, mga linibo, nagtan-aw mismo niadtong mga tikla nga nagatugtog, “The great Physician now is near, the sympathizing Jesus.” Nanindog ang mga tawo gikan sa mga wheelchair, gikan sa mga higdaanan, mga yayunungan, og nanglakaw.

⁴⁰⁶ Kadtong mao gihapon nga Ginoong Jesus ania man usab dinhi, niining buntaga, nga mao sa gihapon kung unsa Kini niadtong higayona. Magtoo lamang karon.

Tugtog kana nga kanta, kung mahimo, *The Great Physician*.

Karon mag-ampo ang tanan.

Tugoti silang molibot sa tibuok lawak, moanhi *niini* nga direksyon, ug hangtud diha sa inyong lingkoranan o kung asa man mo gusto moadto, samtang nagalakaw kamo. Nasabtan ba

ninyo'g klaro dinha sa likod? Okey. Busa, balik mo mismo sa inyong lingkoranan, dayon manindog kita.

⁴⁰⁷ Karon paminaw. Samtang ginaampo kini sila, mag-ampo pud mo para kanila. Dayon samtang ginaampo kamo, mag-ampo 'sab sila para kaninyo.

Karon, kamong mga ministro dinhi dapit, tindog mo. Ug gusto kong pandongan ninyo kini og mga kamot samtang nagaagi sila.

⁴⁰⁸ Karon, ang tanan, iduko ang mga ulo, ug padayon nga iduko ang inyong mga ulo. Padayon nga nagaampo. Ug pagmoagi na kamo, dayon magpandong. . . pagapandongan kamo. Hinumdumi, usa kini ka saad sa Dios nga nagapahayag sa mga tinago sa Iyang Basahon, sa mga tinago sa kasingkasing sa tawo. Siya mao ang Dios nga magapanghimatuod niana, kung toohan ninyo kana. Kita n'yo? Karon mag-ampo ang tanan.

Karon kamong mga ministrong igsoon tindog mo dinhi, kung mahimo.

Sige, iduko nato ang atong mga ulo.

⁴⁰⁹ Karon, Ginoong Jesus, samtang nagaduol kini nga mga tawo, hinaut nga ang Gahum sa Dios nga Makagagahum-sa-tanan himoong buhi ang ilang pagtoo sa gilayon sa diha nga magaaagi sila, ang tanan sa Ngalan ni Jesus.

⁴¹⁰ Karon, sige, magsugod ang linya sa *niini* nga direksyon. Hangyoa ang matag usa, nga pandongan sila og mga kamot, kamong mga ministro, samtang nagaagi sila.

⁴¹¹ [Misugod na sa pag-ampo si Igsoong Branham ug ang mga ministro ug ginapandongan nila sa mga kamot ang matag tawo nga nagaduol diha sa linya sa pagpaampo, samtang padayon nga nagatugtog ang organista og *The Great Physician*—Ed.]

Sa Ngalan ni Ginoong Jesus!

Igapandong ko ang akong mga kamot, sa Ngalan ni Ginoong Jesus, igsoon ko.

Sa Ngalan ni Ginoong Jesus!

Dios, itugot kini nganha sa igsoon kong babaye, si Rosella, sa Ngalan ni Jesus.

Sa Ngalan ni Jesus Cristo!

Sa Ngalan ni Jesus Cristo!

⁴¹² Hunong sa mo; tan-awa kana hangtud nga matapos na ang linya.

Sa Ngalan ni Ginoong Jesus! . . . ? . . .

Hinumdumi, Siya'y mapainubsanon. Pagduol mo nga mapainubsanon.

⁴¹³ [Bahin lang ang madungog sa mga pulong ni Igsoong Branham dinhi, ug kulang-kulang aron ipatik ang kumpletong

ideya nga gipahayag. Padayon ra ang linya sa pagpaampo dinhi sulod sa sais minutos ug baynte-singko segundo—Ed.]

⁴¹⁴ [Blangko nga bahin sa teyp. Miduol si Igsoong Billy Paul Branham ngadto sa mikropono ug nagaingon, “Mahimo ba ninyo mga higala nga moatras nganha sa likod, palihog? Mahimo ba ninyo mga higala nga nagatindog *niana* nga pasilyo, nga mohawa diha sa pasilyo ug moadto sa luyo? Padayon lang nga moadto sa luyo, palihog. Salamat. Kamong mga higala nga anaa sa tunga nga pasilyo, mahimo n’yo bang moadto didto, usab?”—Ed.]

⁴¹⁵ [Bahin lang ang madungog sa mga pulong ni Igsoong Branham dinhi, ug kulang-kulang aron ipatik ang kumpletong ideya nga gipahayag. Padayon ra ang linya sa pagpaampo dinhi sulod sa dos minutos ug baynte segundo—Ed.]

Dawata ang imong kaayohan, igsoon, gikan kang Jesus Cristo.

Dawata ang imong kaayohan, Igsoong Mitchell.

Dawata ang imong kaayohan, igsoon, gikan kang Jesus Cristo.

Dawata ang imong kaayohan, igsoong babaye, gikan kang Jesus Cristo.

Dawata ang kaayohan, igsoong babaye, gikan kang Jesus Cristo.

Dawata ang imong kaayohan gikan kang Jesus Cristo.

Dawata ang imong kaayohan, igsoong babaye, gikan kang Jesus Cristo.

Dawata ang imong kaayohan, igsoon, gikan kang Jesus Cristo.

Dawata ang imong kaayohan, igsoong babaye, gikan kang Jesus Cristo.

Dawata ang imong kaayohan, igsoong babaye, gikan kang Jesus Cristo.

Dawata ang imong kaayohan, igsoon, gikan kang Jesus Cristo.

Dawata ang imong kaayohan, igsoon, gikan kang Jesus Cristo.

Dawata ang imong kaayohan, igsoon, gikan kang Jesus Cristo.

Dawata ang imong kaayohan, igsoong babaye, gikan kang Jesus Cristo.

Dawata ang imong kaayohan, igsoong babaye, gikan kang Jesus Cristo.

Dawata ang imong kaayohan, igsoon ko, gikan kang Jesus Cristo.

Dawata ang imong kaayohan, igsoong babaye, gikan kang Jesus Cristo.

Dawata ang imong kaayohan, igsoong babaye, gikan kang Jesus Cristo.

Dawata ang kaayohan, igsoon ko.

Dawata ang imong kaayohan gikan kang Jesus Cristo.

Dawata ang imong kaayohan, igsoon, gikan kang Jesus Cristo.

Dawata ang imong kaayohan, igsoon, gikan kang Jesus Cristo.

Dawata ang imong kaayohan, igsoon, gikan kang Jesus Cristo.

Dawata ang imong kaayohan.

Dawata ang kaayohan, igsoong babaye, gikan kang Jesus Cristo.

Dawata ang kaayohan, igsoong babaye.

Dawata ang kaayohan, igsoong babaye, gikan kang Jesus Cristo.

Dawata ang imong kaayohan, igsoong babaye, gikan kang Jesus Cristo.

Dawata ang imong kaayohan, igsoon, gikan kang Jesus Cristo.

Dawata ang imong kaayohan, igsoon kong babaye.

Dawata ang kaayohan, igsoon.

Dawata ang imong kaayohan, igsoong babaye . . . ? . . .

Dawata ang imong kaayohan, igsoong babaye . . . ? . . .

Dawata ang imong kaayohan, igsoon.

Dawata ang imong kaayohan.

Dawata ang imong kaayohan, igsoon . . . ? . . .

Dawata ang imong kaayohan, igsoong babaye . . . ? . . .

Dawata ang imong kaayohan gikan kang Jesus Cristo.

Dawata ang imong kaayohan.

Dawata ang kaayohan, igsoong babaye . . . ? . . . , gikan kang Jesus Cristo.

Dawata ang kaayohan.

Dawata ang kaayohan . . . ? . . .

Dawata ang kaayohan, igsoon ko, gikan kang Jesus Cristo.

Dawata ang kaayohan.

Dawata ang kaayohan, igsoong babaye . . . ? . . .

Dawata ang kaayohan, sa Ngalan ni Jesus Cristo.

Dawata ang kaayohan, sa Ngalan ni Jesus. Amen.

Dawata ang kaayohan.

Dawata ang kaayohan.

Dawata ang imong kaayohan.

Dawata ang imong kaayohan.

Dawata ang imong kaayohan gikan kang Jesus Cristo.

⁴¹⁶ [Miduol si Igsoong Billy Paul Branham ngadto sa mikropono ug nagaingon, “Aduna pa ba’y si kinsa man nga gustong moduol diha sa linya sa pagpaampo? Mahimo na kamong molinya, palihog. Kung aduna pa’y gustong moduol diha sa linya sa pagpaampo, mahimo na kamong molinya, palihog.”—Ed.]

Dawata ang imong kaayohan, igsoon ko, gikan kang Jesus Cristo.

Dawata ang imong kaayohan, igsoong babaye, gikan kang Jesus Cristo.

Dawata ang imong kaayohan, igsoon, gikan kang Jesus Cristo.

⁴¹⁷ Dawata ang imong kaayohan, Igsoong babayeng Wood, gikan sa kamot ni Jesus Cristo.

Dawata ang imong kaayohan . . . ? . . .

Dawata ang kaayohan . . . ? . . .

⁴¹⁸ Dawata ang kaayohan, Igsoong babayeng Roberson, pinaagi sa kamot ni Jesus Cristo.

Dawata ang kaayohan, igsoon ko, pinaagi sa kamot ni Jesus Cristo.

Dawata ang kaayohan, igsoong babaye . . . ? . . . , gikan sa kamot ni Jesus Cristo.

Sa Ngalan ni Jesus Cristo, dawata ang imong kaayohan.

Ayoha siya, sa Ngalan ni Jesus Cristo.

Dawata ang kaayohan, igsoong babaye . . . ? . . .

Dawata ang imong kaayohan, anak, gikan kang Jesus Cristo.

Dawata ang imong kaayohan, igsoong babaye, gikan kang Jesus Cristo.

Dawata ang imong kaayohan, igsoon, gikan kang Jesus Cristo.

Igsoong Weerts, dawata ang imong kaayohan, igsoon, gikan kang Jesus Cristo.

Igsoong babaye, dawata ang imong kaayohan gikan kang Jesus Cristo.

Dawata ang imong kaayohan, igsoon . . . ? . . .

Igsoon, pinaagi sa Ngalan ni Jesus Cristo, dawata . . . ? . . .

Sa Ngalan ni Jesus Cristo . . . ? . . .

Sa Ngalan ni Jesus Cristo . . . ? . . .

Sa Ngalan ni Jesus Cristo nga atong Ginoo, dawata ang imong kaayohan.

Sa Ngalan ni Jesus Cristo, dawata ang imong kaayohan, igsoon ko.

Sa Ngalan ni Jesus Cristo . . . ? . . .

Sa Ngalan ni Jesus Cristo, dawata ang imong kaayohan, igsoong babaye.

Sa Ngalan ni Jesus Cristo . . . ? . . .

419 [Miduol si Igsoong Billy Paul Branham ngadto sa mikropono ug nagaingon, “Mao lang ba kana tanan ang gustong maiampo karon?”—Ed.]

420 [Nagapakig-istorya si Igsoong Lee Vayle ngadto kang Igsoong Branham—Ed.] Hinaut nga itugot sa kamot ni Ginoong Jesus nganha kanimo, Igsoong Vayle, kini nga hangyo para sa imong minahal sa kinabuhi, sa Ngalan ni Jesus.

421 [Nagapakig-istorya si Igsoong Billy Paul Branham ngadto kang Igsoong Branham—Ed.] Billy Paul, sa ingon kadaghan nga mga kard nga imong gipanghatag, karon dawata ang inyong kaayohan, sa Ngalan ni Jesus Cristo.

The great Physician now is near,
The sympathizing Jesus,
He speaks the drooping heart to cheer,
Oh, hear the voice of Jesus.

Dungan ang tanan:

Sweetest Name in seraph song,
Sweetest Name on mortal tongue,
Sweetest carol ever sung,

422 Dios, alang sa hangyo niining matahum nga magtiayon, sa kalibutan, usa sa . . . ? . . . Hinaut nga madawat nila ang ilang hangyo, Ginoo, sa Ngalan ni Jesus Cristo.

423 . . . ? . . . ni Jesus Cristo, hinaut nga ang maong tawo nga anaa sa hunahuna sa among igsoong babaye karon mismo, hinaut nga ang gahum sa Dios mouban niana nga hangyo. Hinaut nga mahilwas na siya. Itugot kini, Ginoo. Amen.

424 Ginoong Dios, sa Ngalan ni Jesus, itugot ang hangyo niini nga lalaki. Ginaampo ko siya, Ginoo, uban sa akong pagampo. Amen.

425 Oh, pagkamaanindot niini! [Nagakalipay ang kongregasyon ug nagaingon, “Amen.”—Ed.] Nagatoo ko nga kung ang matag tawo nga mianhi dinhi, niining buntaga, ilalum niining makahibulongang pagdihog, ako—nagatoo ko nga kung inyo lang . . . Karon ayaw kamo pagpaabot sa kung unsang bantugang

butang. Hinumdumi nga ang yanong butang lang mao nga toohan kung unsay Iyang gisaad.

⁴²⁶ Karon kitang tanan dungan natong isulti kini. [Nagasabat ang kongregasyon kang Igsoong Branham—Ed.] Wala kami nagapaabot sa usa ka bantugang butang, apan sa Ngalan ni Jesus, madawat namo ang Iyang saad.

⁴²⁷ Mao na kana. Kana ang nagapatapos niana. [Nagaingon ang kongregasyon, “Amen,” ug nagakalipay sa makusog—Ed.] Amen! Panalanginan kamo sa Dios!



MGA PANGUTANA UG MGA TUBAG SA MGA SELYO CEB63-0324M

(Questions and Answers on the Seals)

SERYE SA KAPADAYAGAN SA PITO KA MGA SELYO

Kining Mensahe ni Igsoong William Marrion Branham, unang giwali sa Ingles niadtong Dominggo sa buntag, Marso 24, 1963, sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org